


Djinang Bible



Portions of the Holy Bible in the Djinang language of
Australia

Djinang Bible

Portions of the Holy Bible in the Djinang language of Australia

copyright © 1977-2021 Wycliffe Bible Translators

Language: Djinang

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-07-26

PDF generated using Haiola and XeLaTeX on 18 Apr 2025 from source files dated 31 Aug 2023
b155f5b5-eb2a-5d57-8908-7eacf349fb3

Contents

Ngurrununggal bilidjirri	1
Luke	49
1 John	50

NGURRUNUNGGAL BILIDJIRRI

Goddji ngamangamadjili bukmak mala

¹ Ngurrunungał bilidjirri, bilapilakinđing Godđji ngurr yirrpini ngamangamadjili gurrbi ngirkı ga bukmak ḥamı.

² Ngunukiňing wirrpbın miri gumbała gurrbi ngirkı, ga gar malirdji ngagirrdjini gapi djalkng ga ngnungiri Godngiri watı galminy gapimirrpom.

³ Nyani God yan kungliban, "Badayaladjirriban!" Girri badayala birraldjiniban, miri gar kambarrdjini.

⁴ Manngibirri nyani nyangini miri ngnung butalban. Ga manngibirri ga gar malir nyani biliny mältjiliban, nyani rarrmalı nyani rarrmalı.

⁵ Nyani Godđji biliny bultjidjini Manngibirri ga Malir. Mir bindjiniban balnggidjini ga milwartjini, yuwardjakinim wurpm yakirri.

⁶ Manymak, nyani wanginiban, "Gapi irr rindigiban, mir rarrmalipm bil djirridji, wurpm irr bılıbiligilidjigi nguymirri ga wurpitji gilitjiliq nammirri, marrga banim irr djamadjigi miral garrkuluk."

⁷ Mir nyani bindjin, girr gapi inydi rindingiliban. Ga Godđji biliny garrwurdjili gapi rarrmalı rarrmalipm, mir wurpmi rarrmalipm djarrinyi djili gurrbi munganmirri, ga wurpi nammirri djarrinyi rarrmalipm, ga banimi miral garrkuluk dja'djarrinyban.

⁸ Ga mir ngunu miral nyani bultjidjini Giñimbirri. Mir bindjiniban balnggidjini ga milwartjini, bingili yakirri inydi malimdjiliban.

⁹ Manymak, nyani wanginiban, "Ngunu gapi nguymirri irr rirrbigi yilitjigi wurpmiñimili marrga gurrbi bandany irr nyangi." Mir bindjin, girri gurrbi bandany birraldjiniban.

¹⁰ Gurrbi bandany nyani bultjidjini Munatja, gapi djalkng nyani bultjidjini Wulan. Nyani milingili nyangini, girri marrkapdjiliban.

¹¹ Girr nyani yan kungili "Lidji djurriguw kiruwban mir minitjigining mala, bubalikinđing djalwaligining mala galinmi minitji ḥambidi walimirri, djurriguwban." Mir nyani bindjini, girri wali birraldjiniban.

¹² Munatjangir djin djurrginy kirinyban wurpi wurpi mala miri yurryarr, gurrtji, ga wali mala bubalikinđing nyim nyim kunyirri minitjigining mala ga bubalikinđing djunggi djalwaligining. Nyani nyanginiban mir bukmak butaldjiniban.

¹³ Mir bindjiniban balnggidjini ga milwartjini, yakirr warrangguwili inydi malimdjiliban.

¹⁴ Manymak, nyani God wanginiban, "Walirr, rangu, ga kata irr ngamangamadjigi nam irr yirrpigi, marrga djani milmildjigi nguli, ga djin yingarraydjigi wurpi wurpi bilidjirri, miri yakirri bilidjirri ga rarranydjarr bilidjirri, bilapilang.

¹⁵ Ga gurbili munatjali djin milmildjigi. Nyani bindjini, girri guditjimarr mala djin birraldjiniban.

¹⁶⁻¹⁷ Ga ngunupili badayala mirrpili, miri ngnung bingili wana mirrpili, nyani biliny ngamangamadjili walirr ga rangu. Mir manngibirri bilidjirri ngunukuma walirr miri bunggawa nyani djirridji giri walirr gurrgipi, ga ngunukuma rangu bintji giri ngurrguma malir gurrgipi. Ga ngunukining bilidjirri Godđji djamadjili ga ta mala girri.

¹⁸⁻¹⁹ Mir bilapilang nyani biliny yirrpini namili, marrga bil milmildjigi bapili, ga bilang badayala, ngnung bil rindigi gar malirngiri. Manymak, nyani Godđji nyanginiban mir bukmak butaldjiniban. Mir bindjiniban balnggidjini ga milwartjini, bingili ga bingili yakirri inydi malimdjiliban.

²⁰ Manymak, nyani wanginiban, "Galbi wanngi mala irr ngamangamadjigi, gapimirri djin nyinidji giri, ga waykining mala irr ngamangamadjigi girri, djin ḥunyidjirri giri namnammirrpom." Mir nyani bindjini, girri gapibi mala ga waykining mala djin birraldjiniban.

²¹ Mir nyani ngamangamadjili maypal wana wulanbi, ga wurpi wurpi mala walim girim mala gapibi, ga wurpi wurpi mala waykining girrgima. Nyani nyanginiban mir bukmak butaldjiniban.

²² Girr nyani yabulu djina wangini, "Yuwardjingpilinginyi lidji djamadjigi inydi lidji galbijdi kiri, wulanmirrpom lidji garrwurdjii kiri, ga ngilidji waykining mala lidji galbijdi kiri gurrbi munganmirri."

²³ Mir bindjiniban balnggidjini ga milwartjini, gumbirri wurpingirpm yakirri inydi malimdjiliban.

²⁴ Manymak, nyani wanginiban, "Wurpi wanngi mala irr ngamangamadjigibar mir djin gukirridji giri gurrbi munganmirri, irr ngamangamadjigi wurpi wurpi mala maypal mala, mir buluki mala, walim girim mala, ga nyim ngunupilang mala." Mir nyani bindjini, girri maypal mala djin birraldjinaban.

²⁵ Nyani ngamangamadjili wurpi wurpi maypal mala, ga bukmak wurpi wurpi mala walim girim mala. Mir nyani bindjini munatjabu mala ngamangamadjili. Ga nyani djiny nyanginiban, ga djina marrkapdjilaban.

²⁶ Girr nyani wangini, "Yulban ngilimi lim ngamangamadjigi mir ngilimibipm, ga nyani yul djina ngurrdawalangudjidji guyipilingirgi waykiningirgi maypalpilingirgi ga bukmakigidi walinyirakininingirgi."

²⁷ Marrga yul nyani Goddji ngamangamadjili mir nyani bipm, mir nyani ngamangamadjili yulnginyi marri djayal mir miligidjinginyi, gumbirr ngangiginning ga gumbirr ganiginning biliny djamadjili.

²⁸ Nyani bumir yilimbirring bilingga wanginiban, "Mala nyim pung kiri nyim galbidji kiri ga barrkirrdjidji wurpili wurpili djawalili. Bukmak mala djiny nyim djanadjanadjigi, mir maypalpilingirgi munatjabu ga waykiningirgi nampi ga guyipilingirgi gapibi djina nyim ngurrdawalangudjidji."

²⁹ Girri nyani wangini yiligima, "Mir nyim nyawi, Ngarri nyirr kumban bubalikining wali ngambulginning ga bubalikining djunggi djalwaliginning gatjinmi, ngunitjini mala dja'djarri mala djalwaliginning nyim dirradjigi."

³⁰ Ga maypalpilingirgi munatjabu waykiningirgi ga bukmak walinyirakininingirgi mala djiny irr gung yurryarr wali." Mir bilapilang wurpi wurpi walipili nyani yirrpiniiban djina, yulgii ga maypalgi.

³¹ Nyani nyanginiban ngunung miri ngamangamadjili djina, girri marrkapdjilaban mirrppmban. Mir bindjini balnggidjini ga milwartjini, gumbirr wurpingirpm ga nyani wurpm yakirri inydi malimdjilaban.

2

¹⁻² Mir bilapilang nyani malimdjili bukmak mala. Ga wurpili yakirrdji mir ingki ngamangamadjnyir, ngunung gumbirr wurpingirpm ga biling bingili yakirri, ngunukining bilidjirri nyani gandi inydi galdirrdjinaban djamangiri.

³ Djini'djineng malir nyani bultjijidjini djuyu walirr, gima ngunukiningban guldjili nyanganng djamangiri.

⁴ Bilapilang nampi ga gurrbibi djanguny mir nyalikidjny djamadjili.

Djanguny miri nyalikidjny Goddji djamadjili yul ga miyilk

⁵ Ngunukining bilidjirri nyadjidji Goddji djamadjili gurrbi ngirki ga nami, yarim wirrppm djunggi ga yurryarr djirrinnyir, wirrppm djurriginyir kirinyir, gima wirr yanginyir mayurrk munatjali. Ga wirrppm yul nyininyir, marrga ingki wari ngunupilang gaminir miri wali yirrpini gima ganbapm,

⁶ mir yirrim munatjangir nambidingir gapi buwalbuwaldjny kiriny gurrbi mungan gapiriny djarrinyi.

⁷ Ngunukining Goddji ngamangamadjili yul ngurrudawalangu, mir munatja marrngili marrga munatjabu djamadjilaban yulnginyi, girri wupwupdjili ngurrimirrppm marrga nyani ngalwartjingini kirinyban. Mir bindjini ngunung yul ngalwartjinakinining.

⁸ Girri Goddji wali ngamangamadjili, girri lamudjili bumir djimurrungir, ngunung gurrbi bultjijidjini Idin (Eden), nguli nyani yirryirrpini yulnginyi.

⁹ Ga djurriginy kiriny djunggi garray ga manymak dirradjnyirbi. Ga bingili gurrji nyani djamadjili, yagirri bilingga miri Djunggi Wanngi Gunyirbi ngunung budjirrminty dja'djarri, ga wurpi djunggi dja'djarri yagirri ngunugirki Djunggi Marnggi Gunyirbi Ngungirapibi Butalbi ga Mirkngibi.

¹⁰ Mir nguli gapi buwalbuwaldjny kirinyi balangawdjili girri wurpili wurpili mani bipini biling bingili ga biling bingili mani.

¹¹⁻¹² Wurpm mani djin bultjijidjini Pidjun (Pishon), ngunung mani wiltjnyi wiltjnyiring djawalmirrppm Abilamirrppm (Havilah) wirrwirrdjny kirinyi, mir nguli djin gamirrdjini djimuku munatjabu miri gold, ga nguli djin marriny giriny laytju mala miri rirrkiyan butal nyanyirbi ga galanyan butal nyuminirbi.

¹³ Ga wurpi mani djin bultjijidjini Giyun (Gihon), ga djining wirrwirrdjny kirinyi djawalmirrppm Kutjmrrppm (Cush).

¹⁴ Wurpi mani djin bultjijidjini Tigris, djining wirrwirrdjny kirinyi djimurruli Atjurli (Asshur) gurrbili. Ga wurpi mani djin bultjijidjini Yupratis (Euphrates).

¹⁵ Manymak, Goddji gangili yulnginyi, girri yirryirrpini gatnimirri Idin miri nyani yul lamudjigi wali ga djagadjigi gatni.

¹⁶ Ga nyani God inga wangini yulgi, "Mir nyuni dirradjigi wali bupalikiningibi gurrtjibi,

¹⁷ bil mir wurpm gurrtji dja'djarri djiligima, ingki nyuni dirradjigi ngungirapibi, mir ngunung Djunggi Marnaggi Gunyirbi Ngungirpibi Butalbi ga Mirnkgibi, mir ngunung nyuni gubidji. Ngunubilang nyuni dirradjigi ngungirapibi, mir warray nyuni balidji ngunyili yipi."

¹⁸ Manymak, gorr God gungi inydi wangini, "Mir ingki djining buṭal mir yul ngidawa nyi'nyinidji giri. Ngarri ingarr djamadjigibar balpircining."

¹⁹ Marrga nyani Goddji djamadjili wanngi mala munatadjji, mir wurpi wurpi mala maypal mala ga waykining mala, gorr inga birrungili yulgi ga nyantja yuldji yagirri djiny yirrpini kiriny rarrimali rarrimalipm. Mir nyani djiny yagirri yirrpini minydjin djirridjipm yagirri djini.

²⁰ Mir yuldji yagirri djiny gungili bukmaknginyi waykininginyi ga maypalpilinginyi, bil ingki inga manyanyir balpircining inga.

²¹ Marrga Goddji yakirri galwupini yulnginyi, lunbu darrarrmiyngili ga biliwurrwarr gaypiliban wurpmi. Gorr djidji inga minibili marrga galngi bulanggitdjilaban.

²² Biliwurrwarr bat, miyilkban nyani djamadjili Goddji ngungirapibi ngirkibi yily-imyngili yulngiri, gorr inga birrungili yulgi.

²³ Ga nyani yul wanginiban bindjiniban, "Djinimi mir ngirkibi ngirrapibi, ga munydjal munydjalpi ngirrapibi, marrga djinim ngarri bultjiji Miyilk gima nyuni gaypili galngibi yulanggabi."

²⁴ Mir bilapilang rum djiningi minydji djirridjipmban limila, mir warri ngunupilang yul djiny gubidji nyanganng gunydjirri ga ngambirri, gorr miyilk nyangangapibi galiki marrga gididjirrim bil nyinidji giri, mir wulpilipm galngi bil nyinidji giri nginipingim ga nyanimngim bil wulpilipmdjidjiban.

Yul ga miyilk bil butjir djumilidjini Godki

²⁵ Manymak, ngunu yul ga miyilk biling bil girinyi gar gurriyili, bil ingki inydi bil gunidjnyir inydi bili.

3

¹ Manymak, Goddji djamadjili nyibi maypalpili ginginyakining, bil nyani minarr mani wanginyakining mirrpm. Nyani minarr inga wangini miyilkigi, "God nyimila yan gungili mir ingki nyim dirradjigi bupalikiningibi djunggibi wali."

²⁻³ Girri miyilkdji yan bumir gaypili, "Ingki! Mir yirrim ngunung liny dirradjigi gurrtibi bupalikiningibi. Bil mir ngunung djunggi dja'djarri banimi mir ngunugiriny gorr ingki liny dirradjigi ngungirapibi gima nyani God linya wangini 'Ingki nyim dirradjigi ngungirapibi ga ingki nyim gatjigi ngunugiriny bintji nyim balidji.'

⁴ Bil ngunung minarr inga wanginiban, "Ingki nyum balidji.

⁵ Mir birral God marnaggi mir nyadjid ngunupilang nyim dirradjigi, ganydjirrdjipm marrga mil inydmil lapmiygi marrga mirkng malagi ga manymak malagi nyim marnaggi, marrga nyumbi ga nyani inydi lidji djirridjiban."

⁶ Manymak. Nguṇi miyilkdji nyangini wali buṭal dirradjnyirbi djunggimirri wirardjinginmi, ga ngunu waligi nguy djalngdjiniban ga nyani gingini mir nguni walidji gadamandjigi, marrga nyani butnyiirdjili ngunuguma djalwal gorr dirradjilaban, yili rindingili ga inga birrungili nginipingirgimi ga nyantja dirradjili grrgima.

⁷ Rirringir ngununir gorr mil inydi bil lapmiyngili marrga marnggikiningban bili. Girri galngi inydi bil nyanginiban mir inydi bil birraldjnyirdjili gar gurriyili bil girinyi, marrga bumalng mapalpili bil rarri baringili mundandji marrga gar inydi bil ngagirrdjinaban.

⁸ Djamming yabuludjini bil marrngini God yirryarrdjny kiriny biliny balpariny kiriny, marrga murruṛtmirri ingandyi bil gilgirrdjinaban.

⁹ Nyani God inga witjilinan yulgi, "Nyali nyini?"

¹⁰ Ga nyani yan bumir gaypili, "Mir ngarri nyirr marrngini murruṛtmirrp bi giriny nyininyi marrga inmarr yawngini gima gar gurriyili irr nyininyi marrga inmanydjirr gilgirrdjini."

¹¹ Ga nyantja butjalmini, "Wari ngunung inma wangini miri gar gurriyili nyuni nyi'nyininyi? Bina ngurr dirradjili ngununggirapibi gurrtji budjirrminy gatni dja'djarri mir ngunung nyirr nunggaṭmiyngili?"

¹² "Djinji miyilkiji nyuni irra djamadjili nyanibi irriny gungili djalwali ngungirapibi gurrjibi girri ngarri dirradjilaban."

¹³ Girri God inga wangini miyilkigi, "Nyimki mirikunu nyuni djamadjili mir bindjini?" Ga nyanitja wangini, "Djinim minarrti irra mani wangini marrga irr dirradjilaban."

¹⁴ Girri God inga wangini minarrki, "Gima nyuni mirrppm murgungili ngarri nyirr bulu ngurru bukmakngiri maypalpilingir. Budjirrdjipmban nyuni waliki giri, ga midjirri dirradji giri bintji giri ngurrguma.

¹⁵ Nyuni ga ngunu miyilk inydjim djabir marginidjidji, nyungung mala ga nyanngang mala inydjin djabir marginidjidji gurrkunyi. Djani gungi nyin djin balpig i bil miri nyuni djiny dirradjigi nu bunyan."

¹⁶ Girri miyilkigi inga wangini, "Nydjii ngunupilang nyuni gapalmirrpilidjidi ngunukiningban nyuni galngi djalgidjidji mirrppmban. Miri djalgidjidji kiri nyuni yidjipili mini, bil yirrim inga djalngdjidjipm nginipingirgim inma, ga nyanitji ngurrdawalangudjidji inma."

¹⁷ Girri inga wangini yulg, "Gima nyuni butjir inganydji gungili nyanimiki ga dirradjili djalwali ngungirapibi djunggibili nyirr nunggatmiyngili, munatja inma mirgidjidjiban gima mir nyungupibi. Nguy wargugugining nyuni dirradjigi wali munatjab i bintji giri ngurrguma.

¹⁸ Ingki galbi wali inma djurri giri, bil yarim galbi djindjinkili inma djurri giriban.

¹⁹ Nyuni manbing djamadjigi ngurrbirridji marrgi wali inma marrgi, yarimpim nyuni winidji munatjali, gima munatjangir ngarri nyirr djamirrdjini. Miri nyuni yarim midjirrdjini, marrga ngunyilipm ngarri nyirr winidjingilgi midjirrii."

²⁰ Manymak, ngunung yul yagirri inga Adam, ga yuldu bultjidjini nyanngang miyilk Yip (Eve) gima nyani ngurruawalangu ngambirri djina nyininyi bukmakigi yulpiligi.

²¹ Ga nyani Gunydjirrar bipini maypal girri maypaldji gilingkaldji biliny ngagirrdjini-ban.

²² Manymak, Gunydjirri wanginiban, "Ngunung yul miri marnggiban butalbi ga mirkngibi, mir marnggiban mir ngilim. Ngunubilang nyani rindinyir djalwali ngungirapibi djunggibili ngunung Wanngi Gunyirbi, dirradjnyiri, girri nyani wanngigakinjing nyininyir girinyiri."

²³ Marrga Gunydjirrar biliny bulu nguli gatningiri Idinngiri, miri nyani minydi yanliban djawalibin wurpili miri nguli bil lamudjigi wali wurpirri gurrbuwi.

²⁴ Rirringir ngunungir girri wugilinginyi nyani yirryirrpini Gunydjirrar, wugili badji nyanyirakinjing, ga nyani maltjirri djarryni gadjigirring, ga ngurri djarrkut giliwilingi mandjawak gatjini, ga ngunung mandjawak burrtjirrinnyi djarryni, marrga wirapili djani bilayili minydjin yilitjirridji djunggingir ngidjirrkngiri.

4

Kayndji minydjji bipini nyanngang gulmigipm

¹ Manymak, giliwilim bil ngurrinyi girri nyani Yip gapalmirrpilidjini. Djamingi yidjipili bungtjili, girri nguni miyilkiji yagirr yirrpini Kayn (Cain) gima nyanibi inydi wangini, "Goddji irrin yunggatjili miri yul irr marrngili yuwirdjing."

² Ga djamingi yili bungtjili djirrakay, yagirri bil yirrpini Abil (Abel). Kayn ga Abil biling galngi bil wanadjini. Nyani Abil djagadjnyi girinyi maypal bimbi mala, ban Kayn nyani lamudjny girinyi wali.

³ Guyumban mundjarr inga bil birrungili Godki Gunydjirrgirki. Miri Kayn inga birrungili nyanngapibi djamadjnyirbi wali,

⁴ ban Abil gultjigining munydjal bimbi inga birrungili, galbi yuwiridjingpili. Marrga nyani God marr inga bulanggitdjini Abilgi ga nyanngang mundjarrgi,

⁵ bil Kaynnyi biri yirrpini ga nyanngang mundjarr biri yirrpini girrgima. Girri Kayn nguy murmurjdiliban ga bumir nyirrnyirrdjiliban.

⁶ Marrga God inga wangini Kayngi, "Nyimki nyuni nguy margindjini, nyimki bumir nyirrnyirrdjili?

⁷ Miri warray ngunubilang gadjigarr butal nyuni bargi, girri nyuni marrkapdjidjibin. Bil ngunubilang nyuni mirgi djamadjigi, nyungung mirgpili galngimirri inma ngu'ngurri nyin wanngi dutjigi miri mirrir. Bil gingga yirrpini mirgpili nyuni bilang biri yirrpigi, marrga ngunugirri gadjigarr mirkngi miri ngunung nyuni gubidjiban."

⁸ Manymak ngunungir girri Kayn inga wangini gulmingirgipm Abilgi, "Il giruwban ngunyili murrurrtilli." "Ngiy manymak." Biling bil giriny nyininyi murrurrtmirrppm, girri Kayn minydi bipiniban gulmigipm.

⁹ Ga guyumban God inga wangini Kayngi, "Nyaling inma gulmigipm Abil?" Nyani yan bumir gaypili, "Ingki irr marnggi! Ingki ingarr djagaginiñ bina?"

¹⁰ Girri nyani inga wangini, "Mirikunu nyuni mirrppm djamadjiliban! Nyuni butjir inydi guw! Nyungung gulmigirang budì nyani irra witjim kirrimban munatjangir.

¹¹ Miri gumbirrdji nyunguri nyuni bipini, marrga nyanngang budì rarrmiyngili munatjali, marrga ngarri nyirr bulu ngurriban munatjangir.

¹² Miri nyadji ngunupilang wali nyuni lamudjigi, yarim wirrppm inma djurri giri wali. Yarim miri nyuni mulkuwu gu'gukirridji walikiban, gurrbi wirrppm inma djirridjiban."

¹³ Girri Kayn inga wangini, "Djining bulu ngurriginyirbi irr mini giri djiningi miri biri manbi irra gungan mirrppmi.

¹⁴ Miri djini'djining nyuni irriny bulu nguli munatjangir, ga ngarri bilang inmanydjirr gilkilgirrgiban, miri nguy wargugugining mulkuwu minydi irr gukirridji walikiban, marrga wili ngunupilangir irriny manyanggir irriny bungi!"

¹⁵ "Ingki birral," Gunydjirri inga wangini, "bilang wili ngunupilangir nyin bunyiri, ngunuguma ngarritja warray yarti dapilidjnyir mirrppmguma." Rirringir ngunungir girri nyani mak inga yirrpini Kayngi galngimirri, marrga wili ngunupilangir mildji bunyiri, mir ngunung mak djin nyanyiri, girri ingki djin bunyiri nyanyini.

¹⁶ Manymak, rirringir ngunungir girri nyani Kayn gubini, ga bilayili giralibin. Nguli gawarrkamirri gukirriny girinyban wurpirri gurrbuw Nud bumir djimurrumirri.

Kaynang gurrtiginingirang mundan

¹⁷ Manymak, biling giliwilim bil ngurriiny Kayn ga nyanimngim inga, girri ngunugirri miyilk gapalmirrppilidjini, yidjipili miniginy kirinyi yagirri Inuk (Enoch). Ga nyani Kayn manyangini gurrbi, girri galbi bala' mutjpiningili nguli, ga gurrbi wana yagirri yirrpini djining ngurrguma mir nyanngang walkiripm yagirri Inuk.

¹⁸ Manymak, Inuk walkiripm Irad, djabiringir ngunungir girri Iradang walkiripm Mayudjayil, djabiringir ngunungir girri Mayudjayil walkiripm Mitjutjayil, ga djabiringir ngunungir girri Mitjutjayilang walkiripm Lamit.

¹⁹ Lamitj biliny marrngili nyanimwilingim bingili biliny galini, wurppm yagirri Ada ga wurpi yagirri Djila.

²⁰ Manymak, bingili yutjuwili bil bungtjili Adangpibi. Mir milimiti bungtjili yagirri Djabal, ga nyani ngurrdawalangu djina yulpilingirgi miri wiñinimirri djin ngurriiny mala ga djagadjiny girinyi mala buluki.

²¹ Ga nyanngang gulmingim yagirri Djabal, nyani ngurrdawalangu djina wuyimbal gatinakinining djina malagi, mir nyim ngunupilang djani djin gatjini mir wuyimbal, bilma, manikay, bilapilang.

²² Ban ngunugirri miyilk Djila, nyanngangpibi milimiti yagirri Djabal-Kayn. Ga djini yuldji girri djamadjny girinyi miri djimuku mala manbing wurpi wurpi. Ga nyanngang gadingimi yagirri Nama.

²³ Manymak, nyani Lamitj bilingga wangini nyanimwilingirgim, "Ada ga Djila irriny nyim marrngirry yan, butjir irranydjim guw miri irr djabarrkdjigibin. 'Miri nyani irriny gatpurrdjili marrga ngarritja irr bulkitj marrngili nyanyiny irr bipini, miri yawirrinnginyi irr bipini gima nyani ngurrum irriny gatpurrdjili.'

²⁴ Mir ngunubilang wirinyi Goddji yarti dapilidjigi Kayngi warray, miri mirrppm yili ngarribi irr bintji ngurrguma irr yarti dapilidjigi."

²⁵ Manymak, bilingi Adam ga Yip yili bil ngurriinyi, ga yili nyani gapalmirrppilidjini, ga guyumban yidjipili bungtjili. Ga yagirri yirrpini Sit, djining yagirri mayaligining miri 'Gumi' gima nyani Goddji gungili yuwiridjing yidjipili miri ngunung ngurrguma Kayndji bipini.

²⁶ Manymak, Sitang walkiripm bungtjili, ga yagirri yirrpini Inutj. Ga miri Inutj bilidjirri yulpilingir djin ngurr yirrpini miri Godnyi djin butjalmini girinyi yagirrmirrppm Yawaymirrppm.

Adamang gurrtigining mundan

¹ Djining djangyang Adamang gurrtigining mundandjji. Manymak, baman pirr nyadji Gunydjirrar ngamangamadjili yulnginyi, mir nyani pibm ngamangamadjili miri God.

² Bingili nyani djamadjili gumbirr ngangigining ga gumbirr ganigining. Nyani djamadjili girri yabulu bilingga wanginaban, ga yagirri wana biliny bultjidjini miri Yul.

³ Manymak. Nyani Adam ngurrum gatjini galbi gunmal ga rarranydjarr (130 years) nyadji ngunupilang bungtjili walkiripm inga mir nyani bipm, ga yagirri yirrpini Sit, girri nyibi mala gatjini walgurwalgur mala inga galbi,

⁴⁻⁵ ga rirringir ngunungir girri Adam nga'ngalwartjingini kiriny gunmal ga rarranydjarr galbi galbi (800 years) bilidjirri, girri nyani wirrdjiniban.

⁶⁻²⁰ Manymak, nyani Sit walkiri marrngili Inutj, ga Inutj walkiri marrngili Kinan, ga Kinan walkiri marrngili Mayalalil, ga Mayalalil walkiri marrngili Djariid, ga Djariid walkiri marrngili Inuk. Djiniwili yulpili djin nyininyi djin bininy ngurrguma wanngigakinining miri Adam, ga djin walkiri djamini galbi djina walguwalgur nyibi mala.

²¹⁻²³ Ga Inuk gunmal ga rarranydjarr gatjini galbi, girri walkiri marrngilaban Matjutjila (Methuselah). Ga nyani Inuk walkiri djamirrdjini walguwalgur, ga bininy ngurrguma nyininyi wanngigakinining miri Adam.

²⁴ Ga nyani Inuk inga maltjili Gunydjirrgirki, ga bil giriny nyininy giliwilim, girri Inuk manydijirri gima Gunydjirrar minyndji djamirrdjini.

²⁵⁻²⁸ Manymak, Matjutjila walkiri marrngili Lamitj (Lamech), ga Lamitj walkiri marrngili,

²⁹ ga yagirri nyani yirrpini Nuwa. Miri djining yagirri mayaligining miri 'Laydjigi' gima nyani bindjin nyanngangi "Mir Gunydjirrar litja mirgidjnyirdjili munatja, ban djini yidjipilir litjny gunggatjigi il ngalwartjingilgi djamangir manbingir."

³⁰ Rirringir ngunungir girri Nuwa bungtjili, nyani Lamitj ngalwartjingini kiriny galbi gunmal ga rarranydjarr, girri wirrdjiniban. Ga nyani bininy ngurrguma galbi yutjuwili djiny gatjini.

³¹ Ga Lamitjang walkiripm Nuwa nyani gatjini galbi galbi gunmal ga rarranydjarr (500 years), girri djiny walkiri djamirrdjini warrangguwilingim, Djim, Yam, ga Djapit, Nuwang walkiriwilingimi.

6

Bukmak yulpili djin nguy midjirrgindjili

¹ Manymak. Ngunukiningi Nuwang bilidjirri, yulpilingir djani mala djin buny kiriny galbiwili, marrga yul mala djin nyininy kiriny galbi, wurpirri wurpirri gurruwi. Ga miyilkpili djani djal malimalingpili mirrppmi.

² Manymak. Godang djamaginpilingir wugilipilingir, djiny djin nyangini ngunugirri miyilkpili djal malimalingpili, ga djina djin djalngdjiniban. Marrga miri ngunungi djina djin djalngny kiriny, djiny djin marrny kirinyban.

³ Girri God Yaway inyndji wanginban, "Ngirrar marrdji ingki djiny irr watjarrdi giri marngiri bintji giri ngurrguma yulpilinginy. Miri ingki djiny irr namkatdjingil giri yulpilinginy, gima miri djani yarim djin galngipili. Ngarri djiny irr gung marri warrangguwili gunmal ga rarranydjarr (120 years) marrga inyndjin birrindjingilgi miri gadjigarr djunupa djin gurrrpigi."

⁴ Manymak, ngunukining Nipilim bapururr mala djin birraldjini djili gurbi munganmirri, miri mirrppm giliwipili yulpili. Miri rirringir ngunungir girri Godang djamaginpilingir wugilipilingir djiny djin djamirrdjini miyilkpili, marrga ngunungiri yidjipilpili djina djin bungtjny kiriny, ngunukiningban djani birraldjiniban ngunukuma Nipilim bapururr. Ga rirringir ngunungir girri djin walkiri djamini kiriny yarim yalkuy, ga miri ngunitjini mala djani yagirr wanapili mala bulalkitjpi mala, bilapilang.

⁵ Manymak, nyani Gunydjirrar djiny nyangini yulpilinginy miri djin ginginy girinyi mirkngpili, miri bininy kiriny ngurrguma miri gadjigarr mirkunu djin gurrrpini girinyi.

⁶ Girri nyani djina nguy ginirgindjini gima djani djin gurrrpini gadjigarr mirkngi, marrga mirrppm nyani nguy wargugudjiniban.

⁷ Ga Yaway inyndji wangini, "Gurbi mungan irr garrkulukdjigi miri yulpili bukmaknginyi irr djingirgabon, mir yul, maypal, walinyakining, ga waykining, djiny irr djingirgi mala bukmak, gima djinarr nguy mirgidjini miri ngurrwakng djiny irr djamatdjili."

⁸ Ban nganngangni ngunung yul Nuwa, nyani God Yaway inga marr bulangitdjini.

⁹⁻¹⁰ Djiningi Nuwang walkiriwilingim yagirrpili djini, Djim, Yam, ga Djapit. Ngunukuma yul Nuwa nyani djuburr djunupa nyininy girinyi ngunukining nyanngang bilidjirri. Nyani yarti nyanyi girinyi Godnyi, miri djuburr garray girinyi.

¹¹ Ban nyibiwili yulpili djani nguy midjirrginpili milimirri Godar. Miri djili gurbi munatjamirri bukmak djin nyininy girinyi rumnyirringi butilnyirringi.

¹² Ga nyani Gunydjirrar djiny nyanginiban miri nyaliki djin murkuny giriny gadjigarr djina, gima bukmak yul mala gadjigarr ngurrum djina wildjili.

¹³ Manymak, nyani God inga wangini Nuwagi, "Djinimirri irr gingini, bukmak mirgipili djiny irr djingirgabon, gima djanngapibingir djin mirgidjiniban bukmak mala. Marrga

ngidjirrkngban djiny irr buwayaknyirdjigiban bupalikininqinyi, miri yulpili ga gurrbi mungan.

¹⁴ Nyuni ngurr yirrpigaban djamadjigiban mitjiyang wana bukulumbak, ga manymakdigi djunggili manymakdji. Ga nambidi nyuni mutjinigi gulmung rarrmali rarrmalipm, girri galanyindji nyuni ngamirrgi nambidi ga gar gurryili.

¹⁵ Miri djinimirri nyuni mutjinigi ngunung mitjiyang. Giliwiling nyuni djamadjigi miri 150 inydi bala ngurri, ga budjirri mal giri 25 inydi bala ngurri, ga ɻamili djinining djaka miri gurrtji wurpmi giliwiling.

¹⁶ Ga milak yirrpi kiri raymirrppi ngidjirrkng nami, ga djabigi yirrpigi banim lurrkinmirri, ga warrrngguwili bilibiligili djarrpindjingilgi nambidi. Miri bilapilang nyuni djamadjigi ngunung.

¹⁷ Ban ngirrange, ngidjirrkngban gapi wana ngarri yani bapili gurrbili munatjali, marrga irr buwayaknyirdjigi bupalikininqinyi ngalwartjinakininq mala, bukmakban irr djingirgi djili gurrbi munganmirri.

¹⁸ Bil ngilidjarki ngarri lidjarr yirrpigaban murr randinirbi, marrga lidjny irr wanngidjnyirdjigi, mir warray lidji ragi mitjiyangili, nyunibi, ga nyungung nyanimngim, ga walkirkwilingim inma djin ragi, ga walkirkwilingim nyanimwilingim djina djin ragi girri.

¹⁹ Ga guyumban wurpi wurpi mala maypal djiny gangban nyunguli ngunyili mitjiyangili, biling bingili biling bingili biliny gang maypal yul ga miyilk giliwiling.

²⁰ Miri wurpi wurpi mala bupalikininq nyuni kurtjigi, waykining, ɻukining, ga walinyakininq, bingili nyunguli bil ragi marrga wanngi bil nyinidji ngulu.

²¹ Ga wali djina lidji kurtjigi rarrmali rarrmalipm ga ngilidjang girrgima, "bindjin God inga wangini Nuwagi.

²² Girri Nuwa butjirgindjinibar, nyani djamadjiliban yarim miri Goddji inga yan kungili.

7

Nyunan wana bi yulgungili

¹⁻³ Manymak, girri Nuwadji djingiringiliban mitjiyang miri galbi gunmal ga raranydjari djadjuditj (100 years). Ngunukiningban Gunydjirr inga wangini, "Rawban ngunyili mitjiyangili, nyunibi ga nyungung gurrtigining mala, gima nyunibipm nyininy girinyi djuburr djunupa. Maypal mala nyuni djiny yagirrgiban, yarang mala ga nunggatmiyinbirbi mala maypal djiny yagirrgi, wurpm wurpm nyuni biliny gangi nunggatmiyinbirbi bili, ban bingilipili, miri gumbirr wurpingirpm ga biling bingili nyuni djiny birrugti yarangpili maypilpili, ga yili nyuni bintji ngurrguma waykiningirgi miri galbi nyuni birrugti.

⁴ Gumbirr wurpingirpm ga biling bingili yakinri bilidjirri ngarri minydi irr yanibar gapi wana, ga nyani rikidji kiri miri 40dji maliri ga manngibirri bintji ngurrguma, marrga djiningiri munatjangiri bupalikininqinyi djiny irr buwayaknyirdjigiban, miri warrpam irr ngamangamadjili ngurrgumi.

⁵ Girri Nuwa butjirgindjinibar miri God Yaway inga wangini.

⁶ Nuwa ngurrum gatjiddini gumbirr wurpingirpm ga yili wurpm gunmal ga raranydjarr mundan (600 years) ngunukining bilidjirri ngunung wunggutj yulgungili.

⁷⁻¹⁸ Manymak, girri Nuwa ga nyanngang gurrtigining mala djin ragiliban mitjiyangili nambidili. Girri yilimirri ngunugirri maypal djin ranj kiriny mitjiyangili Nuwali. Djin ranj kirinyi, girri gumbirr wurpingirpm ga biling bingili yakinri djin guldjini ranjirngir, girri Goddji rarrri djina minibili ga manbidjnyirdjiliban. Rirrning ngunungir girri mayurrk wana rikini, ga yuwirdjing djatjapili muy inydi bipini galbi galbi, marrga gapi galgalmiyin kiriny ga buwalbuwaldjny kirinyi. Miri 40dji yakirrdji rikiny kiriny, gapi buwalbuwaldjny kiriny marrga ngunung mitjiyang gilitjiliny kirinyban.

¹⁹⁻²⁰ Ga nyunaa buwalbuwaldjny kiriny marrga ngagirrdjini bukal bupalikininqi ga yili ngunyilatjuy buwalbuwaldjny kirinyi.

²¹⁻²³ Ga bupalikininq wanngi mala djin balinibar, miri bukmak waykining, ɻukining, walinyakininq, ga yulpili, miri bupalikininq djin gukirriny girinyi mala djin buwayakdjiliban.

²⁴ Yarim nyani Nuwa wanngi nyininyban, ga nyanngang gurrtiginpili mala ngulu mitjiyangmirri.

²⁵ Ga ngunung nyunaa miri gumbirr wurpingirpm rangu dja'djarrinyi.

8*Gapi wana munatjangiri wirrpildjini*

¹ Manymak, ingkibān Goddji marrbinir Nuwany ga maypilpili nguli nambidi mitjyangmirri. Waṭi maṇbingi galmini djina yanali Goddji, marrga gapi baltjny kirinyban.

² Ga ngunugirri dјatjapili muy inydji minibili, ga guldjili mayurrik rikinyirngir.

³⁻⁴ Marri djayal gapi ba'paltjny kiriny, marrga wurpm rangu djadjuditj ngunukining mitjyang inydji mungan yirrpini bukilmirri yagirri Ararat gurrbuwi.

⁵ Miri bininy kiriny ngurrsguma gapi baltjny kiriny yili warrnguwili rangu girri bukal gunji yulgungiliban.

⁶⁻⁷ Manymak, Nuwa yili marrkangili rangu wurpm, girri rarrī lapmiyngili ga wakwak yanliban. Ga ngunung wakwak wirrkirrkny walinyi bil wirrpm manyanyir gurrbi bandany.

⁸ Girri wurpi nyani marrngili mukumbul yanali, ga ngunung mukumbul wirrkirrkny walinyi marrga nyangini bilang gapi wirrpildjnyiri.

⁹ Bil ngunung mukumbul ingki manyanyir burrdjing munatja, marrga wininiban ngunyili mitjyangili. Nuwa djarrtjirr ngurrinyini, gatjidjini marrngili girri gangili nambidili.

¹⁰ Ga gumbirr wurpingirpm ga biling bingili yili yakirri marrkangili, girri bindjini ngurrsguma yanali mukumbul ngunungir mitjyangir.

¹¹ Ga mukumbul wininiban mitjyangili walirr bunyin inydji yirrpini kiriny, rarrdji dirradjili bumalng mapal yuwardjing. Marrga Nuwa marnggiban miri gapi wirrpildjny kirinyban.

¹² Ga gumbirr wurpingirpm ga biling bingili yakiyili yili marrkangili, girri yili yanali mukumbul ga ingkibān yili ngunung bi wiñinyir inga Nuwagi.

¹³ Ngunukining gapi wirrpildjny kiriny munatjangir nyadjid Nuwa ngurrum gatjidjini 601 gunmal ga rarranydjarr. Girri Nuwa gilingkał yilbirtjili namngiri, ga milingiliban bilang gar gurriyilili djin giri, bil nyani nyangini miri munatja bilbalngipm.

¹⁴ Ga djani marrkangiliban bingili yili rangu djin nyininy kiriny mitjyangmirri, girri munatja burrdjidjinibān.

¹⁵ Manymak, munatja maṇbidjini, God inga wangini Nuwagi,

¹⁶ "Gar gurriyili minydi yulgubwan, nyuni ga nyungung gurrti mala.

¹⁷ Ga djiny birrugibān ngunuwili maypilpili gar gurriyilili, marrga djani inydjin barrkirrdjidjibān, mala djin bungi marrga djin galbidjidi djili gurrbi munganmirri."

¹⁸ Girri djani djin yulgungiliban, Nuwa, ga nyanngang gurrtiginpili,

¹⁹ ga ngunukuma maypilpili, maladji ga maladji djin yulkuny kiriny bubalkining maypal nukiningi ga waykiningi minydjin gi'kirinyban.

²⁰ Manymak, rirringir ngunungir girri Nuwadi gunkurtjnyirdjili rirrkiyan wana, girri yip yirrpinibān Gunydjirrgirki. Girri ngunuwilangirangpibi yarangbi maypilbi ga waykiningibi nyibiwili nyani rindilali, djiny bipini, rirrkayinmirri djiny gilibili, girri djiny burrtjidjinibān marrga bumir girrbigi Gunydjirrgirinyi.

²¹ Ga ngunungiri ngirimbiy burburdjny kirinyi, marrga Gunydjirrar nyumirrdjinibān ngunungi bunggan yabuludjnyirbi, ga nyani marr dapilidjilibān, marrga nyani inydji wanginibān, "Ingki yili ngunupilang mirgi irr djamadjigi djinarri djanngar mirgidji yulpilngirang. Miri birral bubalkining yul ging girrimipm mirkng mala, ngunukiningir yidjipi bilidjirringir ginginyirbi inga yarim mirgidjny girinyi munguyipm, bil ingki yili djiny irr buwayaknyirdjigi yul ga wurpi mala wanngi mala, miri djinimirri ngurrum djiny irr bindjini.

²² Miri bilang djining gurrbi ngirkī dji'djarri nyini, lamudjnyirbi bilidjirri ga butnyirdjnyirbi bilidjirri, murmurjnyiring bilidjirri ga miñ bilidjirri, gunmal ga rarranydjarr, djarribir ga malir, ingki djin gułdijigibān wararray."

9*Goddji murr rangirri Nuwany*

¹ Manymak, Goddji yabulu djina wangini Nuwagi ga walkirwilingirgim, ga djina bindjini, "Mala galbi lidji bungi, mala inydji lidji galbidjī kiri, marrga lidji barrkirrdjidjibān wurpili gurrbili.

² Bubalkining maypal ga waykining djani lidja djin yawngidji giri, ga guyi girrgima, ga gumbirli lidja djiny irr galbuli.

³ Bubalkining maypal wanngi lidji dirradjigi, ngarri lidjny irr gungban bukmak miri ngunung mala lidjny irr gungili ngurrwagi walipili.

⁴ Bil miri djanggu budigining ingki lidji dirradjigi.

⁵ Miri bilang wili ngunupilang budi lidjny maltjarrkang marrga lidji balidji, girri ngarri ngunugirinyi yarti irr dapilidjigi. Ga ngunubilang maypaldji bungi yulnginyi, irr yarti dapilidjigi girrgima, miri yuldjii ngunukuma maypal bintji ngurrgima bungi.

⁶ Miri bilang wili ngunupilang yulnginyi bungi, wurpilitja yuldjii bintji ngurrguma ngungirinyi bungi, gima ngarri ngamangamadji yul miri ngarribipm."

⁷ Nyuniban mala bungi marrga yulpili djani mala inydjin ngurri djin galbidjidji.

⁸⁻¹¹ Girri Gunydjirri djina wangini, "Djinigi mur randinirbi lidjny irr gunji lidjarr yirryirrpigi, ngilidjang ga djanngang ngunung yulpili djin bungtjigi djadjuditj, ngunyili yipi djirridjipm bintji ngurrguma, ga miri maypilgi, nukiningirgi, ga waykinningirgi djiny irr gunji djiniginy murr randinirbi, gam'. Ingki yili miri ngarri buwayaknayirdjigi maypal ga yul dili gurrbi munganmirri, ingki yili nyuñan wurpi irr yani bapili miri lidjny irr djingirgi.

¹²⁻¹⁷ Namba irr yirrpi giri nammirri giñimbirimirri, irr djir'wakdji giri, ga ngunukuma namba nyani minyddji djirridji miri mayaligining ngilidjang, marrga limiliny gunji bilmiygi djining murr randinirbi, bilpilang. Nyadji ngunupilang mangurr bi giri, ga inyddji manymakdji giri djir'wakdji giri, ngarri ngunung irr nyangban, miri ngunung irriny gungigindjigi ngirrang murr randinirbi, marrga ingki yili irr yani nyuñan wana miri lidjny bungi. Miri bilapilang irr yirrpigi ngunukuma namba nammirri marrga irr gingidjiban ngilidjangban."

Nuwa ga nyanggang walkirwilingim

¹⁸ Manymak, walkiriwilingim Nuwang djin yulgungili mitjiyangngir Djim, Yam, ga Djapit, ga Yamang walkiripm yagirri Kanan.

¹⁹ Djiniwilingir yulpili djin barrkirrdjini bukmak wurpili gurrbili.

²⁰ Manymak, nyani Nuwa munatja djamaginiŋgi. Nyani ngurrdawalangudji miri lamudjili gambilkili.

²¹ Djungapm nyani djamadjili nganatji, dirradjili, girri babakindjiniban, miri gar gurriyili ngu'ngurrinyi wininmirri.

²² Ga Yam nyangini gunyddjirripm gar gurriyili ngurrinyi, ga wuwwilingim djiny butjirgindjili.

²³ Girri biling Djim ga Djapit mirikal bil marrngili, burrdjipm bil gangili, mungandjipm bil winini, girri gari bil ngagirrdjini Nuwang. Ingkibar bil nyanyiri nyanggang gari.

²⁴ Guyumban Buña binygadjini, ripirrdji gubini, ga marnggidjini miri Yam nyangini nyaniñin gunyddjirripm gar gurriyili ngu'ngurrinyi.

²⁵ Ga nyani Nuwa yan mayaligining inga wangini Yamgi marrga gunyambi birraldjidji, nyani bindjin, "Djinining birraldjidji gunyambi, nyungung walkiripmngirang, nyani ingki djjirridji yagirr wana, bil yagirr nininidjidi, miri djamaginiŋgi djina wuwwilingirgim."

²⁶ Ga yili Nuwa djina wangini walkirwilingirgim, "Lim djaltjibigi Yawaynginyi yagirri, God Miligidji Djimang. Kanan nyani djina djamaginiŋgi nyibiwili.

²⁷ Goddji gurribi rirrbigi Djapitgi marrga nyani nyinidji giri nyanganar Djimngirar wininmirri, ga Kanan djamaginiŋgi bilingga."

²⁸ Manymak, rirrngrini nyuñanngir Nuwa wanngi nyininy 350 gunmal ga rarranydjarr,

²⁹ miri bukmak gunmal ga rarranydjarr Nuwang 950 gatjidjini, girri nyani wirrdjini-ban.

10

Nuwang gurrtiginingirang mala mundan

¹ Manymak, djining djangun Nuwang gurrtiginingirang mala mundan. Djim, Djapit, ga Yam, djiniwilitji mala djin buny kirinyi rirringir nyuñanngir, ga djining djanguny bultjigi djanngang gadjigarr.

² Djining Djapitang gurrtiginingirang mala gadjigarr (ga nyani Djimang gulmingimi). Guma, Maguk, Maday, Djaban, Tubal, Midjik, ga Tiratj, ngunuwili Djapitang walkirwilingim.

³ Ga Gumang walkirwilingim, Atkinatj, Ripat, ga Tugama.

⁴ Ga Djabanang walkirwilingim, Yilitja, Tatjtitj, Kitim, ga Rudanim.

⁵ Djinikirang yulpili mala djin barrkirrdjini wurpili wurpili gurrbili mala, ngidjirrkng gapi djalkngimirri djin gurribidjili, djal dambimirri ga djabir burringi, wurpi wurpi mala yani djin wanginyi.

⁶ Djining Yamang gurrtiginingirang mala gadjigarr. Kutj, Yidjipt, Put, ga Kanan.

⁷ Ga Kutjang walkirwilingim, Djiba, Abila, Djapta, Rama, ga Djaptika, ga Ramang walkirwilingim Djiba ga Didan.

⁸ Manymak, wurpi walkiripm Kutjang yagirri Nimrut. Nyani yagirr wana yul, ngurrdawalangu djina wurpi wurpigi malagi.

⁹ Nyani djambatj mirrpm maypilgi milbimirri Godang Yawayang, marrga yulpili djin wanginy giriny nyanngangi djin bininy giriny, "Miri Nimrut, mirrpm djambatj maypilgi milbimirri Godang Yawayang."

¹⁰ Warrnguwili gurribi wana nyani mutjpiningili, wurpm Babilun (Babylon), wurpi Yirij, ga wurpi Yakat, djiniwili gurribi wana djarrinyi gurrbuwi yagirrmirri Djinar (ngunung Iraq djawai).

¹¹⁻¹² Ga ngunungir gurrbingir Djinarngr yul girali yagirri Atjur. Ga nyani Nimrut mutjpiningili gurribi wanapili djiniwili, Niniba, Riyubutir, Kala, ga Ritjin.

¹³ Manymak, Yidjipt nyani gungi bilagaping djina wurpi wurpi malagi, miri Ludim mala, Anamim mala, Liyabim mala, Naptuyim mala,

¹⁴ Patrutjim mala, Katjiluyim mala, ga Kapturim mala. Ga ngunukuma Kapturim yulpili djanngapibi wurpi mala birraldjili, miri Pilitjayin (Philistines) mala.

¹⁵ Ga Kanan walkir marrngili yidjipilpili galbi, yagirrpili Djaydun nyannang milimiti, girri Ngitj, ga wurpiwili. Ngunitjini, mala inydjin bipini miri, wurpi wurpi mala bapururr, yagirrpili

¹⁶ Djibutjyat (Jebusites mala), Amurayit (Amorites mala), Girgatjyat,

¹⁷ Yibayit (Hivites mala), Arkayit, Djinayit,

¹⁸ Arbadayit, Djimarayit, ga Yamatayit. Ga guyumpiliban Kananang gurrtigining mala inydjin garrwurdjili,

¹⁹ marrga ngunungiri gurrbingir Djaydunngir ga djiningiri gurrbingir Gadjangiri rarri gapimirri djin gurrbidjili, ga ranni burringi djin gurrbidjili ngunung yagirrpili gurribipili Djudum, Gumurra, Adma, ga Djibuyim ngidjirrkng Latja gurribi.

²⁰ Ngunitjini girri Yamang gurrtigining mala, miri wurpi wurpi yulpili, wurpi wurpi bapururr, wurpi wurpi yan djin wanginyi, ga wurpirri wurpirri gurrbuwy djin nyininyi.

²¹⁻²⁴ Djiningi Djimang gurrtigining gadjigarr. Djimang walkirwilingim yagirrpili, Yilam, Atjur, Arpatjat, Lud, ga Aram. Aramang walkirwilingim yagirrpili, Yutj, Ngul, Gitir, ga Matj. Arpatjat walkir marrngili Djila ga Djila walkir marrngili Yibir. Bilapilang miri Djim nyani gungi bilagaping inga Yibirgi, ga Djim nyani Djapitang wuwngimi.

²⁵ Manymak, Yibir walkir marrngili yutjuwili bingili Pilik ga Djuktan. Ga Pilik bilidjirri bukmak djin barrkirrdjiniбан.

²⁶ Ga Djuktanang walkirwilingim yagirrpili, Almadat, Djilip, Yatjamabit, Djirar,

²⁷⁻²⁹ Yaduram, Yutjal, Dikla, Yubal, Abimayil, Djiba, Yupir, Yabila, ga Djabap.

³⁰ Djanngang gurribi djabir burri bumir djimurruli.

³¹ Ngunitjini girri Djimang gurrtigining mala, miri wurpi wurpi yulpili, wurpi wurpi bapururr, wurpi wurpi yan djin wanginyi, ga wurpirri wurpirri gurrbuwy djin nyininyi.

³² Miri ngunung ngurrguma Nuwang gurrtigining mala, ga nyalinggirabipici djini wurpapi wurpapi gurribibi. Miri djiningin ngurrdawalangungir yulpili djin barrkirrdjini wurpili wurpili gurribili rirringir ngunungir girri nyunaanggiri, girban.

11

Yan wurpi wurpi Godji djiny gungili yulpili

¹ Manymak, ngurrwakng baman pirr bukmak djin wanginy girinyi wurpm yan ga wurpm djilang.

² Manymak, nyibi yulpili bi djin girinyi djimurrungir, ga djin birraldjnyirdjili gurribi wayala mirrpm lambirring, girri miri ngulguna djin gurrbidjili gurribi yagirri Djinar.

³ Ga djina djin witjili, "Bi lidji giruwi bapili gurrrbil, ganamba lim marrgi, lim dutjigi, lim batjigi marrga manbijidji. Marrga lim mutjpinigi bala' galbi." Djin djamadjilinan galbi batjinirbi manbipili, ga ngaditjalidji mulngdji munatjabir (bitumen) djin mapirrdjini, miri bilapilang djin mutjpiningili bala'.

⁴ Rirringir ngunungir girri djina djin witjili, "Bi lidji giruwan, lim mutjpinigi gurribi wanaban, ga lim mutjpinigi wurpm bala' gungi giliwili djaydjaying ginimbirrimirri. Yagirri inydi lim wanadjigban bintji inydi lim garrwurdjigi wurpili wurpili gurribili."

⁵ Manymak, God Yaway bi djundjini marrga nyangi ngunung gurribi wana ga ngunung gungi giliwili miri windi djakulu.

⁶ Girri Gunydjirri Nampi wanginban, "Ngunubilang inydjin bumir gurkung marrga giliwilim djin djamadjigi nyim ngunupilang djin djalngdjidi, miri bintji ngurrguma djin djamadjigi, gima miri wurpm mala djini ga wurpm yan djin wang girimi.

⁷ Ma', lim djundidjiban, marrga yan wurpi wurpi djinyi lim gungi, marrga inydjin bumir marrbigi yan."

⁸ Girri nyani God bi djundjini, ga djiny gungili wurpi wurpi yan, marrga inydjin garrgarrpinibyan. Ga nyani djiny garrwurdjili wurpili wurpili gurrbili djin giriliban, ga djani djin guldjiliban bala'ngiri mutjpininyirngir, miri ingkibar yili djin mutjpininyir bala'.

⁹ Ngunitjini yulpilingir ngunung gurbi wana djin bultjini giriny Babil gima ngunung yagirri mayaligining miri 'butjir mal balpinyirbi'. Yarimban nguliguma djani inydjin garrpini wanginy kirinyban, marrga djin butjir mal balpinyirngir, ga ngununggiri djin barrkirrdjini wurpili wurpili mala gurrbili djin girali dili gurbi munganmirri.

Djimang gurrtingining gadjigarr ngunyili Abramili

¹⁰ Manymak, djining Djimang gurrtingining mundan. Djim nyani ngurrum gatjidjini 100 gunmal ga rarranydjarr ngunukining nyani walkir marrngili Arpatjat, bingili gunmal rirringir ngunungir girri nyunaŋngiri.

¹¹ Rirringir ngunungir girri Arpatjat bungtjili, nyani Djim yili gatjidjini 500 gunmal ga rarranydjarr, ga walgurwalgur gatjidjini galbi.

¹²⁻²³ Arpatjat nyani walkir marrngili Djila, ga Djila walkir marrngili Yibir, ga Yibir walkir marrngili Pilik, ga Pilik walkir marrngili Riyu, ga Riyu walkir marrngili Djiruk, ga Djiruk walkir marrngili Nayur. Ngunitjini mala yulpilingir djin walkir djamini galbi yidjipilpili, ga miri djin nyininyi wanngi giliwilingakiningi.

²⁴⁻²⁷ Ga Nayur walkir marrngili Tira, ga ngunukining Tira gatjidjini 70 gunmal ga rarranydjarr nyani ngurrum walkir marrngili warrnguwili walkirwilingim, yagirrpili djina Abram, Nayur, ga Ngaran. Ga Ngaran walkir marrngili Lut.

²⁸ Miri ngunukining bilidjirri Tira nyininyi, nyani Ngaran baliniban nyanganngarpni gurrbuwi mutjing inga, ngunung gurbi wana yagirri Ngur nguli ngunung Kaldiyang malang djawal.

²⁹ Abram ga Nayur biling bil marrngili miyilk mirrpili biliny bili nyanimwilingim. Abramang nyanimngim yagirri Saray (Sarai), ga Nayurang nyanimngim yagirri Milka. Milka nyani Ngaranang walkiripm, ga Milkang gadingim yagirri Yitjka.

³⁰ Ga Saray, Abramang nyanimngimi, nyani budjirr yidjipilinyirring.

³¹ Manymak, djani djin yilitjini wurpili gurrbili bilay bilayili, Tira, ga nyanganng walkiripm Yipram, ga nyanganng marratjamirringipm Lut, ga Saray Abramang nyanimngim. Djin gubini gurrbingir Ngurngir marrga djin giri bunir djunupa Kananili gurrbili. Bil banimi Yaran gurbi nguli djin gurrbidjili, giliwiling djin nyininyi nguli.

³² Ga Tira nguliguma balini gurrbuwi Yaran, nyani ngurrum gatjidjini 205 gunmal ga rarranydjarr, girri nyani wirrdjiniban.

12

God inga bultjidjini Abramgi miri nyani gubidji nyanganng mutjing

¹ Manymak, ngurrwakng nyani Abram yilitjini gurrbingir nyanganngir mutjingir, nyani God Yaway nyani inga wangini Abramgi, "Djining djawal nyungung gurbi mungan nyuni gubidjiban, ga minydjii giriwban djiningir, ga yilitjirrdji wurpiliban, ngunyili gurrbili miri ngarri guyumban nyiirr mil-lirrpigi. Ga ngunuwiliny nyungung gunydjirrgirang malany nyuni djiny gubidjiban.

² Ga ngarri djinimirri inmarr djamatjigi inmarr manymakdjigi gam': nyungupibi ngarri ngamangamadjiji bapururr yuwardjing, ga nyungung mala-punyirbi djani minydjin nyinidji yagirri-wana mala. Ga ngarri inmarr ojakadjiji, ga nyuni yagirrwanadjidji, marrga nyungupibi galbi yulpili djin marrkapdjidi giri.

³ Ga ngunubilang wirapili inma djin marr-bulanggitdjidi, ngarritjaban bilang djinarr marr-bulanggitdjidi. Ban ngunubilang wirapili inma djin rarrri-wangidi, ngarritjaban djinarr rarrri-wangidi. Ga gima nyungupibi, bukmagi bapururrugi malagi djili gurbi-munganmirri nyi'nyini, rum djina djin manymakdjidi.

⁴ Manymak, Abram giriliban miri Yaway inga bultjidjini, ga nyani Lut inga maltjili. Nyani Abram ngurrum gatjidjini 75 gunmal ga rarranydjarr ngunukining minydjii yilitjini gurrbingir Yaranngir marrga wurpili djawalili giri.

⁵ Ga nyani gangili nyanganng nyanimngimi Saray, nyanganng gulmigirang walkiringim Lut, ga bukmak djamaginpili nyani djiny marrngili ngungrapibi gurrbibi Yaranbi, ga bukmak girripili nyani gurtjili nguli gurrbiwi. Nyani marrngili bupalikining, girri larrban djin warrrwardjny kirinyban walanggarrali, ngunukima djawal Kanan bilay pirr, ga rirringir yakirri galbingir djin yulgungili Kanan.

⁶ Girri Kananmirrppmi djin gukirriny kirinyban, gima djin djawal-nyanyi kiriny. Guyumban djin yulgungili nguli gurrbiwi Djikim, ngunukima gurbi nyaling gurrtji wana djarrinyi, ga ngulibarun djin gurrbidjili munganmirri ngunukima djunggimirri.

Manymak, ngunukining bildjirri ngunukima Kanan djawal ingki ganba, bil wurpi wurpi bapurrrrpili djin nyininy giriny mala Kananmirrmi, miri Kananayit bapurrr, ga wurpipili.

⁷ Manymak, God Yaway inganydji mil-lirrpini Abramgi ga inga wanginiban, "Djining djawal djinarr gungi djanki miri nyungung bapurrrurrgi, ngunung mala guyum inydjin ngurri." Marrga Abramdji yip mutjpiningili rirrkayandji, marrga nammirri inga burrtjirrdji maypal Yawaygi miri mundjarr inga, gima nyani ngulikima inganydji mil-lirrpini.

⁸ Rirringir ngunungir-kirri nyani yilitjini ngunyili bumirili gurrbili, ngidjirrkng Bitil gurribiwi bil ngunyilatjuy bumiri-djimurruli, ga ngulikima nyani winin yirrpini; yarim biling gurrbimirrpili Bitil ga Ngay ray ray inga bil gatjini, ga banim nyani yirrpini winin burringi. Ga nguli nyani rirrkiyanpili marrngili, girri yip yirrpini madjirri, girri bumirgindjiliban Gunydjirrgiriny yagirrmirrppm Yawaymirrppm.

⁹ Ga guyumi nyani yilitjini, ga yirrpili djin girali, ngunung wirrpili djawal bumirdjalatjangili, ngunukima gurribi djin bultjini giriny Nigip (Negeb). Djin ngurriny kiriny djutdjutj, Nigip-li djin djundjini kiriny, gima waligi djin miliny kiriny.

Abram ga Saray bil nyininyi yalkuy nguli Yidjipt

¹⁰ Bilapilakinjing bildjirri bubalikiŋgung bapurrrr djin nyininy kiriny ngalbirkibana, gima wirrban mayurrik rikinyir, marrga marri qinini wali djurrginy giriny nambidi djawalmirri Kanan. Marrga nyani Abram yulgungiliban Kanangngir, ga djin djundirrdjini djawalalili Yidjipt-li, marrga yalkuy djin nyinidji nguli, gima Kananmirri bukmak yul mala mirrppmban djin baliny giriny maypalgi ga waligi.

¹¹ Ga ngidjirrkng Yidjipt djini-guyum ngunyili djin ranyir, ngulibana nyani Abram inga wangini nyanimngirgim Saraygi, "Ngarri marrngi miri nyuni mirrppmi djal-malimaling miyilk."

¹² Marrga ngunukining ngunitjini Yidjiptmimigi mala nyin djin nyangi, miri djining ngurrgima djin bintji wangidji, 'Ngunung miyilk nyani djining nyanimngim inga!'. Ga ngirrinyban irriny djin rani marrga nyin djin djamigi.

¹³ Butaltja nyuni djina bultjigi miri nyuni ngirrang gadingimi, marrga gima nyungupibi ngarri nyinidji bulanggitj marinyirring, ga wanngipm irr nyinidji giri."

¹⁴ Manymak, girri ngunyili djin ragilaban Yidjipt-li. Ga ngunitjini Yidjiptmimigi mala djin nyanginiban miri Saray djal-malimaling mirrppmi.

¹⁵ Ga djanngang ngurrdawalangu ngunung yaku-wana yul djin bultjini giriny Paruw (Pharaoh). Manymak, Paruwang djamaginiŋgir maladjii djani djin nyangini, ga djanguny djin gangiliban Paruwli Sarayang, ga inga djin wukdjili Saraygi nyangngali Paruwli. Marrga nyani Paruwddji djina yan-kungiliban miri djin bagiligi Saraynyi, marrga nyani Saray nyinidji giri nyanggar miri nyanimngim inga. Girri djani djin marrngili Saraynyi, ga ngunukima miyilk nyani nyininyban gurribiwi Paruwang, ngunukiningban nyi'nyininyban bala'mirri wanamirri nyangang.

¹⁶ Ga gima nyanggapibi Saraybi, nyani Paruwddji gumbirrgindjili Abramnyi, yarim galbi mundjarrpili inga gungili, marrga nyani Abramdji ma'marriny kiriny mala mala galbi, yarim nyani gatjini giriny galbi bimbi maypal mala, ga galbi buluki mala, ga galbi dungki mala, ga kamul mala, ga galbi djamaginpili yarim yulpili ga miyilkpili.

¹⁷ Bil Yawaydji nyani mari djina djamatjiliban, miri Paruwgi ga nyangang gurrtiginingirgim, marrga djani burrkburrk wanaban djin marrngili gima nyanimngim inga Paruwddji gaypili Abramnyi.

¹⁸ Girri Paruwddji nyani yanili miri Abram bi balpargi. Ga ngunukining Abram yulgungili, nyani Paruw yan-manbi inga bindjinibana, "Nyawban nyaliki nyuni irra mari-djamadjili, yarim irr rirrkminyngindjini gima nyungupibi! Nyimki nyuni ingki irra bultjinir miri Saray nyani nyanimngim inma?

¹⁹ Nyimki nyuni irra bindjin, 'Nyani djining ngirrang gadgingimi,' marrga irr djamirrdjini ngunukima, bitma burali miyilk? Djinimkima nyungung nyanimngimi, marriwan ga bilayiliban minyджi giriw!"

²⁰ Girri Paruw djina bultjidjini nyangang djamaginpilngiriny miri djani djiny djin gundjirr-djitiŋgidi Abramnyi mala. Girri ngunukirri djamaginpilingir djiny djin badjin-nyanginiban, marrga minydjin giriliban, miri Abram, nyangang nyaningimi, ga nyangang djamaginiŋgung mala. Ga Abramdji gangili bukmak girripili nyani gurtjili nguli Yidjipt gurribiwi.

¹ Manymak, djani djin yulgungili Yidjipt-ngir, miri Abram, nyanimngim inma Saray, ga bukmak Abramang girripili, ga Lut. Ga djin wiñiniban yirrpili djin walmini ngunyili Nigip-ili djawalili gidiđijirrim.

² Yarim ngulikirri Yidjipt gurrbimirri nyani Abram rrupiyagindjini marrpm, marrga ngunungir-kirri nyani djiny gatjini giriny galbi rrupiya ga nyim ngunupilang maypalpili miri buluki ga bimbì, galbi mala.

³ Ga djin warrwarrdjny kiriny yirrpimirrpm, djin ngurriny kiriny djutjdjutj, girri djin yulgungiliban gurribi ngunukima wanim gurribi ngidiđirrkng Bitil nyibirri djin gurribidjili biligi,

⁴ yarim ngunung ngurrgima gurribi nyaling rirrkiyanpili nyani mutjipingili ga yip djamatjili Garaygi ngurrwakngi. Manymak, rirringir yulgunnyirngir nyani inga bumirwitjili Godgi madjirri yagirimirrpm Yawaymirrpm.

⁵ Ga nyanganngi Lutgi, nyani wurpi miri galbi wiñin ga djamaginpili ga maypalpili djiny gatjini giriny yarim miri Abramdjii.

⁶ Manymak, Abram ga Lut biling wurpilipm bil nyininy girinyi, bil ingki galbi yurryarr djurrginyir nguli maypalgi dírradjnyirgi, gima bil gatjini maypal galbi. Marrga matitdjú bilngga yarim wurpilipm bil nyininy girinyi wurpirrim gurrbimirri,

⁷ gima bilngirang djamaginpili inyidjin yimini giriny yurryarrgi, gima ngunukima malamirrpili biling bil djalngdjny giriny yurryarrgi bukmakgi, bil wirr gadjigarr bilngga gima wurpilipm bil nyininy ngulimiri ngapirrim gurrbimirri,

⁸ Marrga nyani Abram inga wangini walkiringirgin Lutgi, "Ngili djining gurruṭigining ili, ingkibin bilang inyidjil yimigi. Manymaktja djiny il gułmiyi yiminirngir ngunuwili djamaginpilngirin ngiltjirrik."

⁹ Nyuniban djawal-nyangi, ga nyibirri gurribi nyuni djalngdjidji, nyuniban bilang inma rindiliği ngunukima gurribi. Girri nyuni yilitjirrdji ngirrangir, marrga rarrmili-rarrmalipmban il nyinidji giri. Yarim ngunubilang nyuni yilitjirrdji wingungir, ngarritjaban bilang irr yilitjirrdji djunupangir, ban ngunubilang nyuni yilitjirrdji djunupangir, ngarritjaban bilang wingungir irr giri."

¹⁰ Girri nyani Lut milingiliban, ga gurrpulu nyangini miri ngunung djawal djarrinyi ngidiđirrkng ngunukima mani djin bultjini giriny Djudun (Jordan). Ga ngunung gurrpulu miri butal marrpm gima gapi galbi ngurriny giriny nguli, miri ngunung ngurrgima ngunukirri gatni Godangpibi ngurrwagipi, ga miri Yidjipt gurribi. (Ngunupili wana gurrbimirrpili, Djudum ga Gumurra, djarrinyini ngulikima gurrpulumirri, gima ingkipm nyani Goddji bilngiriny malimdjnyir, bidakipm. Yarim bilapilakinjing nyani Lut ngunyili yilitjini, butalban ngunung gurrpulu djarrinyipm.)

¹¹ Marrga ngunukima gurrpulu nyani Lutdjii inga rindilali nyanganngapibi, ga ngunyili yilitjiniban bumir-djimurruli. Miri bilapilang biling Abram ga Lut inyidji bil garrwurdjili.

¹² Manymak, rirringir ngunungir-kirri nyani Abram gurrpini giriny nyininy giriny nguli burringi. Kanan djawalmirri, ban nyani Lut inyidji yirryirrpini gurrpulumirri, yarim nyininy giriny wayalimirri ngidiđirrkng ngunuwili wana gurribipili djin djarrinyi gurrpulumirri, ga ngidiđirrkng Djudum gurribi nyani djiny yirrpini wiñinpili inga.

¹³ Bil ngunutjini Djudum-mimigi mala, gadjigarr djina mirikunu marrpm, ga Godang rum djin wubirdjny giriny munguy.

¹⁴ Manymak, rirringir nyani Lut yilitjini Abramngir, nyani Yaway inga wanginiban Abramgi, "Nyuni milikiban miri ngunyili lunggurmali ga djalatjangili ga djimurruli ga walirr mungan inyidji yirrpiniirl,

¹⁵ gima bubalkinjing gurribi nyuni nyangi, ngarri djiniwiliny inmarr gungi gurribipili, miri nyungki ga djanki nyungung mala-punyirbi ngildjnyirr gungi djining djawal, ga djani minyidjin galiki ngunyili yipi.

¹⁶ Ga nyungung mala-punyirbi djani djin galbidjidi, bilapilang miri rirrpidi mala djin ngurrinyi munatjamirri; yarim ngunubilang wari ganydjirrgindjidi djiny butjurruđigi djiniwiliny, nyani girri ganydjirrgindjidi djiny butjurruđigi nyungung mala-punyirbi, bilapilang.

¹⁷ Djirridjiban, ga gukirridjiban djawalmirrpm djiningir ngunungir, gima nyungkiban ngarri inmarr gungiban djining djawal."

¹⁸ Girri nyanganng winin Abramdjii yilbirtjili ga yilitjini djalatjangili. Ga ngidiđirrkng Yibrun (Hebron) nyani inyidji yirryirrpini munganmirri gurrtjimirri, ngunukima gurrtjipili Mamri'ang ngunung gurribiwatāngungirang wari nyininy giriny nguli gurribi Yibrun. Ga madjirri rirrkiyanpili nyani Abrayamdjii gurtjili girri yip djuyugining inga mutjipingili Yawaygi.

14

Mulkurupilingir walanggarrabi djin djamirrdjini Lutnyi

¹⁻² Bilapilakining bildjirri, yul gamununggumirrpili inyndji bil gurrkungili, bil bumirgamununggudjimaban. Wurpmi mala bi djin girali bilayngir djimurrungir, yarim Yamrapil ngurrdawalangu djina Djinlar-mimigi malagi, ga Yariyuk ngurrdawalangu djina Yilatjar-mimigi malagi, ga Djidurlayumir ngurrdawalangu djina Yilam-mimigi malagi, ga Tidal ngurrdawalangu djina Guyam-mimigi malagi, yarim bingili ga bingili ngurrdawalangupili ga gulinydjarr djina mala, wurpirrim inyndjin nu-gurrkungili marrga djani djin djirridji wurpirrimban, yarim djani miri mulkurupili walanggarrabi. Ban ngunukima wurpitji mala djingirapibi djawalbi djani miri bilapilang gam'. Bira ngurrdawalangu djina Djudum-mimigi malagi, ga Birtja ngurrdawalangu djina Gumurra-mimigi malagi, ga Djinap ngurrdawalangu djina Yatma-mimigi malagi, ga Djimirib ngurrdawalangu djina Djibuyim-mimigi malagi, ga wurpi ngurrdawalangu ngungirapibi gurrbibi Bila-bi ngunukirri gurribi Djuwar marri bilay, yarim gumbirr wurpingirpm ngurrdawalangu ga gayitjingin djina mala.

³ Djiniwili 5 ngurrdawalangupili ga djanngang gamununggupili inyndjin mutipingili nguli gurrlumirri, ngidjirrkng gapimirri djalgimirri ngunung wana ngambul gapi ngurrinyi wayalimirri, ga ngunung wayali djin bultjini giriny Djidim.

⁴ Bilapilang miri bilakining 12 gunmal ga rarranydjarr djin bangiringili, ngunukima ngurrdawalangupilingir djin djamadjny giriny inga ngungirkirri bunggawagi Djidurlayumirgi, bil rirringir wurpingir gunmalngir djani rurrujdji inganydjin yirrpinanban bunggawagi, marrga inga djin butjir-djumilidjny girinyban.

⁵ Manymak, wurpi gunmal bangiringili, rirringir ngunungir-kirri ngunukirri 4 mulkurupili ngurrdawalangupili djani bi djin girali bunyirli, yarim Djidurlayumir ga wurpiwilitji ga djanngang gamununggu mala, ga djin ragili djawalili Kanan-li. Girri ngulikima djin buny kirinyban, ga galbi yulpilngiriny djiny djin barrtjin, marrga wurpi wurpi bapurrrpilngirinyi djiny djin dimbitjnyirdjili. Yarim djiny djin badirdjili djiniwiliny malany, gam': Ripayim mala nguli gurribi Yatjirut-karnayim, ga wurpiwili girri miri Djutjim mala nguli gurribi Yam, ga Yimim mala nguli gurribi Djabikiriyatjayim,

⁶ ga Yurayit mala nguli Djiyar gurribi ngunung bumiri gurribi ngidjirrkng Yil-paran gurribi galimyimirri yirrpimirri djarrinyi.

⁷ Girri bapilakuwa djin wirrkirrkjili ngunyili Yin-mitjpat gurribi, ngunung gurribi nibi bultjin girimban Kaditj, girri nguli djiny djin djanadjanadjili bukmaknyi Amalikayit malany ga ngunuwiliny Amurayit malany djin nyininy giriny nguli gurribi Atjatjuntamar. Miri bilapilang, djin buny kirinyban.

⁸⁻⁹ Marrga ngunukirri ngurrdawalangu mala Djudumbi, Gumurra, Yatmabi, Djibuyimbi, ga Bilabi, djiniwiltji djiny djin mutipingili djanngang gamununggu malany, girri larrban ngurru-wurpmi djin giriny nyininy bunyirli. Guyumi djina djin yulgungili, girri inyndjin bumir-balparngiliban, bingili mala yarim 4 ngurrdawalangupili biribiri 5 ngurrdawalangupili mulkurupili.

¹⁰ Miri bilapilang ngulikima Djidim wayalimirri, galbi ngambul ralal ngurriny giriny miri ralal galanyangin mulngi munatjabi, mirikunu mirrpni. Ga ngunuwiltji gamununggupilingir Djudumbi ga Gumurra djani djina djin barrtjidjini mulkurupilngirgi gamununggu malagi, bil inyndjin yulili, marrga minyndjin nunydjirraliban. Ga ngunupili bunggawamirrpili Djudumbi ga Gumurra biling bil nunydjirrali ga rungili inyndji bil nguli ngunyili ralalili mirgili, ga wurpiwiltji djin butdjili ga bumirili djin walmimi irrkiyanili.

¹¹ Girri ngunitjini mulkurupilingir djani girripili biliny djin gaypili Djumum-mimigi malany ga Gumurra-mimigi malany, ga djin djamirrdjini bukmaknyi walipiliny ngungirapibi gurrbimirrpilibi, ga djiny djin djamirrdjini girri yulpilingiriny, girri warrpam minyndjny djin gangiliban.

¹² Ga djin djamirrdjini Lutnyi Abramang gulmigirang walkiringimi, ga warrpamnyi miri nyanganng girripili ga yulpili girrgima djiny djin djamirrdjini, gima nyani Lutngurriny giriny nguli nambidi Djudum gurrbimirri.

¹³ Manymak, wurpilim butnirakinqingir bi inga gangili djanguny Abramgi ngungirkirri Yibriw (Hebrew) yulgi, ga ngunukima yuldi manyangini Abramnyi nyininyi munganmirri gurrtjipilimirri, ngunuwili gurrtjipili Mamridji djiny gatjini giriny. Yarim djining yul Mamri nyani miri Amurayit yul, ga nyani miri gurruqtingin bilingga Yitkulgi ga Anirgi, ga djiniwiltji gurribiwa tangupili djani miri namkatdjinginakinpili inga Abramgi.

¹⁴ Manymak, ngunukining Abramdjı marrngini djanguny miri nyaliki djin djamir-djini nyanngang gurrutigining Lutnyi, nyani djina witi jiliban gamununggu malagi nyanngangpibi, nyabiniwili miri 318 yul mala, yarim ngunuwiltji djin bungtjili ngurrwakng gurrbimirri nyanngar. Girri djani djin marrngili gayitpili, ga ngunukima wurpiwiltji bunggawapili miri Anir, Yitjkul, ga Mamri, djina djin maltjili, ga djanngang gamununggu mala girrgima, girri djiny djin gurpiniban. Djin giriny nyininya-a-a, nu djin gurrpini kirinyban, djiny djin djugadjugamiyngili. Guyumban maliri, djiny djin manyanjinibana ngidjirrkng Dan gurribi nyaling gandi inydjin galini kiriny.

¹⁵ Girri Abram ga nyanngang yulpili djin barrkirdjini, yunganban djin wirrkwirrkjdjili liyuw dap djin balbaldjili djin djudapdjili. Ngidjirringir djin yarraramiyngili djin barrtjinban. Ga ngunukirri mulkurupilngiriny nyibi djiny djin bipiniban bil nyibi minyidjin nunyidjirraliban, ga djani djiny djin gurpiniban gamuṇunggudjji Abramang giliwiling ngunyili Yubar-li gurrbili, ngunung gurribi bilay pirr djarrinyi ngidjirrkng Damaskus gurribi bil ngunyilatjuy bumir-lunggurmali.

¹⁶ Ga nyani Abramdjı bubalikininqiny biringirpm djiny gayipili miri bukmak girripili, yidjipilpili miyilkpili, ga yulpili, ga nyani wanngirngili Lutnyi girrgima, ga warrpamnyi Lutang girripili ga yulpili. Girri bapili-kirri nyani djiny wiñidjinginibana bukmaknyi gurribilinan.

Miltjisidik ngurrdawalangu gurribi Salimi inga yulgungili Abramgi

¹⁷ Ngunukining Abram bi winini bunyirngir, ngunung ngurrdawalangu Djudumbi inga bir-kirali Abramgi gurribingir Djudumngir, girri inydi bil birmirrpilidjili nguli wayalimirri, ngunukima wayali djin bultjini giriny Djabiyl (miri djining yagirri mayali miri 'Bunggawang Wayali'), ga nyani inga bir-bulanggitdjini Abramgi nguli.

¹⁸ Ga wurpi ngurrdawalangu Miltjisidik inga bir-kirali Abramgi, ga gurribi inga Salim. Yarim nyani rum-kanyirakininq yul Godang ngunukima Wana Miligidjingirang. Manymak, wali ga nganitji nyani Miltjisidikdjı inga birrungili Abramgi miri mundjarrpili inga, girri djiny gungili inga.

¹⁹ Girri nyani manymak inga wangini Abramgi, inga bindjin, "Marrkapdjidjiban Abram, God inma djamadjigi inma manymakdjigi, ngunung God miri Ngamangamadjnyirakininq Miligidjji gurribi ga ginimbirrigi."

²⁰ Ga God Wana inga lim wukdjigi nyanki, ngunukima Miligidjji wili djiny galwupini ngunuwiliny mulkurupilngiriny gumbirrili nyunguli." Ga Abramdjı girripili marrngili, girri 10-bi gandibi nyani bututnyirdjiliban nyangang girripili, girri inga gungiliban Miltjisidikgi wurpmi gandibi, bil ngunuwili wurpipili 9 gandibi mala nyani djiny galini miri nyanngangpibi.

²¹ Girri ngunukima ngurrdawalangu Djudumbi inga wangini Abramgi, "Yarim nyuni irriny gungi ngunuwiliny yulpilngiriny nyuni djiny wanngirngili, bil djinim girripili nyuni galikibana miri nyungungan warrpamnyi nyuni bi djiny wiñidjinginina."

²² Bil Abram inga bumir-wubirdjiliban, "Ngarri ngurrwakng ingarr gungili murrandimirbi Yawayi, ngunukima Miligidjji Wana Ngamangamadjnyirakininq gurribi ga ginimbirrigi,"

²³ miri wirrpm irr gaypigi nyuninyi girripili nyungung, ingkipm wurpmi mundan u djapatjunggi irr marrgi nyungungir, bintji nyuni wangidjiban, 'Ngarribipm irr rruipyagindjili Abramnyi.'

²⁴ Yarim wirrban ngirrki. Bil nyim malany ngirrang yulpilingir djin djingiringili bunybirimirri, yuwirdjipili djanki nyuni djina galbungi gumbirrmirri djanngar. Ban djanngangi, miri ngunukima yulmirrpili wirapilingir irriny djin namkatdjingini, ngunuwiltji yulmirrpili Anir, Yitjkul, ga Mamri, gandi-girripili nyuni djiny gupirrgungan, inydi ildji rarri-gaypiginban djinim girri mala."

15

Goddji inga gungili murr-randinirbi Abramgi marrga guyumi ngunukima murr-randinirbi inydi birraldnyiridjigi

¹ Djamingi wurpilim malirdjii nyani Abram ngurrinyi nambidi wiñimirri. Ga nyani mabugidjini. Ga Yaway inga wanginban Abramgi ngungirapi mabugibi, nyani inga bindjin, 'Abram, yawnginyirring nyuni! Ngarribipm rrirrang inmanydjirr galbungi miri nyungung gulururruru; ga bayarra inma wanadjidji mirrpmi.'

² Bil Abramdjı bumir-wubirdjili, "Garraw Yaway, nyimpi ngirrki nyungung mundjarr mala? Yarim ngarri yidjipilnyirring irr nyini girimpban. Bilang irr wirrdjidji, ngunukima yul Yiliyitja ngirrang dapmiynyirbi djamaginiq ngungirapibi gurribi Damaskusbi nyani ban djin galiki warrpam irra miri girripili ga djamaginipili.

³ Miri bilapilang gima wirrppm walkiripm nyuni irriny guw giriw, marrga ngunukima dapmiynyirbi yul ngarri marrngili djamadjnyirgi nyani gatj nyinidji bupalikinjing mala ngirrangi, miri nginbilang rum inbila bultjinmi."

⁴ Girri nyani Yaway yan inga bumir-gaypili, "Ingki ngunung yul marrgi bupalikinjing mala nyungungi; bil birralkima nyungungpibi walkiripm nyanngarki gatj nyinidji bupalikinjing mala bulanggitj nyungungi."

⁵ Ga Goddji nyanan walmirdjinginban wininngir, ga inga bindjin, "Gurrknyaw namili, ga manyaw butjurrudjigibana gata mala. Miri bilapilang miri mala-punyirbi nyungupibi djani djin galbidjidji miri ngunung ngurrgima mala nammirri."

⁶ Girri Abram marr-yirrimkindjiniban ga inganydjii marr-yirrpini Yawayli. Marrga gima ngungirapibi marr-yirrimkindjnyirbi nyani Yawaydji nguy inga garrkulukdjili Abramnyi marrga nyani djuburr djunupa yul milbimirri Godar.

⁷ Ga madjirri God inga wangini inga bindjin, "Ngarri djining God Yaway, ga ngarri nyirr walmirdjingini ngunungir gurrbingir Wurngir, ngunung Kaldiyang malang djawal, marrga djingiriny djawal Kanan nyirr gungi, ga nyuni galikibana bintji giri ngurrgima."

⁸ Bil Abramdjii butjalmini, "Garra Yaway, nyaliki ngarri marnnggidjidji miri djinimkima djawal irr gatjigi?"

⁹ Ga nyani inga bindjin Abramgi, "Ngarri djinipan rum inma yirrpigi marrga guyumban djining murr-randinirbi inmanydjii birraldjnyirdjigi nyungki. Nyuni bidjny gangban ngirrali djingiriny malany gam': wurpm buluki miyilk, wurpm nanikut, ga wurpm bimbi yul; djiniwiliny nyuni djiny marrgi yarim warrnguwili gunmalginjing maypalpili. Ga madjirri bi biliny gangi waykinningmirrpiliny, miri wurpmi mukumbul ga wurpmi mukandi yuwardjing." Girri ngunukima mabugi inydjii malimdjili, ga nyani Abram binyagadjiniban.

¹⁰ Manymak, ngunuwiliny maypalpilngiriny Abramdjii djiny marrngiliban, girri djiny djarnngili banimi, miri wirrbi wurpmi ga wirrbi wurpmi. Girri ngunupili wirrbimirrpili nyani biliny galwupini biribirri munatjamirri, miri binglidjii munqandji Abramdjii biliny marrngili. Bil ingki nyani biliny djarinyir ngunukima waykinningmirrpili, yarim biribiri biliny galwupini munatjamirri.

¹¹ Girri nyani marrkany kiriny, ga ngunubilang galminir waykinning biliny dirradjnyiri miri gurrtjirtjir u damili u bilapilang, Abramdjii djiny badji-nyanganinan djiniwiliny maypalngir.

¹² Djampan djini-guyum walirr mungan inydi yirrpini kiriny, nyani Goddji gungili Abramnyi mabugi, girri nyani Abram yawngini ga wurrwurrdjny kiriny.

¹³ Ga God inga wangini mabugibi, "Ngarri nyirr butjirgindjigibana nyim inydi birraldjnyirdjigi djamingi. Nyungung mala-punyirbi djani djawalili wurpili djin giri mulkurupilingirang, ga nguli ngunuwililti mulkurupilingir djiny djin dapmiygii nyungung malany, ga djiny djin dimbitjnyirdjigi marrga djama matit djina djin gungban. Bilapilang miri wanadji maridji djiny bargi bilakinjing 400 gunmal ga rarranydjarr djina bangirigi.

¹⁴ Bil rirringir ngunungir-kirri, ngarri djiny irr yati-wubirdjigi ngungiriny mari-djamagining malany, ngunuwili yulpili wirapiligi nyungung mala-punyirbi djina djin djamadjigi, gunyambipili djinarr gilibigi. Ga rirringir ngunungir-kirri nyungung mala-punyirbi djin yulgungban ngunungir djawalngir, ga girripili galbi minyidjin minibar djanngar, yarim rrupiya galbingakining mala miri, ga djin winidji bapilipm.

¹⁵⁻¹⁶ Ngiy, gunmalpili ga rarranydjarrpili miri bingili ga bingili mundan djin bangirigi, ga rirringir ngunungir-kirri djani bapili bi djin winidjibana nyungung mala-punyirbi, gima bilapilakingin bildjirri djinim Amurayit bapururr djin mirgidjidji mirrpmban, marrga ngunukiningban ngarri djiny irr malimdjigi djiniwiliny Amurayit yulplngiriny marrga djani nyungung mala-punyirbili bilamirri djina djin djamagi ngungirkii Amurayit malagi. Bil nyungungi, nyuni mirrpimi bir-gaypingdjidi magayagining ga marrkapgining, girri nyuni wirrdjidi ga nyungung gurrutiginpilingir nyin djin djalingriban." Bilapilang Yaway inga bindjin wangin Abramgi mabugibi.

¹⁷ Manymak, walirr mungan inydi yirrpini Yawayli, girri gar-malirdjiniban, ga Abram gurrrpini kiriny bulkiny kiriny. Girri Abramdjii yakirr-nyanganinan, miri djunggi ngirrimbiyining ga ngirrtjnyakinin burrtjirriny biling bil birraldjiniban, girri bil yilitjininan banimmirrpum mundanmirrpum ngunupili maypal wirrbi mundanmirrpili.

¹⁸ Miri bilapilang Goddji rum inga yirrpini Abramgi, marrga djining murr-randinirbi nyanggapibili Yawaybi nyani inydi birraldjnyirdjigi guyumpiligi. Ga djining ngunukima murr-randinirbi: nyani Yaway inga wangini Abramgi, "Nyunguli mala-punyirbili ngarri djiny irr gungi djingiriny djawal, ngunungir maningir Yidjipt-ang ngunyili manili wanali, ngunukima mani djin bultjin girim Yupratis.

19-21 Miri nyungung mala-punyirbi bilamirri djina djin djamigi djiniwiliki bapururrsgi, gam': Kinayit, Kinitjayit, Kadmunayit, Yitayit, Piritjayit, Ripayit, Amurayit, Kananayit, Grgatjayit, ga Djibutjayit, ga bilapilang; djiniwilang malang gurribipili ngarri djinarr gungi mala-punyirbige nyungungirgi."

16

Yagar ga Yitjmayil

1-3 Rirringir Abram nyininy giriny ngulikima Kana djawalmirri 10 gunmal ga rarrayndjarr, nyanngang nyanimgngim Saraydji nyani wirrpim inga miniginyir yidjipili Abramang, bidakipm. Bil nyani Saraydji gatjini wurppi dapmiynyirbi djamagining miyilk yagirri Yagar, yarim ngunukima miyilk miri ngungirapibi gurribibi Yidjipt-bi. Marrga Saray inga wangini Abramgi, "Miri nyani Yawaydji yidjipiliny mirrbilali ngirrangir. Ngunukima miyilk bilang nyuni marrgiban, yarim ngirrang djamagining miyilknyi, girri waymirri nyanngar nyuni ngurridjiban. Ga djinimirri bilangi, ngarriban yidjipiliny inmarr birraldjnyirdjigi nyanggamirrpmi." Ga Abram yitjidianiban. Bilapilang nyani Saraydji inga gungili Abrayamgi nyanggang dapmiynyirbi djamaginiing miyilk, bitma nyantimgim inga bil djamaginingipm.

4 Girri maliri biling Abram ga Yagar bil ngurrrinyini wurpilipm, ga nyani yidjipi-lakinjdjinaban. Bil ngunukining nyani djakiy inydi marrngini miri murrbindjini gima yidjipiliny miniginyi kiriny, nyani mil-dintytjnyi Saraynyi, yarim milbimirri nyanngar ngunukima Saray ngaminydjinaban.

5 Girri nyani Saray mirrpim inga madakarritdjini ga inga bindjin Abramgi, "Djining mil-dintytjnyirbi irriny barngili gima nyungupibi! Ngarribipm inmarr galwupim ngunukima miyilk nyungur waymirri, bil ngunukining nyani djiringinmi miri nyani yidjipilikindjirri, ngunungir yipi nyani irriny burrdji ngurrgum girim, ga nyani irriny ging girim bitma ngarri ngaminyi miyilk! Nyani Yaway miri ngiltjang rum-yirrpinakingin marrga nyani iltjny ginggaidji ngunubilang ngarri mirkng u ngunubilang nyunikima!

6 Girri Abram inga bumir-wubirdjili, inga bindjin, "Ngunukima djamaginiing miyilk nyani gumbirrimirri nyungur, nyuni yati-wubirdjigiban nyanyinyi nyalikidjidji nyuni djalngdjidji." Girri nyani Saraydji galngi-bilwirtjili ga marr-mirgidjnyirdjili Yagarnyi, marrga nyani minydi nunydjirraliban.

7 Manymak, nyani Yagar manydjini, girri Yawaydji munatjali yanili wurpm wugili djangunyginning, marrga nyani birraldjnyirdjigi Yagarnyi. Ga ngungiriny miyilk nyani birraldjnyirdjili yirrpimirri, ngidjirrkng ngambul gapi munganmirri gadjigirring, ngunung gadjigarr ngunyili nunydjirrim girim gurribili Djur-l.

8 Girri nyani butjalmini, "Way Yagar djamaginiing Sarayang, nyalingir nyuni girali ga nyanydjili nyuni girimban?" Ga Yagar bumir-wubirdjili, "Ngarri nyanngangir nunydjirrali Sarayngir ngirrang bunggawangir."

9 Bil ngunukima wugili Yawayang inga bindjin, "Ingki, bi wiñiyban nyunguli bunggawali, ga ngunubilang maridji nyin bargi, nyuni bumiripm inydi galbungi ga nyuni gungi-djumilidjidi gunyambigi,

10 gima mala-punyirbi nyani Yawaydji nyin gungi galbi mirrpmi, ga ingki wili ngunupilang djiny butjurrujdjigi gima galbikima."

11 Ga madjirri inga bindjin ngunukima wugili, "Nyuni yidjipilakindjirri, ga guyumban nyani milimiti bungtjigi, ga nyuni yagirri yirrpigi ngunukima Yitjmayil." (Miri djining yagirri mayali miri 'Goddji marrngini'.) Ga nyani gurrpini wangin inga, "Yarim djining yagirri Yitjmayil nyuni yirrpigi, gima nyani Yawaydji nyin marrngini bimbi nyungupibi wargugudjnyirbi.

12 Bil ngunukima yul Yitjmayil* nyani nyinidji giri miri budjirr-wayirrigining miri nganaparra. Yarim babalikiningirgi nyani mari djina djamatjiri giri, marrga djanitja mari inga djamatjiri giri. Ga nyani rarrmalipm nyinidji giri, ga nyanngangipm malagi nyani djina nguy-margindjidji." Inga bindjin ngunung wugili Yagargi.

13 Miri bilapilang ngunitjini wugilir bi gangili djanguny nyanggapibi Yawaybi. Ga ngunukima miyilk Yagar nyani bultjdjini Yawaynyi djining yagirri miri 'Nyuni djining God wili irriny nyangini', gima nyani inydi wangini, "Ngarribi birralkima Godnyi irr nyangini, ngunukima Miligidji wili irriny nyangini!"

* 16:12 Djini'djining Yitjmayilang mala lim bultjigi Arabs † 16:13 El-roi

¹⁴ Marrga ngunukima ngambul gapi djin bultjini giriny 'Ngambul gapi nyangang Wanngidjnyirakininingirang wili irriny nyangini'. Ga ngunung ngambul gapi dja'djarripmban, ngidjirrkng djinipili gurrbimirrpili Kaditj ga Birid bil banimi.

¹⁵ Bilapilang miri nyani Yagardji minali yidjipili Abramang, ga ngunukining nyani bungtjili, Abramdjii ngunung yagirri yirrpini Yitjmayil.

¹⁶ Ga Abramdjii ngurrum gatjidjini 86 gunmal ga rarranydjarr ngunukining Yitjmayil bungtjili nyanggapibi Yagarbi ngunung dapmiyinyirbi miyilk Sarayang.

17

Goddji rum inga yirrpini Abramgi miri gurrulknyi gurmildjigi

¹ Ngunukining Abramdjii gatjidjini 99 gunmal ga rarranydjarr, Yaway inganydji milirrpinaban Abramgi, ga inga bindjin, "Ngarri djining God Ganydjirrgining Mirrpmi. Ngirrang rum nyuni yati-nyangi, ga rum-mirginyirring djerriyi.

² Ngarri inmarr gungi murr-randinirbi nyungki ngidawa, ga galbi mirrppm nyuni mala-pungi gima ngirrapibi."

³ Girri Abram inyddji nguli munatjali girri ngurri munatjapm ngurrunyban bilakinjing God inga wanginy kiriny.

⁴ Girri God bindjin wangin inga, "Djiniwili ngarri nyirr murr-raniban, gam': nyuni djina djirridji miri gungi-bilicaping djina galbigi bapurrrurrgi.

⁵ Ga yuwirdjing yagirri ngarri nyirr gungban, marrga ingki madjirri nyin djin bultjigi Abram, bil djiningir yipi nyin djin bultjigi Abrayam, gima djining yagirri mayali miri 'Gunydjirri djina galbigi bapurrrurrgi'.

⁶ Ga ngarri inmarr gungi galbi walgurwalgur, ga galbi yuwirdjing bapurrrurrpili djiny irr ngamangamadjigi nyungupibi, ga wanapili ngurrdawalangupili djani inyddjin ngurri nyungupibi.

⁷ Ga djining murr-randinirbi djirridji inyddji mungbinigi, miri nyungki ga djanki nyungung mala-punyirbi wirapili djin birraldjidji djadjuditj. Djining murr-randinirbi ildja djirridji bintji giri ngurrgima, miri ngarri djining God Miligidji, nyungung ga djanngang nyungung mala-punyirbingirang.

⁸ Yarim miri bilapilang nyuni nyini kirim djili gurrbimirri Kanan miri mulkuru nyuni, bil ngarri djining nyirr gungi gurribi Kanan nyungungi marrga nyuni mala-pungi, miri djining djawal nyibirri nyuni nyininy giriny gurrbinyirring, ga nyungung mala-punyirbidji djin galiki djingiriny djawal bintji giri ngurrgima. Ga djanngang, ngarri djining God Miligidji djinarri." Bilapilang nyani Goddji murr-rangirri Abrayamnyi.

⁹ Girri God inga wangini, "Bil nyungungi, djinipan nyungung djama: nyuni rum-katjiji ngirrang, miri nyuni ga nyungung walgurwalgurdji wirapili djin birraldjidji djamingi, bintji giri ngurrgima ngildji rum irraldji gatji giri ngunyili yipi.

¹⁰ Ga djinipan ngunukima rum inmarr yirrpigi: bukmaknyi yulpilngiriny nyuni gurmildjigi. Bilapilang ngarri inmarr gungi djingiriny rum, ga djining rum nyuni gatjigibar.

¹¹ Yarim nyuni bupididjigi, miri bilapilang nyuni yirrpigi gurmildjnyirbi djangunyining galngili, marrga nguni gurmildjnyirbi irriny gungigindjigi ngirrang murr-randinirbi, bilapilang ngunukima gurmildjnyirbi murr-randinirbingirang dji'djirridji nyungki ga ngirrki.

¹²⁻¹³ Yarim rirringir gurrulk yul bungtjigi yuwirdjing, nyuni marrkang bilakinjing 8 yakirripili djin bangirigi, girri ngunukima gurrulk nyuni bupididjigibar. Miri djining rum djina djirridji inyddji mungbinigi gurrutiginningirgi nyungungirgi. Yarim warrpamny yulpilngiriny nyuni djiny gurmildjigi, miri nyungung mala-punyirbi, ga bubalkining dapmiyinyirbi djamagining wirapili djin bungtjili gurrbimirri nyungur, ga bubalkining dapmiyinyirbi yul nyuni djiny bayimdjili mulkurupilingir; bukmaknyi nyuni djiny gurmildjigi. Miri bilapilang ngirrang rum yulgi, gurrulkgi ga wanagi, ga ngunukima rum ngarri inmarr yirrpigibar ga ngildji ildji gatji giri ildji bintji giri ngurrgima.

¹⁴ Bil ngunubilang wari ngunupilang yul djunggaldjidi, marrga ingki gurmildjnyiri, girri ngunukima yul nyuni butnyirdjigi gurrutiginngiri girri bungban, gima ngirrang rum nyani wubirdjili." Bilapilang God inga wangini Abrayamgi.

¹⁵ Girri God madjirri inga wangini Abrayamgi, inga bindjin, "Nyanngangi Saraygi, ingki madjirri nyuni yagirri bultjigi inga miri Saray, gima ngarri yagirri inga yirrpigibar miri Sara.*

¹⁶ Ga ngarri nyaniny irr djakadjigi Sarany, ga nyirr gungi walkiringimi nyanngamirrpni, ga ngunukima yidjipili irr djakadjigi girri. Ngiy, budjirribi Sarabi ngurrdawalangupili ga bapurrrrpili inydjin ngurri."

¹⁷ Ga madjirri Abrayam inyddji nguli munatjali girri ngurri-munatjapm ngurrinyi, girri djal-gitgitdjili bilakinjing bindjin gingin, "Ingang! Nyaliki yidjipili irra bungtjigi? Ngarri ngurrumi 100 gunmal! Ga nyani Sara ngurrum gatjidjini 90 gunmal, nyaliki marrga nyani irra mini yidjipili?"

¹⁸ Girri Abrayam inga wangini Godgi, "Ngunubilang nyuni djalngdjirri, ngirrang yidjipili Yitjmayil nyuni yitjidjidi marrga nyanngamirrpni nyuni mala-pungi."

¹⁹ Bil God bumir-wubirdjili, "Ingki. Bil yirrimi nyungung nyanngamirrpni Saradjii nyani inma mini yidjipili, ga nyuni yagirri yirrpigi ngunukima Yisak. Ga ngarri yan irr gatjigi nyanki girri, yarim ngirrang murru-randinirbi djirridji nyanki ga nyanngang mala-pungi, bintji giri ngurrigma.

²⁰ Ga djining wurpi: ngarri nyirr marrngini ngunukining nyuni irrnyi butjalmini nyanki Yitjmayilgii, marrga nyaniny irr gumbirrgindjigi girri. Nyani girri mala-pungi galbi, ga nyanggapibi galngibi 12 ngurrdawalangupili djin birraldjidi, ga nyanggapibi irr ngamangamadjigi bapurrrr wana.

²¹ Bil nyankigima Yisakgi ngarri ingarr gungili ngirrang murru-randinirbi ga nyanki ngirrang yan ingarr gatjigi munguy, ga ngunukima yidjipili Yisak nyani bungtjigi bilapilakinjing bildjirri rirringir wurpi gunmal ga rarranydjarr bangirigi."

²² Girri rirringir nyani God guldjili wanginyirngir inga, nyani manydjinban.

²³ Girri Abrayamdi marrngiliban walkiringim Yitjmayil, girri gurrmildjiliban ngunneringa manngibirri. Ga nyani djiny marrngili bukmaknyi dapminyirbipili yulpili mala nyanngangi, ngunuwiliny miri djin bungtjili nyanngar gurrbimirri ga ngunuwiliny miri nyani djiny bayimdjili, girri djiniwiltji girri nyani djiny gurrmildjiliban, yarim miri God inga bultjidjini.

²⁴ Yarim Abrayam miri nyani gatjidjini 99 gunmal ngunukining nyani gurrmildjini,

²⁵ ga nyani Yitjmayil gatjidjini 13 gunmal ngunukining bildjirri.

²⁶⁻²⁷ Miri bilapilang, manngi wurpmi djani warrpam djin gurrmildjini, miri Abrayam, nyanngang walkiringimi Yitjmayil, ga babalikining dapmiynyirbi yulpili mala, wurpilipmban djin gurrmildjinaban.

18

Abrayam ga warrngguwili mulkurumirrpili

¹ Guyumban nyani Yaway inganydji mil-lirrpini Abrayamgii madjirridji. Yarimban Abrayamang winin dja'djarriny ngidjirrkngi gurrtjimirri, ngunukima yulang gurrtjipi Mamri'ang. Ga malir-gunyirri nyani Abrayam nyi'nyininy rarrimirri wininmirri, yarim manngibirri murmurdjny kirinyban, girri Yaway inganydji mil-lirrpinaban.

² Ga nyani Abrayam namili milingili, girri djiny nyanganibana yulmirrpili mulkurumirrpili inga djin djarrinyi ngidjirrkngi, warrngguwilipm. Ga ngunukining djiny nyangini ngunukima mulkurumirrpili, Abrayam inyddji waykungili, girri ngunyili djina bir-kirali. Nyani djina yulgungili, girri gupildjini munatjali.

³ ga djina wangiinban bunggawagi inga bindjin, "Bunggawa, djinipan ngarri nyirr butjalmidji: ingkipmban irrinj bumir-bangirigi, ngarri djiningi djakaginiing inma, inmarr bir-bulanggitdjidji.

⁴ Nyiniyi yalkuy, ga ngarri gapi irr marrgiban ninini, girri nu inyddji ildji rurrtjirrmigi, ga ganđi inyddji ildji galiki djili bumalngmirri.

⁵ Ga wurpi irr marrgi, dampa marri ninini, marrga ildji dirradjigi girri ildji laydjigibana, ga ngunungir-kirri manymakban minyddji ildji giriban djutjdjutj. Ngarri marrkapdjili miri ngildjii irrinj ildji balparngili gima ngarri djamaginiing ngildjang irri," bindjin Abrayam. Ga djina djin bumir-wubirdjili, "Ngiy butal, miri nyalikidjini nyuni inbila wangin, nyuni nginbilikinan djakadjigi."

⁶ Manymak, nyani Abrayam nunydjirrali wininili, ga inga witjili Saragi, "Gidagidapm nunydjirri, dampa marriw warrngguwili garrung, yarim mirrppm manymak dampa. Girri dutjigi ga batjigi dampa mala."

⁷ Ngunungir-kirri nyani gurriyilili nunydjirrali ngunyilipm bulukili malali, girri rindililiban wurpmi yuwirdjingga latju dirradjnyirbi. Nyani gumbirrdji gatjidjini, gangili, girri gungiliban yawirrinynyi ngunung djamaginiing inga. Ga ngunukima yawirrinynjidi bipini, djaringili ganydjirrdjipm, girri maypal batjidjinaban.

⁸ Girri madjirri nyani Abrayam nunydjirrali, ga ngaman marrngiliban nanikutbi. Manymak, nyani gurtjili babalikining, girri djina gangiliban mulkurupilingirgi djiningi,

miri dampa, buluki djanggu, ga ngaman. Nyani birrungili, galwupini munatjali birbimirri mulkurupilingirgi. Ga djani djin dirradj nyininya-a-a, ga nyani dja'djarrinyi ngidjirrkngi munganmirri djunggimirri.

⁹ Djin dirradjili, girri djin butjalminiban, "Nyaling Sara, nyungung nyanimigi?" Ga Abrayam bindjin, "Nambidipm wininmirri nyi'nyini."

¹⁰ Girri wurpumi mulkuru bindjini, "Nyani Sara gapalmirrpilidjidji, ga guyumi ngunukining ngarri inmarr winidji bapilipm, nyani Sara djilidjigibon yidjipili yul nyanggpibi," bindjini. Ga ngunukima miyilk butjir-marnggibon gima nyi'nyininy ngulikirri rarrimirri wininmirri, yarim burrimirri Abrayamar ngidjirrkngipm.

¹¹ Bilapilang miri biling Abrayam ga Sara bil wurrungdjinaban, miri galbi gunmal ga rarranydjarr bil gatjidjini, marrga nyani Sara yirrmirringdjini, miri wirrban yidjipiligi mini, gima ngurrum wulgaman, bilapilang.

¹² Marrga Sara nguy inydji gitgitudjili, gima nyani gingini miri, "Nyaliki yidjipili irr marrgi, gima ngarri yirrmirringban, ga ngirrang nginipingim yirrmirring girri; nyalikibon irr nitjandydjidi yidjipiligi?"

¹³ Bil nyani Yaway inga wanginban Abrayamgi, "Nyimki Sara gitgitudjili, ga djining wangini miri, 'Bina djining birralkima djanguny, miri ngarri yidjipilikindjidji? Yarim wulgamanban irri.'

¹⁴ Bina djining djama matitipm Yawaygi? Birralkima, guyum irr winidji ga nyimila yulgungi, ngunukiningban nyanganng milimiti bunjtjigi Sarang!" bindjin Yaway.

¹⁵ Bil nyani Sara ingki-pultjiniban, nyani bindjin, "Ingki irr gitgitudjnyir," gima nyani mirrmpm inga yawngini. Bil nyani Yaway bumir-wubirdjili, "Ingki, birralkima nyuni gitgitudjilaban."

Abrayamdi butjalmini Godnyi ngungirkki gurribigi Djudumgi

¹⁶ Manymak, ngunukima mulkurumirrpili inydjin waykungili, inydjin birrindjingini bumiri Djudumili gurribili, girri larrban. Ga nyani Abrayam yalkuy djina maltjili gima mayaligining nyani.

¹⁷ Giliwilim djin giriny nyininya-a-a, girri nyani Yawaydji ginginy kiriny Abrayamnyi, miri bindjin ginginy, "Bina djanguny ingarr gilgirrgi Abrayamgi, bil marri ingarr bultjigi miri nyaliki mari irr djamadjigi djini-guyum?

¹⁸ Ngidjirrkngban nyani mala-pungi, ga nyanganng gurrutigining mala mirrppmi djin galbidjidji, yarim yagirri wana bapururr minydjin djirridji, ga bukmak bapururr mala djili gurribi-munganmirri djani inydjin bulanggitnyirdjigi nyanganmirrppmi Abrayam-mirrppmi.

¹⁹ Ngiy, nyanyinyi irr butjirigindjigibon gima djinikima yul irr rindiligid marrga nyani djiny marnggidjigi yidjipilipili nyanganng, marrga ngirrang rum djin gatj nyinidji, miri djunapapm djin giri nyinidji ga djuburri garay djin gurrgipi birraldjipm. Marrga ngarri Yaway ingarr birraldjnyirdjigi Abrayamgi ngunukima murr-randinirbi mala ingarr bultjinmi bilimi." Bilapilang miri Yawaydji gungili ginginyi Abrayamnyi.

²⁰ Ngunungir-kirri Yaway inga wanginiban Abrayamgi, nyani bindjin, "Bilngirang miri ngunupili gurrbimirrpili Djudumgi ga Gumurragi, mirikunudji djangunyidji irr marrngirrin yiriny munguypmi, yarim galbi mala djin nguy-murmurdjilaban, gima ngunukima yulpili Djudum ga Gumururramimigi djani mirrppmi djin mirgidjinaban.

²¹ Marrga ngarri djirrdjirrdjigibon ngunyilipm ga birrkadjigi, marrga irr nyangban ngunubilang birralkima ngunung mirikunu djangunypili irr marrngirrin yiriny. Marri ingki birral, marri birral, miri djani ngaminypili yul mala; ngarribipm birrkadjigibon marrga irr marnggidjidi birralgi," bindjin Yaway.

²² Manymak, ngunupili Yawayang djamaginingmirrpili biling bil ngurrgilidjini ngunyilipm Djudumili, ban nyani Yaway guldjili ga djirrininyi birbimirri Abrayamar.

²³ Girri nyani Abrayam ngidjirrgili girali ga inga bindjinaban, "Bina nyuni bilngiriny malimdjigi ga buwayakyirdjigi ngunung bingili mala gidiidjirrim, miri djuburr manymak mala ga djuburr mirkngi mala?

²⁴ Bilang ngulikima miri 50 mirginyirring yulpili nyi'nyini nambidi ngunung gurrbimirri, bina nyuni malimdjigipmban ngunung gurribi? Miri ngunubilang 50 murgunyirbi-nyirring yulpili nyi'nyini nguli, nyuni gubidjiban djanki, ngangi?

²⁵ Butaltja ngunung mayali nyuni marrbigaban, gubidjiban bintji manymakpili ga mirgipili biling gidiidjirrim bil balidji. Djining mirikunu miri nyuni bilngiriny bungi mirkng mala ga manymak mala wurpilipmi. Nyuni inydji rum-ngurrgiwbani! Miri nyuni djining nginbilang rum-yirrpinakining bubalikiningirgi bapururrugi djili gurribi-munganmirri nyi'nyini, marrga nyuni yirrimban rum djunupa djina gatjigi djanki, ngangi?" bindjin wangin inga Abrayam.

²⁶ Ga nyani Yaway bumir-wubirdjili, inga bindjin, "Ngunubilang ngarri birraldjyirdjigi yarim 50 mirginyirring yulpili ngulikima Djudum gurribi, bilang ingkipm wurpmi irr bungi ngulikima, bukmak yul mala djiny irr wangirgi balinyirbingir gima ngungirapi pilingirbi."

²⁷ Girri madjirri nyani Abrayam inga wangin, bindjini, "Djining ngarri inmarr djarri miri mayalinyirring yul, yarim ngaminyi irri miri midjirri ga girrabil; bil madjirriban nyirr butjalmidji, Garray.

²⁸ Nyabini bilang 45 djuburr manymak yulpili nyi'nyini ngulikima, bina nyuni gurrpigi malimdjigi ngunung wana gurribi Djudum, gima ingki galbipm manymak yulpili nyi'nyini giriw nguli?" bindjin Abrayam. Ga nyani Garay bumir-wubirdjili, "Ngunubilang 45 manymak yulpili irr birraldjnyirdjigi nguli, ingkiban bilang irr burtjildjigi ngunung gurribi."

²⁹ Bil nyani Abrayamdji bumir-duwał butjalmini, miri inga bindjinban, "Nyabini bilang 40 manymakpili nyuni birraldjnyirdjigi nguli?" Ga nyani Garay inga bumir-wubirdjili, "Bilang 40-kima, ngarri ingkipm bungan Djudum-mimigi."

³⁰ Ga nyani Abrayam inga bindjin, "Bidak Garay, nyuni marr inydi galbungi ga ngarri giri djutdjut. Nyabini bilang yarim 30 manymakpili nyuni birraldjnyirdjigi nguli?" Bil nyani bumir-wubirdjili Abrayamgi, "Ingkiban ngarri gurribi malimdjigi ngunubilang nguli irr manyangi yarimipm 30 manymakpili."

³¹ Bil nyani Abrayam bumir-duwał bu'butjalminyi, ga inga bindjini, "Miri mayali mirkng yul irri, yarim madjirripn nyirr butjalmidji, Garray. Nyabini bilang yarim 20 nyuni birraldjnyirdjigi?" Bil nyani inga wanginban, "Bilang ingkiban irr midjirrdjigi."

³² Ga madjirripn nyani Abrayam gurrpini, bindjin inga wangini, "Ingkiban nyuni irra madakarritjdjidi bilang bumir-wurpmi madjirri inmarr wangidji ga girriban. Nyabini bilang galbigima wirrpni, bil yarimipm 10 manymakpili?" Bil nyani Garay bumir-wubirdjili, "Ngungirki 10-gi ingkipmban irr burruji burtjildjnyirbi ngunyilipm."

³³ Manymak, ngunuķiñing nyani Yaway djingiringili wanginyirngir Abrayamgi, nyaniñan minydi giralibin, bil nyani Abrayam bi wiñiniban gurribili nyannagli.

19

Lut yulgungili gurribingir Djudumngir

¹ Manymak, ngunukima wugilimirrpili Godang biling bil yulgungili Djudum, ngunung ngurrgima maliri. Ga nyani Lut nyi'nyininyi rarrimirri Djudum gurribi. Nyanngali bil giral, ga Lut biliny nyanginibin inga bil yulgungi; marrga nyani inydi waykungili ga bilingga bir-balunggitjdjini, ga gupildjini munatjali.

² Girri bilingga bindjin, "Guwa, bunggawamirrpila, nyumi nyim djaypirgi ngunyilipm miri ngirrali bala'li, ga ngulikima nyim ngurridji djini'djining maliri. Ga nu inydi rurrtjirrmigi, girri yakirriban nyim ngurridji. Ga malir-gunyirri inydi waykung, girri larrban nyim mukurdjigibin." Bil biling inga bil wangin, "Ingki. Djilipm gar-gurriyili liny ngurridji ngalwirrgimiri."

³ Bil nyani Lut bumir-duwał ga bumir-duwarratj bilngiriny bu'butjalminy kiriny, marrga bil yitjidjinibin ga bil ragilaban bala'li Lutar. Bil nyinini, ga nyani bilingga galngarradjiny kiriny, yarim wali bilingga batjidjini dampa, girri bil dirradjiliban.

⁴ Bil ngurrwakngi bil ngurrinyir, yul mala ngungirapibi gurribibi djani inydiñin gurkungili ngulikima Djudum-mimigi, miri bubalikining yul, miri djalkining, yawirrin y ga wanapili, gulukngi wana liyuw dap inga djin garrpini ngunukima bala' Lutang, girri djin djudapdjili.

⁵ Girri djin waywaydjili Lutnyi, "Way Lut! Nyaling ngunupili yulmirrpili, ngunung bingili nyim bil balparingili djili? Bapilaban bi biliny birruwi nginbiliki, marrga waymirri nibi ngurridji bilngirar, ga bilnyi nibi lul̄tjigi yulmirrpiliny."

⁶ Bil nyani Lut rarri lapmiyngili, yulgungili, girri minibili rarri, ga nguli gar-gurriyili inydiñin bir-mirrpilidjili, ngidjirrkng rarrimirri djarrinyi.

⁷ Nyani djina bindjinban, "Way miygipila; ingkiban ildji bintjiban djuburr mirkng ildji gatjigi djinimirri!"

⁸ Butjir inydiñin guwi: ngirrang walkiripm, bingili mungimirrpili, ingki yulmirri waymirri bil ngurrinyir ngurrwakng yulpilngirar. Nyabini bilang djinipili bilny ildji gangban, ga nyaliki ildji djal bintji ngurrgima bilngiriny. Bil ingkiban ildji gatjigi ngunupili yulmirrpili bilny irr djakadjimi, gima irra bil gungi-baltjimban miri bilny irr djakadjigi djili," bindjin Lut.

⁹ Bil djina inga djin bindjinban, "Burridjipm yilitjirriy!" Ga djanibi inydiñin bininy wanginyibin, "Djining yul Lut ingki djingirapibi gurribibi miri, yarim mulkuru

djinikima, ga biligi ngilimi lim yitjidjini miri nyani nginmilar nyinidji giri; bil djini'djining nyani ging kirimi miri nginmiliny raypirridjigi bitma bunggawadji ngin-milang!" Bilapilang miri inga djin gudjirr-mirgidjinibar Lutgi, ga inga bindjin, "Marri ninini gunyambi nibi djamadjigi bilinggirki yulmirrpiligi, bil gunyambi wana nyungki!" Ngunungir-kirri djin bumir-balpariringili Lutnyi ga djin galngi-ngurrginy kirinyban, ga ngidjirrgili djin girali marrga djin wubirdjigi bala' djabiri.

¹⁰ Bil ngunukirri yulmirrpilim bil lapmiyngili djabiri, girri gumbirrdji bil gatjidjini Lutnyi ga nambidjilinan bil djitingili, girri djabiri bil matidjili.

¹¹ Rirringir ngunungir-kirri djiny bil bipiniban badayaladji wanadji, ngunuwiliny yul malany gar-gurriyili djin djarrinyi; marrga mil-djumilingban djin gu'gukirriny kirinyban, yarimban djin gar-gatjingini giriny djabirigi, bil ingkiban ngunung djin manyaw giriw.

¹² Manymak, ngunungir-kirri biling wugilimirrpilim bil butjalminiban Lutnyi, "Wirapili wurpipili nyungupibi malabi djani nyi'nyinibar djlilikima? Miri gapirri, walkiri, nyim ngunupilang gurruți nyuni djiny butjirgindjigi marrga djin yilitjirridji djiningir gurrbingir;

¹³ gima ngilinyi djining wana gurribi djini-guyumban liny burtjildjigi. Miri galbikima gudjirr-mirgidjnyakinjing mala inga djin witjny giriny Godgi miri nyani yați-wubirdjigi yul mala djingirapibi gurrbibi, gima rum djina mirikunu mirrppmi Djedum-mimigirang. Marrga ngilinyi miri bapili yanginyirbi Yawaybi linyi, marrga djining liny malimdjigibar gurribi," inga bil bindjin Lutgi.

¹⁴ Manymak, ngunung ngurrgima maliri nyani Lut yulgungili bala'ngir ga nunydjirraliban bilngali ngunukima gapirriwilingim wili djaming biliny bil marrgi Lut-tang walkiriwilingim. Nyani bilingga yulgungili, girri biliny butjir-karrdjinibar. Nyani bilingga bindjin, "Binyagadiyi, nyim djarriyi! Nyim nunydjirriwban djiningir gurrbingir, nyim gubidjibar gidajidapm, gima nyani Yawaydjii djini-guyumban malimdjigi djining gurribi wana!" Bil biling gapirriwilingim yarim bil nyanyi ngurrinyban ray-yakirringir, bitma nyani bilingga wakal marrngili bil ginginy kiriny, marrga rarri inga bil balini. Marrga gumbałaban nyani bi wiñini gurrbili.

¹⁵ Manymak, milwartjini, ngunukirri wugilimirrpili bil bumir-duwarratjny kiriny djina bil bultjini kiriny, "Nunydjirriw nunydjirriw, bilayliban nyuni minydjny yilitjiwi nyungung nyanimngim ga walkiriwilingim, bintji nguni yați-wubirdjnyirbi ildny wingalamiyi marrga ngildji wurpi ildji balidjiban!"

¹⁶ Bil nyani Lut bidakipm marrkany kirinyban. Marrga biling wugulimirrpilim gumbirrdji djiny bil gatjidjini, girri djiny bil gundjirr-djitingiliban ngunyilipm gurrpululi; gima nyani Yaway inga mil-yilgidjini Lutgi.

¹⁷ Ga rirringir djin yulgungili gurrbingir, ngunukima wugilimirrpili inga bil bindjinibar Lutgi, "Nunydjirriwban ganydjirrdjipm bintji ngildji balidjibar! Bapi inydi ildji nyanyirringi, ga ingkiban ildji guldjigi bupalikinimirri nambidi gurrpulumirri; burrililinan bumirilin ildji nunydjirriw bintji djining yați-wubirdjnyirbi ildjny bangirigi ga ildjny bargi."

¹⁸ Bil nyani Lut yan bumir-gaypili, "Ingki, bunggawa!

¹⁹ Ngurrumi nyuni irriny gunggatjili ga irriny wanngirngili. Bina madjirriban nyuni irra mil-bilbalidjidi? Miri ngarri ingki ganydjarrgingin miri irr gatjigi ngunung bumiri mala gima bilay, yarim gunyambi irriny bargi malngiri marrga irr balidjiban.

²⁰ Djinim gurribi ninini dja'djarri ngunumi marri bilay, manymaktja irr nunydjirriban ngunyilipm gima ngidjirrkngi. Ngunung gurribi ingki wana bil nininikima. Bina butal ngunyilipm irr nunydjirriban marrga nambidi minydjirr nyinidji wanngipmbar nguli?"

²¹ Ga ngunukima wugili inga bumir-wubirdjili Lutgi, "Ngiy, djingirki mayaligi ngarri yitjidjnyirbi nyirrungunban; ingkiban marrga irr burtjildjigi ngunukima ninini gurribiwi nyuni irra bultjidjini.

²² Bil nunydjirriwban ganydjirrdjipmbar ngunyilipm, gima wirrppm irr djirrilbigi bala'pili yarimipm nyuni ngulikima yulgungi." Bilapilang miri djinimirri ngunung ninini gurribi djampalan djin bultjini giriny Djuwar, yarim ngunung yagirri mayali miri 'Ninini'.

²³ Manymak, walirr djapi yulgungu kiriny ngunukining nyani Lut rany kiriny ngunyili Djuwarli gurrbili, ga yilimirri djani djin gurrrin kiriny nyanimngim inga ga midipili-mirripili.

²⁴ Ga bilapilakinjing djunggi burrtjirrin ga bunggan balinyirakinjing ga'galminy kirinyban namngiri yanginyirbi Yawaybi, ga baringiliban Djedum ga Gumurra.

²⁵ Miri bilapilang Yawaydji djirrilbili ngunupili gurrbimirrpili, ga nyani malimdjili bubalkining: miri gurrbimimigi, ga warrpam wali djurriginy kiriny gurrpulumirri; bukmakban djin wirrdjini ngulikima wayalimirri, djin manydjinaban.

²⁶ Bil ngunukirri miyilk, Lutang nyanimngim yilimirri gurrpini kiriny Lutnyi, nyani murgungiliban; yarim nyani bapi inydi nyangipi. Girri naamngiri inga galmini rirrkiyampili miri djalkngi rirrkiyan mala djin baringil ngunukima miyilknyi, marrga nyani inydi birrindjinginaban, yarim djalkngidjinañanbirri ngunukima bumiri gurribi nyibirri nyani dja'djarri nyanggar Yawayngirar gadjiri balnggili.

²⁷ Nyani yulgungili bukilmirri, girri mildji inydi garrkarrpini gurrbimirrpili, bil wirrpm nyanyiri. Ga nyani milingili gurrpulumirrpili, bil wirrpm nya'nyanyiri gurribi; yarimban ngirimbiy wana burburdjny giriny gima bubalkinimirri ngunung wayali bungbuldjny girinyban, miri ngirimbiy duwarrngir wanangir.

²⁸ Miri bilapilang, nyani Goddji djirrilbili ngunupili gurrbimirrpili nyibirri Lut nyininy giriny. Bil nyani gingini Lutnyi marrga nyanyi yilitjili ngunungir gunyabingir, bintji Abrayam marr-mirgidjidi Lutgi; bilapilang God inga mil-yildjini Abrayamgi.

Lutang midipilimirrpili bil murgungili

³⁰ Manymak, rirringir ngunungir-kirri nyani Lut mirrpmban yawnginy giriny ngulikima gurrbimirri Djuwar nyi'nyininy, marrga ngunungir djin gubini, Lut, ga walkiriwilingim ngunupili mungimirrpili, ga djin walminiban bumirili gurribili; ga nguli inydiñ yirryirrpini bumirimirri, yarim naambidi miringmirri djin ngurriny giriny ngidawa bilaypilay yulpilingir.

³¹ Manymak, ngunung ngurrwagiping mungi inga wangini gaditingirgim, inga bindjin, "Ngiltjang gunydgirri nyani wurrunderdjirr kirimban; ga wirrpmban wurpi yul nyi'nyininy giriw djilikima ngimnilar, marrga ingki wari ngunupilang yul waymirri iltja ngurridji ngiltjar; yarim ngunukima miri rum bamanpi miyilkigi ga yulgi, bil ngiltjiki wirrban.

³² Ma', gunydgirrgiriny il gu'kung kiri nganitji galbi, marrga nyani babakindjidji. Ngunungir-kirri maliri, waymirri il ngurridji nyanggar miri minitjingimi, marrga il yidjipilikindjidji nyanggapibi gunydgirrgirapibi ngiltjang, marrga djampiligi ngiltjang mala wanngipm minydiñ nyinidi bintji ngurrgima."

³³ Manymak, maliri rirringir galbikima bil gungili nganitji, ngunukima ngurrwagiping midipili ragilinan nyangngali gunydgirrgirapibi, girri bil ngurrinyban. Bil nyani Lut wawu ngurrinyi gima ingki ginginyir nganitji, yarim ingkaban djiringinir ngunukining ngunung mungi djundjini ga inydiñ waykungili djamingi.

³⁴ Milwartjini, ngunung ngurrwagiping midipili inga wanginaban gaditingirgim, "Gu, gadjiri maliri ngarribipm ngurriban gunydgirrgirrar; ban djini'djining maliri madjirri girri nganitji il gu'kung kiri, girri nyunitjaban ragi ga ngurridjiban nyanggar, marrga il mala-pungi bintji ngiltjang gurrutigining gadjigarr guldjigi."

³⁵ Marrga djamingi, rirringir nyanyin bil gungili nganitji galbi, ngunukima djuditjpinq gadingimi ragilinan, girri bil ngurrinyban; ga madjirri nyani Lut ingki djiringinir miri ngunukima midipili ngu'ngurriny kiriny nyanggar, yarimban Lut wawu ngurriny kiriny.

³⁶ Marrga gima ngungirapibi biling wawayka, Lutang walkiriwilingim midipilimirrpili bil yidjipilikindjinaban, gunydgirrgirangipm bilngirang.

³⁷ Ga ngunung galitjirringirangpibi yidjipili yul bungtjili, ga ngunukima nyani yagirri yirrpini Muwap (Moab); ga djamingi ngunukima yul nyani ngurrdawalangu djina Mawabayit malagi.

³⁸ Ga nguni mirrdjingir miyilkdji marrngili yidjipili yul girri, ga nyani yagirri yirrpini Bin-Amiy; ga ngunukima yul nyani ngurrdawalangu djina Amunayit malagi.

20

Abrayam, Sara, ga Pilitjayin malang ngurrdawalangu

¹ Rirringir Goddji malimdjili ngunukima gurrbimirrpili Djudum ga Gumurra, nyani Abrayam minydiñ giralinan ngunungir gurrbingir, ga ngunyilipm girali Nigipili djawalili bumir-djalatjangili. Ga djani inydiñ yirryirrpini ngidjirrkng gurrbimirrpili Kaditj ga Djur, miri Abrayam, Sara, Abrayamang yidjipili Yitjmayil, ga bilngirang djamaginpili, ga maypal mala, bilapilang. Ga guyumi djin yilitjini wurpili gurribili, ngunukima gurribiwi Girar nyibirri Pilitjayin bapururr nyi'nyininy giriny. Ngulikima giliwiling djin nyininy girinyban.

² Manymak, ngunukining Abrayam nyininy kiriny nguli, nguni Girarbi yulpilingiri djin nyangini Sara. Bil nyani Abrayam djinanydji bultjini giriny Sarang, "Djinimkima miyilk nyani djining ngirrang gadingimi." Ga ngunuwiltji Pilitjayin mala djin gangili ngunukima djanguny nyannagli bungawali, ngunung Pilitjayin ngurrdawalangu nyi'nyininy giriny nguli Girar gurrbiwi, yagirri Abimilik. Marrga djamaginpili nyani Abimilikdji djiny yanilaban ngunyili Abrayamang gurrbili, marrga inga djin bagiligi Sarany. Djin yulgungili, girri Sarany djin djamirrdjini, girri bapilipm inga djin birlungiliban Abimilikgi.

³ Bil wurpm maliri, ngunukining Abimilik ngurriny kiriny, nyani yakirr-nyanginibar miri nyani God inga yulgungili ga inga bindjin wanginban, "Djini-guyum nyuni balidjiban, gima ngunukima miyilk nyuni djaminmi miri nyani wurpang yulang nyanimngim!"

⁴ Bil ngurwakng, nyani Abimilik ingki waymirri ngurrinyir nyanngar Sarar, yarim ingkpm ngidnjirrgili inga girinyir Sarali gima murtjili. Marrga nyani butjalminiban Garrayny, "Wirr, Garra! Bina butal miri nyuni bungi rum-manymakgining yul? Yarim ngarribi miri djuburr djunupa yul;

⁵ gima ngunukima yul Abrayam miri nyanibpm irra wangi, 'Djinim miyilk nyani djiningi ngirrang gadingimi', ga ngunukima miyilk nyanibpm irra bultjinmi, 'Djinim yul nyani djining ngirrang wuwnngimi'. Ga ngarri bilinggarr marr-yirrimkindjirri, marrga ngunukima miyilk iiri marrimban. Ingkban gumbirrdji irr murguwi!"

⁶ Girri God yan inga bumir-gaypili ngungirapibi mabugibi, "Ngiy, ngarri marnggi miri nyuni ingkiban djiringirri miri nyuni murgum kirim. Marrga ngarribpm nyirr way-mirrbilgim marrga nyuni ingki ngurridji nyanngar, bintji nyaninyi nyuni gatjigi gumbirrdji ga rum wubirdjigiban ngirrang.

⁷ Bil djunupaban ngunukima miyilk nyuni winidjingilgi nyanngali, gima ngunukima yul Abrayam nyani ngunung Godang djabarrgin, yarim nyani miri bultjinakin, djangunyili Godbi; ga nyani irryin butjalmidji nyungki, ga nyin wanngirgi balinyirbin-gir. Bil djiningkima nyuni marnggiban, ngunubilang nyuni ingki winidjingilgi Sarany, ngildji yirrimban ildji balidji, miri nyunibi, ga bukmak nyungung mala," inga bindjini God Abimilikgi mabugimirrpni.

⁸ Manymak, djadaw, nyani Abimilik inydji waykungili girri guwakuwatjili warrpam, nyanngang gurrutiginpili ga nyanngang djamaginpili, girri djiny butjirgindjilinan bublelikining God inga bultjinmi mabugibi. Ga ngunuwiltji djin guway-nirrdjili, ga mirrrpban djin yawnginiban.

⁹ Marrga Abrayamnyi nyani Abimilik guwadjili, ga inga bindjini, "Nyawban, mari wanaban inbiliny barngilinan gima nyungupibi. Nyim gunyambi inmarr djamadjimi marrga djinimirri nyuniban irra mari-djamadjimi ngirrki? Gima nyungupibi nyani God inbila madakarritdjininan, ngirrki ga ngirrang malagi. Nyuni inbila gar-yulgimi, yarim nyungung djuburr miri mirgidjnyakin ngirrki; gungi inma mirikunu!

¹⁰ Nyimpi bilang nyuni bindjirr ngurrigma?" bilapilang, nyani Abimilik yan manbi inga wangini Abrayamgi.

¹¹ Ga nyani Abrayam yan bumir-gaypili, "Ngarri ginginyi miri, birralkima djiniwili Girarmimigi yulpili ingki djin marnggi Godgi, ga ingki djin marr-bulanggitdjidji rumgi Godang, marrga irrin ydin bungi ga ngirrang miyilk djin djamigiban.

¹² Bil djining djanguny birralkima miri nyani Sara miri ngirrang gadingimi; gima nyani miri walkirpm inga gunydjirrgirki ngirrang, bil ingki nyani ngirrang ngambirrgirrang rambirri, bil wurpang ngambirrgirrang. Marrga inydji liny marrngili, ga nyani ngirrang nyanimngimban.

¹³ Ga gima ngungirapibi, miri biligi nyadji Goddji minydk yanili ngirrinyi marrga irr gukirri girim gurrutinyirringi, ngunukiningban ngarri ingarr wangininan Saragi, "Ngarri djal miri djinimirri nyuni irra marr-bulanggitdjidji: yarim nyibirri nyibirri gurrbiwi il yulgungi, ngulikima nyuni inydji bultjigiban ngirrangi, 'Djinimkima yul nyani ngirrang wuwnngimi', bilapilang ngurrigma nyuni djina wangidji." Bilapilang Abrayam inga bindjinban ngungirkil yulgi Abimilikgi.

¹⁴ Manymak, nyani Abimilik marrngiliban galbi miri maypal bimbi, bulukipili, ga djamaginpili - yul ga miyilk; girri Abrayamgi djiny gupirr-gungiliban. Ga Sarany nyani winidjingininan ngirrigima.

¹⁵ Girri inga bindjin Abrayamgi, "Djinimpan, ngirrang djawal lapdjilinan nyungki: rawban ga nyibirri nyuni djal ngulibani nyuni inydji yirryirrpigi."

¹⁶ Girri Saragi inga bindjinban, "Galbi rrupiya ngarri gungban wuwgiriny nyungung, miri 1,000 didipili, miri bilapilang milmaban ngarri djinyirr mil-lirrpigiban warrpamnyi miri nyuni rum-manymakgining miyilk."

¹⁷ Rirringir ngunungir-kirri nyani Abrayam butjalmini Godnyi, ga nyani Goddji burri-wanngidjnyirdjilban ngunukima yul Abimilik, marrga nyani galng-manymakdjinaban. Ga wurpi mala Goddji burri-wanngidjnyirdjili girri, miri Abimilakang nyanimngim ga djamaginiŋ miyilkpili; marrga djamingi djanı ganydjarrgindjidji miri budjirimirri djin mini giri yidjipilpili.

¹⁸ Gima ngurrwakngi, ngunukining nyani Abimilikdji djaminmi Sarany, nyani Goddji minipmban yarrpili djina miyilkpilngirang, marrga ingkiban djin gapalmirrpilidjidji; gima nyani Abimilikdji djaminmi Sarany Abrayamang nyanimngim.

21

Yisak bungtjili

¹ Ga nyanyini nyani Yawaydji djakadjili Sarany, miri nyangapibi Godbi yuwirdjing yidjipili birraldjili, ngunung Goddji murr-rangirri,

² girri nyani yidjipilikindjabin ngunukima miyilk Sara, ga guyumi nyangapibi ngunung yidjipili yul bungtjili, Abrayamang walkiringim ngunukima murr-randinbirbi Godbi. Ga bilakining nyani Abrayam wurrungdjini, bil yarim ngunukima yidjipili bungtjili ngunukiningban miri ngunung ngurrgima walirrdji miri God inga bultjidjini biligi.

³ Ga Abrayam yagirri yirrpini ngunung yidjipili Yisak (Isaac). (Ngunung yagirri mayali miri 'Gitgit').

⁴ Ga ngunukining miri 8 yakirri bangiringili Yisakgi, nyani Abrayamdu marrngili birrang, girri nyanyini gurrmildjilban, miri ngunung ngurrgima rum Goddji yirrpini ngurrwakngi.

⁵ Ga Abrayam miri nyani bir-gayping yul bilakining, nyani ngurrum gatjidjini 100 gunmal ga rarranydjarr ngunukining Yisak bungtjili.

⁶ Ga nyani Sara inydji bultjidjini bindjin, "Nyanngapibi ngarri gitgitdjimi Godbi, ga bukmak miri ngunuwilu djining djanguny djin marrngiirrdji mala irra djin maltjigaban djin nitjanydjidjiban girri."

⁷ Ga nyani gurrkungili wanginban, "Wari ngirrinyi inga bultjinir Abrayamgi, miri nyadjii ngunupilang guyumi irr mini yidjipili, ga ngaman gungi inga yidjipiligi! Wirrgima! Bil marriban, yarim Abrayam wurrungban, bil djinipankima ngarri minigimi walkiripm inga."

Bilngiriny Yagar ga Yitjmayil minyndji yanili Abrayamdu

⁸ Manymak, ngunukirri yidjipili djurrginyi, ga ngunukining nyani marri wana, nyani Sara dadawdjinaban gunyirngir ngamannngiri. Ga ngunupan, yarim ngunung ngurrgima manngibirri, nyani Abrayamdu djanguny yanilban marrga babalikining inydjin gurrkungi bunggulgi wanagi, marrga maypal ga wali djin dirradj nyinidjiban ngunung gulukngwilidji; yarimban inydjin ralkungi Abrayamgi ngungirki yidjipiligi.

⁹ Manymak, gulukng wana dirradj nyinintyi, ga biling yidjipilimrrpili Yitjmayil ga Yisak inydji bil walngirrin kirinyban. Yarim ngunung yidjipili Yitjmayil nyani budjirribi Yagarbi, ngunukima Sarang djamaginiŋ miyilk. Ga nyani Sara bilny nyany kiriny bil walngirrin kiriny, ga ngunung ngurrgawiping yidjipili Yitjmayil nyani mil-dinytjilban gulmigipm inga, ga inga gitgitny kirinyban Yisakgi. Ga nyani Sara mil-marnnggibban,

¹⁰ marrga inydji birrindjinginaban Abrayamdu ga bindjin wangin, "Nyuni bilngiriny badji-nyawban, minyndji ngurrgiwi ngunukima djamaginiŋ miyilk ga nyangang gapirri! Guyumi nyuni wirrdjidji, ga ngirrang gapirri Yisak nyani bipm marrgiban nyim mala bulanggit nyungupibi, miri nyani bipm ngidawa; bil ngungirki ngunukima miyilk gapirringirgim wirrbani ingal!" bindjin Sara yan-mambti wanginyi inga.

¹¹ Bil nyani Abrayam mirrpmban marr-mirgidjinaban, gima ngunung yawirrin yitjmayil nyani girrgima nyangapibi Abrayambi walkiripmi.

¹² Bil nyani God bindjin wangin inga Abrayamgi, "Ingki marr-mirgidjii nyanki Yitjmayilgi, ingki inga wargugudjii miyilkigi ngunung dapmiynyirbi djamaginiŋ inma. Manyamktja nyuni bintji ngurrgima miri nyalikidjini nyani Sara inma bultjidjini, gima Yisakmirrpni nyuni mala-pungi marrga nyangamirrpni nyungung gurrutiginingirang mundan minyndji djirridji inydji mungbinigi.

¹³ Ban djingirki, ngunung djamaginiŋirang gapirri, ngarri mala-pungi wana nyangamirrpni girrigima, gima nyani wurpi miri nyungung yidjipili."

¹⁴ Manymak, milwartjini maliri-gunyirri, nyani Abrayamdu wali marrngilaban, ga gapi nambidi gilingkalmirri maypalang marrngili rarrtjal, girri burrili gilibili Yagarli. Girri nyani marrngili nyangang yidjipili Yitjmayil, girri minyndji bilny yanilban murrurrtli.

Biling bil gubini, ga bubaliban bil gukirriny kiriny wirrpil-mirrpmi, ngidjirrkngi ngunung gurribi Biya-Djiba (Beer-Sheba).

¹⁵ Miri yakirri galbi bil gukirriny kiriny, girri gapiban bil malimdjili. Marrga nyani Yagardji galwupini yidjipili gurrtjimirri munganmirri,

¹⁶ girri marri bilayli minydji girali ga nyininibar; gima nyani inydi wangini, "Ngarri ingki djalngdjiyi miri irr nyangban ngirrang yidjipili balidji." Ga bilapilakinng ngunung miyilk ngurr-yirrpinibar ngadjinibar mirrpbani nguli marri bilayngiri yidjipilingir nyanggangi.

¹⁷ Bil nyani God marrnginibar ngunukima yidjipilang bimbi ngadjny kiriny. Ga wurpmi Godang wugili djamaginiing inga witjilibar Yagargi namngiri, nyani bindjin, "Nyimkibar nyuni marr-mirrgidjirr kirrimbar Yagar? Yawnginyirringi, gima Goddji inga marrngini bimbi ngadjnyirakinng nyanngapibi maribi yidjipilangirangpibi.

¹⁸ Guwu, marriwban ga djaltjibigi yidjipili, ga djalng-gungban inga; gima nyani Goddji djingiriny gungi mala-punyirbi galbi mirrpmi, marrga nyanganngapuri minydjin djjirridji miri yagirri-wana mala," bindjin ngunukima wugili Godbi.

¹⁹ Girri Goddji mil-lapmiyngili inga marrga nyani djiringinibar miri ngunumkima gapi bungbungdjili ralalngiri. Nyani nyangini gapi, girri marrngilibar ngunung gumbala gilingkal, djjirrdjirrdjili girri gangilibar gapi, ga inga minali yidjipiligi ga nyani dirradjilibar.

²⁰ Manymak, ngunukima yidjipili Yitjmayil galng-wanadjini, ga nyanyi Goddji djakadjny girinyi. Ga ngulikima ngunung yul Yitjmayil nyininy girinyi yirrpimirri, ngunukima gurribi djin bultjidjini Paran, ga nyani djambatj mirrpmi bow-gi maypalgi.

²¹ Ga guyumi nyanganngapuri ngambirri marrngili miyilk nyanki Yitjmayilgi ngungirapibi gurribi Yidjipt-bi.

Abrayam ga Abimilik nguli gurribiwi Biya-Djiba

²² Bilakinngi Abimilik ga Pikul Abimilikang ngurrdawalangu gamununggu malagi, biling bil balparingili Abrayamnyi. Ga nyani Abimilik bindjin wangin inga, "Miri nyim ngunupilang djama nyuni gatjinni, yarim nyani Goddji nyin gunggatjimi.

²³ Marrga yagirrimirri Godangmirri nyuni irrinny murr-ranibar, miri bilapilang gam': ingki nyuni irrinny gar-yuli ga ingki nyuni djina mirgi-djamadjigi ngirrang gurruutiginingirgi; bil ngunyili yipi irra mil-bilbalddjidi giri, ga djakadjigi djining gurribi nyibirri gurbimirri nyuni nyini girimbar; yarim miri ngunung ngurrgima ngarri nyirr djakadjim girim nyuninyi."

²⁴ Ga nyani Abrayam inga bindjin, "Ngiy, ngarri murr-rangirriban."

²⁵ Girri nyani yan manbi inga wanginibar Abimilikgi bil miri yilimbirring, nyani bindjin gima Abimilikang djamaginpilingir djin gatjinni ngunung ralal Abrayamdjii gaminmi bilimi.

²⁶ Bil nyani Abimilik yan bumir-gaypili, "Ngarri djunga miri wili gatjinni ngunukima ralal nyuni gamirrdjini. Nyuni wirrgima irra bultjirri, ga ngarri wirr irr marrngirriy djining djanguny yarimipm djinipankima."

²⁷ Girri nyani Abrayam marrngili maypal bimbi mala ga buluki mala, girri gupirr-gungilibar Abimiliknyi. Bilapilakinng inydi bil murr-rangirriban, yarim nu bilingga bil yirrpinibar, miri bilapilang gam': rum magayagining inydi bil gurrpigi ga bilingganydjii bil mil-bilbalddjidi.

²⁸ Ga nyani Abrayam butnyirdjili 7 bimbi maypalpili miyilkpili, ga bapili gangili gurribi ga djani bimbipili nguli dja'djarriny kiriny milmaban Abimilikar.

²⁹ Marrga nyani Abimilik butjalmi Abrayamnyi, "Nyimgima djining mayali miri ngunumkima bimbipili nyuni rindilali, ngunuwi rarrmalipm dja'djarri, miri nyimki?"

³⁰ Ga nyani bumir-wubirdjili, "Djining mayali miri; bilang nyuni marrgi djiniwiliny, nyunibar mil-lirrpigi bupalikininginyi miri ngarri birral irr gaminmi djinim ralal gagipi."

³¹ Manymak, gima ngungirapibi djangunybi djin bultjini giriny ngunukima gurribi Biya-Djiba, gima ngunung yagirri mayali miri 'Biling murr-rangirri', gima biling inydi bil murr-rangirri ngulikima, bilapilang.

³² Rirringir ngunungir-kirri bilingi Abimilik ga Pikul, ngunung bunggawa miri gulinydjarr malagi, bil gubinibar ga bil wiñini djawalili bilngalipm, ngunung Pilitjayin djawal.

³³ Ga nyanganngangi Abrayamgi, nguli Biya-Djiba nyani lamudjili djamban gurtji, ga ngulikima nyani bumir-witjiny giriny Yawaygi ngunukima God Wanngi-giliwilingakinng.

³⁴ Ga giliwiling bildjirri nyani nyininy giriny nguli nambidi ngunung Pilitjayinar gurbimirri, yarim galbi gunmal ga rarranydjarr.

22

Goddji manyangini Abrayamnyi

¹ Rirringir bamannigir nyani Goddji manyangini Abrayamnyi miri nyimkining djakiy. Nyani inga witjili, "Abrayam guwa!" "Nyimay? Ngarri butjir inydjirr gum kirimban," nyani bindjini Abrayam.

² Girri nyani Goddji inga bindjini, "Guwu, marriwban nyungung walkiripm Yisak, ngunukima yidjipili marr-bulanggitnyirbi nyungupibi, ga nyum nyim giriban gurrbili Murayali. Ga ngunukining nyim yulgungi, ngarri nyirr mil-lirrpigi bumiri gurrbi, ga ngulikima nyuni bungban Yisaknyi gurbimirri gungimirri ngunung wurpmi nyirr mil-lirrpigi, yarim nyuni rani ga batjigaban miri mundjarr burrtjirrinnyirbi gunyirbi ngirrali," God inga bindjin.

³ Manymak, milwartjini nyani Abrayam inydji waykungiliban. Nyani marrngili nyininyirbi ga gilibili burrili dungki-li bitma yaraman. Girri nyani marrngili djunggi biral, barrbilpildjili djunggi ngunung djaming rarrtjilkungi. Girri marrngili yawirrinymirrpili nyanganng djamaginingmirrpili, ga Yisak nyanganng walkiringimi, girri larrban djin walminiban bumir-lunggurrmali, ngunyilipm ngunung bumiri gurrbi God inga bultjimi.

⁴ Djin giriny nyininya-a-a yakirr bingili. Milwartjini larrban; ga malngiri nyani Abrayamdjii bumir-nyanginibar gurrbili bilaypmi.

⁵ Girri nyani bilingga wangini djamaginingmirrpilim, "Nyumi djiligima nyim djirridji, nyumi ga djining dungki nyim marrkang djili, bil ngilinyi ngunyilatju liny giriban; liny bumir-kirrbigi Godnyi ngunumi, girri bapilaban liny winidji nyumilali."

⁶ Girri djunggi mala nyani gilibili burrili Yisakang Abrayamdjii, bil nyani bipm gumbirridji minali birlang ga balinyirring ngirrtjnyakinng marrga rarrtjilkungi djunggi. Girri biling gididjirrim bil giraliban.

⁷ Bil giriny nyininya-a-a, malngiri Yisakdjii yanyangini gunyddjirrgiriny, nyani bindjin, "Malu?" "Nyim walkira?" bindjin Abrayam. "Djining irr minigim kirim djunggipili, ga nyunibi minigim kirim ngirrtjnyakinng djunggi, bil nyalipan ngunung maypal bimbi il bungi ga batjigi miri mundjarr Godgi gunyirbi ngiltjapibi?" bindjin Yisak.

⁸ Ga nyani Abrayam inga bumir-wubirdjilinan, "Ngunukima maypal bimbi Goddji nyanganarki iltja gungi, walkira." Ga biritirri biling mungu bil giraliban ngunyilipm.

⁹ Bur bil yulgungili nguli ngunung gurrbi God inga bultjimni Abrayamgi. Girri nyani yip mutjpiningiliban rirrkiyanndji, girri namiliban gilibili djunggipili ga djarpindjinginibar, girri walkiripm inga garrpinibar mundandji, djaltjibili, girri giliban namiliban djunggimirri.

¹⁰ Birrangan bat, way djaltjibili djini-guyumban bungban walkiripm inga,

¹¹ bil bilapilakinngban namngiri bimbi inga witjiliban wugilibi, "Abrayam! Abrayam!" inga witjili Yawayang wugili djamagini. Ga nyani Abrayam bindjin, "Nyimay? Ngarri djinipan!"

¹² Ga nyani bindjin, "Guldjiwban! Ingkiban rarri! Ingkiban nyuni galng inga mirgidjiwi nyaniyi! Ngiy, djinimirriban ngarri inmarr marnngidjini nguygi, miri nyimkining djakiy inma. Miri bilapilang nyuni bintji ngurrigma butjirgindjidji yan gunyirbi ngirrapibi, gima nyuni ingki irra mrrbilginyiri ngirrkii nyungung walkiripm nyungung marr-balanggitnyirbi yidjipili."

¹³ Rirringir nyani mukdjili, namiliban nyani Abrayam milingili, girri maypal bimbi mildji bipinibar ngulikirri, miri wana bimbi yul; yarim ngunung bimbi gunigattjili butjiridji gurrnjimirri waymirri. Marrga Abrayamdjii marrngiliban ngunukima, bipini, yipmirri rirrkiyanmirri galwupini, girri batjidjinibar miri mundjarrban Godgi gungili; ga nguni maypaldji bilamirri djamirrdjinibar ngungirkii yidjipili. Bilapilang, Abrayamdjii yidjipili rirrang inganydji galwupini ngunukima maypal bimbi.

¹⁴ Ga nyani Abrayam yagirr yirrpini ngunukima gurrbiwi "Yaway Gunyirakinng"; marrga gima ngungirapibi yulpili djin wang girimp mungu djini'djining, djin bindjirri, "Nguli bumirimirri gurbimirri Yawayang, nyani inmila gungi".

¹⁵ Ga nyani madjirri inga witjili Abrayamgi ngunung wugili ngunungir namngiri, inga bindjin,

¹⁶ "Abrayam, nyani God djining djanguny inma yaniliban nyungki gam': Ngarri djining inmarr gungban mañit murr-randinirbi, ga ingki yan irr wubirdjigi bintji ngarribipm

yagirri inydjirr mirgidjigi. Gima nyuni yan butjirgindjini ngirrang, ga ingki irra mirrbilginyiri nyungung walkiringim ngunung nyuni marr-bulanggitdjirri,

¹⁷ ngarriban inmarr mil-bilbaldjidji ga bulanggitj mala nyirr gungban, miri bilapilang gam': nyungung mala-punyirbi inydjin ngurri ga djin galbidjidji, yarim wana gulukng miri ngunuwili gata mala qammirri dji'djarri ginimbirrimirri, ga miri munatja rirrpidi mala munganmirri gapi djalkngmuri ngu'ngurri, miri bilapilang nyungung gurrutigining mala djin galbidjidji. Ga ngunubilang wurpili bapururradj mari djina djin djamadjigi gurrutiginingirgi inma, djani nyungung mala-punyirbili djiny djin wingalamiyi ga gurrbi djina djin djamigiban.

¹⁸ Ga nyungupibi mala-punyirbili bukmak bapurrrr mala djili gurrbi-munganmirri djani inydjin marrkapdjigi, yarim ngunukima birraldjidji gima yan nyuni butjirgindjini ngirrang," bilapilang ngunung wugili inga bindjin djining djanguny gunyirbi Yawaybi.

¹⁹ Manymak, biling Abrayam ga Yisak bil wininiban bilinggali ngunukirri yulmirrpili bil marrkany kiriny ngulikirri, girri warrpamadjin gubini Murayangir gurrbingir ga ngunyilipm Biya-Djibalibin djin wininiban. Ga rirringir ngunungir-kirri nyani Abrayam giliwiling nyininyi ngulikima gurrbi Biya-Djiba.

Nayurang gurrutiginingirang mundan

²⁰ Manymak, marri guyumi wili inga birrungili djanguny Abrayamgi gurrutiginingibi walanggarrangir djawalngir. Ga ngunukima djanguny inga bultjidjini gam': "Milka, nyanimngim Nayurgi, nyani girri miri yidjipilpili minigim girim nyanngapibi Nayurbi nyungung gulmingimi.

²¹ Miri Yutj, nyanngang milimiti, girri Butj, girri Kimuwil (ngunung djampang miri gunyldjirri Aramgi);

²² girri djining yulpili mala yagirripili: Tjisit, Yatju, Pildatj, Djitlap, ga Bituwil."

²³ Miri ngunukima yul Bituwil, nyani miri gunyldjirri miyilkigi yagirri Ribika ngunukima miri guyumi nyanimngim Yisagi. Djiniwiliny 8 yidjipilpilngirinyi nyani Milka minigimi budjirrimirri Nayurbi, Abrayamang gulmingim.

²⁴ Ga wurpi miyilk Nayurang yagirri Riyuma, ngunung bitma nyanimgim bil djamaginiing inga, nyani minigimi yidjipilpilngirinyi Nayurbi girri; djining yulpili mala yagirripili gam': Tiba, Gayam, Tayatj, ga Maka.

23

Abrayamadj bayimdjili miring mulugining

¹ Manymak, nyani Sara gatjidjini 127 gunmal ga rarranydjarr;

² girri nguli wirrdjini gurrbiw Kiriyatj-Arba, nambidi ngunung wana gurrbi Kanan. Ga ngunung gurrbi Kiriyatj-Arba djamingi djin bultjidjini Yibrun. Manymak, Sara wirrdjini, girri nyani Abrayam ngurr-yirrpimban inga ngadjiniban Saragi. Nyani munganmirri nyininyi giriny nyanngar ngunukima balinyirbi Sara, inga ngadjny kirinya-a-a, girriban.

³ Nyani mukdjili ngadjnyirngir Saragi, inyddji waykungili, girri gurrbiwatanguny malany djiny balparngili, ngunuwili yulpili mala bapurrrrbi Yitayitbi. Nyani nyinini djanngar, girri inydjin bultjidjinaban.

⁴ Nyani Abrayam djina bindjini, "Yarim ngarri yul gurrbinyirring djili ngildjar waymirri irr nyini girim gima mulkuru irri, bil marriban, ngarri irr djal miri ngildji irriny ildji djilimdjigi wurpmi ninini gurrbi marrga nguli mulumirri irr djalirgi ngirrang balinyirbi gurrutigining mala."

⁵ Ga djani inga djin bumir-wubirdjili Abrayamgi, "Bidak, butjir-inyddji guw bunggawa!

⁶ Nyuni miri yagirri wana yul, ngunukima yirryirrpimirbi Godbi, ga djili nginbilar nyi'nyini. Manymak, nyuni rindiliq wurpmi ngunupilang butal mulugining gurrbi nginbilang, girri nguliban nyuni djalirgi nyungung balinyirbi gurrutigining mala. Ingki wili inma mirrbili nyungki mulugining gurrbi nginbilang marrga nyuni djalirgi nyungung gurrutigining mala."

⁷ Girri nyani Abrayam gupildjini, miri bilapilang nyani djina bumir-kirrbili.

⁸ Girri madjirri Abrayamadj djiny butjalminiban, djina bindjin, "Ngunubilang ngildji birral djalngdjerri miri ngirrang balinyirbi mala djiny irr yilitjigi ga djiny irr djalirgi, ngildji yitjidjidjiban miri ildji butjalmidji ngunukima yul yagirri Yiprun walkiringim Djuwargi,

⁹ marrga nyani irriny djilimdjigi ngunung miring ngu'ngurri gurrbiwi nyanngar. Ngungirkirki ildji marnggi, ngunung miring ildji bultjin girim Makpila, ngunumi dja'djarri galymirri gurrbimirri nyanngar. Ngunubilang ngunukima nyani irriny djilimdjigiban milma, ga ildji mil-marnggidjidi, ngunung irr bayimdjigiban miri nyabiniwili rrupiya nyani irra bultjigi, ga irr galikiban ngunung, miri ngirrangpibi mulugining gurrbi."

¹⁰ Ga nyani Yiprun ngulikirri nyininy kiriny, ga nyani butjir-marnggidjini Abrayamgi. Ga ngunukima yul Yiprun nyani girri miri ngungirapibi Yitayit bapururrabi. Miri ngunutjini yul mala nyininyi nguli gurrbimirri rarrimirri munganmirri gadjigirring, djani miri ngurrławalangupili wanapilimerring ngungirapibi gurrbibi, ga rum djin djakadjny giriny ngungirkı gurrbigi.

¹¹ Manymak, nyani Yiprun marrngini Abrayamnyi, girri yan inga bumir-gaypili Abrayamgi, "Ingki, bungawa; bidak, ngarri wangidjiban. Ngarri gupirri-gungban nyungki ngunukima miring ga ngunung gurribi nyibirri ngunukima miring ngu'ngurri budjirrminy. Djining miri mundjarr inma, ga milmaban ngarri nyirr gungban, marrga ngirrang gurrutiginpili djili djin nyi'nyini mala djin mil-marnggidjidjiban. Manymak, guwu ga nyungung balinyirbi nyuni djalirgibana nguli."

¹² Ga madjirri nyani Abrayam djina gupildjinaban ngungirkı gurribiwatangugi malagi;

¹³ girri nyani inga wangini Yiprun-gi milma djanngar, "Bilang manymak nyunguri miri nyuni yitjidjidi, ngarriban nyirr gungi rrupiya ngungirkı gurrbigi. Yarim irr bayimdjigi rrupiyadjı, ga ngulibana djiny irr djalirgi ngirrang balinyirbi gurrutigining mala."

¹⁴ Ga nyani Yiprun inga bumir-wubirdjili Abrayamgi, inga bindjin,

¹⁵ "Manymak, butjir-inydi guw bungawa! Manymak ngunukima gurribi nyuni bayimdjigiban nyabiniwili marri, yarim 400 didipili; bil djining rrupiya miri marrmalngiri ngiltjiki, il marrbigi rrupiya ga ngunukima gurribi ngarri nyirr gungi nyirr mungbinigi. Girri nguli nyuni djalirgi nyungung balinyirbi mala."

¹⁶ Girri gidagidapm nyani Abrayam yitjidjini miri bayimdjigi Yiprunngir, marriban rrupiya wana bil nyani marrngilipmban. Nyani djarrdjingini rrupiya girri milmaban butjurrudjili 400 didipili, ga ngunuwiltji gurribiwatangupili djani inga djin mil-marnggidjini. Nyani Abrayamdjı galwupini djunupa rrupiya bilapilang miri rrupiyadjamagini rum djina bultjidjini ngunuban bildjirri.

¹⁷ Bilapilang, Yiprunang gurribi, miri ngidjirrkng Mamri'ang gurribi ngu'ngurri, nyani Abrayamdjı bayimdjili; miri ngunung miring ga warrpam ngunung gurribi inydi garrpinerbi ga warrpam gurrtipili nambidi ngunung gurrbimirri; djining mala Abrayamdjı galini girinyban.

¹⁸ Ga bukmak ngunuwiltji gurribiwatangu mala inga djin mil-marnggidjini miri Abrayamdjı galiki giri ngunung gurribi miringgining ngunyili yipi.

¹⁹ Rirringir ngunungir-kirri, Abrayamdjı djalirngili Sarany nguli mulumirri miringmirri, ngunukima gurribi djin bultjini giriny Makpila budjirrminy Kananmirri gurrbimirri.

²⁰ Miri bilapilang Abrayamdjı marrngili ngunung mulugining gurribi djanngangir gurribiwałtangungir ngungirapibi gurrbibi, ngunungir Yitayit bapururrngir.

24

Yisak ga Ribika

¹ Manymak, rirringir galbi gunmal ga rarranydjarr inydi bangiringili, nyani Abrayam wulmandjiniban mirrpmban; ga ngurrwagipi nyani Goddji inga gungili galbi manymak mala ga djagadjili nyanyini.

² Manymak, nyani Abrayam djiringini miri nyanyang balinyirbi bildjirri ngidjirrgidjini inga. Marrga nyani inga witjili nyanyang bunggawagi djamaginiingirgi, ngunukima yuldji djakadjny giriny bukmak girripili Abrayamang. Nyani yulgungili, ga Abrayam inga bindjin, "Nyuni gumbirri-rawban bapili nambidili gandili ngirrali,

³ marrga milmaban nyanyang Yawayngirar nyuni irriny murr-ranibana miri ingki djingirapibi gurribi nyuni marrgi nyanimngimi Yisakgi; yarim miri djili lim nyini girim djanngar djinikima Kananayitar malar, bil ingki nyuni djamigi miyilknyi djiningir bapururrngir, bilapilang nyuni murr-ranibana milbimirri Godar ngunukima Miligidjı gurribi ga ginimbirrigi.

⁴ Ga nyuni irriny gungi murr-randinirbi miri nyuni winidji ngunyili djawalkitjili ngirrali, marrga ngunungir nyuni inga marrgi miyilknyi walkiringirgin irra Yisakgi djanngapibi ngirrang gurrutiginpilngirapibi."

⁵ Ga ngunung djamaginiing inga bindjin Abrayamgi, "Ngunubilang ngunung miyilk irriny ingki-pultjigi marrga nyani ingki irriny gurripigi bapili gurrbili, nyalikibana ngarri ingarr marrgi miyilk Yisakgi? Bina manymak miri nyungung walkiripm irr gangban ngunyilipm?"

⁶ Bil nyani Abrayam inga bultjidjini, "Ingki ingki! Ingki nyuni winidjingilgi ngirrang walkiripm ngunyilipm!"

⁷ Yaway, ngunung Miligidji nammirri nyi'nyini, nyani irrin yjamirrdjini ngirrangir gunydjirrgirang gurrbingir, ga ngunungir gurrbingir nyibiri irr bungtjili, ga nyani irrin ymurr-rangirri djinimirri gam': 'Ngarri djinarr gungi djinining djawal malapunyirbigi nyungungkima'. Marrga nyani bi inma yani nyanngang djamagining wugili miri inma gunggatjigi marrga ngunungir gurrbingir nyuni bi birrugi miyilk inga bapili Yisakgi ngirrang walkiringirrim.

⁸ Ga bilang nguni miyilkdji nyin ingki-pultjigi ga ingki nyin gurppigi, nyuni yarangdjidjabai djinining murr-randirnirbingir; bil ingki nyuni winidjingilgi ngirrang walkiripm ngunyilikima, wirrpm!" inga bindjin Abrayam djamaginingirrim.

⁹ Ga ngunukirri yul gumbirri-ragilaban nambidili gandili Abrayamli, girri inga murr-rangirriban bunggawagi.

¹⁰ Manymak, nguni djamaginingir marrngili 10 kamulpili Abrayamang, ga galbi wurpi wurpi mundjarr mala djiny gurtjili nyanngapibi bunggawabi, girri djingiriny malany djiny birrpirlungili ga djiny gilibili burrili kamul-li, girri larrban nyani ga nyibi wurpilipi djamaginpili Abrayamang. Djin giriny nyininya-a-a, yakirri galbi, ga djawalmirri Mitjuputamiya (Mesopotamia) djin yulgungili bilay pirr nyibirri djani Nayurang mala-punyirbi djin nyininyi.

¹¹ Manymak, nguli gar-gurriyili gurrbimirri biligi djani yulpili djin gamirrdjini ralal wana marrga gapi djin marrgi; ga giliwiling mala bitma djapidi ngurrinyi nguli munatjamirri marrga ngunyili gapi djin djululupmiyngili marrga maypalpilingiri djin dirradjigi. Ga ngunukining Abrayamang djamagining yulgungili ralalmirri, ngulikima nyani guldjilaban, ga nyanngang kamulpili inydjin bundirrdji rangirri ga gandi inydjin galdirrdjini. Ga waljirr ngidjirrkngban mungan inydi yirrpini kiriny. Yarim ngunung bildjirri bilakining miyilkpili bi djin giri ralalili gapi djin marrgi.

¹² Ga Abrayamang djamagining inydi galwupini kamulngir, girri bumirigindjilinan Yawaygi, nyani inga bindjin, "Yaway, Miligidji ngirrang bunggawagi Abrayamgi marrngirriyban: bina djini'djining manngibirri nyuni irra mil-lirrpigi nyim ngunupilang djangunyining, marrga irr marrnggidjidi wirinyi miyilknyi nyuni inga manyangini Yisakgi. Miri bilapilang nyuni inga mil-bulanggitdjidji Abrayamgi ga inga gunggatjigi ngirrang bunggawagi.

¹³ Ngarri djili irr djirridji ralalmirri irr bumiri-bargi bilakining bildjirri midipilipili djingirapibi gurrbibi bi djin giri marrga gapi djin marrgi.

¹⁴ Ga ngunukining wurpm yulgung, ngarri ingarr bir-kiri ga butjalmidji miri bilapilang gam': "Bina manymak nyuni irra djirrdjirrdjigi nyungung dandanga marrga gapibin irr dirradjigi?" Ga ngunubilang ngunukima midipili irra bintjiban, "Ngiy manymak, dirradjiw, ga gapi irr marrgi ga djinarr gungban kamulgi malagi nyungung garrisima," irr djiringilgibin bilang miri ngunukima midipili nyani miri yirrirpinirbi miyilk nyungupibi, marrga nyungung djamagining yul Yisak nyani marrgi ngunukima miyilk miri nyanimngim inga. Bilapilang irr marrnggidjidjiban miri nyuni inga mil-bulanggitdjini Abrayamgi ngirrang bunggawagi."

¹⁵ Nyani mukdjili, girri gidigidapmban nyani Ribika yulgungilinan gurrbingir miniginy kiriny dandanga bapimirri nyangan. Ga ngunung midipili Ribika nyani miri walkiringim Bituwilang, ngunung yul budjirribi Milkabi - ngunung nyanimngim Nayurang, ga Nayur nyani miri Abrayamang gulmingim.

¹⁶ Yarim ngunukima midipili nyani miri mirrppmi djal-malimaling, bil wirr inga minitjingim miri, yarim nyani djuburr bulanggitj nyimin yirrpini kiriny. Manymak, nyani djundirrdjini gapili, butirrdjini dandangany, girri walminiban.

¹⁷ Ga ngunukima djamagining yul inga qunyndjirrali ga inga bindjin, "Bina butal miri ninini gapi irr dirradjigibin nyungur dandangadji?"

¹⁸ "Ngiy, dirradjiw!" nyani bumir-wubirdjili, girri gidigidapm inga djirrdjirrdjili dandangany, girri gumbirridji gatjini kiriny bilakining nyani dirradjny kiriny.

¹⁹ Rirringir nyani dulpidjini, ngunukima midipili inga bindjinban, "Kamulgi malagi nyungung djinarr marrgibin gapi marrga djin dirradjigi ga djin dulpidjidji girri."

²⁰ Girri nyani djululupmiyngili dandangany ngunyili djapidili maypalang, girri wiñini gapili, butirrdjini, girri bapili minali ga madjirri djululupmiyngili djuluk nambidili djapidili; girri bi'bininy ngurrsgima mi'miniginy kiriny gapi yarimpim kamulpili djin dulpidjini.

²¹ Ban Abrayamang djamagining dja'djarrinyi nyi'nyanyi ngunukima miyilknyi, nyani mukny djarriny yungan yarimpim nyani marrnggidjini ngunubilang nyani Yawaydjii inga djamadjili manymakdjili, u ngunubilang ingki.

²² Rirringir ngunuwili kamulpili djin guldjili dirradjnyirngir, ngunukirri yuldujii djarrdjinginban wurpm gold ring, girri ngurr-rangirri; girri marrngili bingili gold mala

bitma nganybak, girri gundjarrmirri biliny galwupini nyanggar, miri mundjarr mala nyanki Ribikagi.

²³ Girri nyani inga bindjin, "Nyuni irra bultjigibar, wirang walkiringim nyuni? Bina buṭal ngildjar bala'mirri nibi ngurridji djini'djining maliri, ḥambidi nyungung gunydjirrgirar bala'mirri?"

²⁴ Nyani bumir-wubirdjili, "Ngarri miri Bituwilang walkiringimi, ga nyani Bituwil miri gapirringim Milkagi Nayurang nyanimngim."

²⁵ Ga ngiy, nibi marrkapdjigi miri ngildjny nibi djakadjigi djini'djining maliri. Ngurrumi galbi yurryarr maypalpiligi ngu'ngurriban bala'mirri ḥinbilalar, marrga nyuni djiny birrugi nyungung kamulpili ga djiny nibi djakadjigi garrisima nguli bala'mirri ḥinbilalar."

²⁶ Marrga ngunukima yul gupildjiniban ga bumir-kirrbili nyanggali Yaway-li, ga inga wukdjiliban,

²⁷ inga bindjin, "Yaway nyuni wuknirbi ngirrapibi, God Miligidji Abrayamgi ngirrang bunggawagi, nyuni ingki inga mirrbilginyir girinyir gunggatjnyirbi bunggawagi ngirrangirgi, djini'djining ga ngurrwakng. Irr marrkapdjilban Garryar, irr birraldjnyirdjili djining bala' Abrayamang gulmingirangipm, ga bapili djunupa nyuni irriny mil-lirrpini gadjigarr!"

²⁸ Rirringir ngunungir-kirri Ribika nunydjirraliban wiñiniban gurbili ngambirrgirali marrga djanguny garrwurdjigibar gurrutiginingili malali.

²⁹⁻³⁰ Manymak, Ribikang wuungim yagirri Laban. Ngunukining Ribika yulgungili bala'mirri, nyani Laban nyanginiban ngunukima mundjarr mala gunyirbi Ribikali, ngunun gold ring ngurrimirri wirardjingini, ga ngunun bingili gold nganybakmirrpili gundjarrmirri, ga nyani marrngini djanguny nyanggapibi Ribikabi bultjinirbi. Marrga nyani nunydjirralibar gar-gurriylili ngunyilipm djetjali nyibirri Abrayamang djamagining marrkany kiriny, djarrinyipm mungangmirri kamular nguli ralalmirri.

³¹ Ga Laban inga bindjini, "Guwa, nyuni marrkapgining yul Yawayang! Nyimki nyuni marrkam kirim djilipm? Ngarri ngurrum biri inmanydjirr bulanggitdjiliban, bila inmarr rirrbili nyungki, ga djanki garrisima nyungung kamulgi malagi."

³² Marrga ngunukima yul ragilinan. Djani djin djirrdjirrdjili girri mala ga Abrayamang mundjarrpili kamulngir burringir, girri djina djin birrungili yurryarr kamulpiligi. Girri gapi djin birrungili marrga djani nu inyidjin rurrtjirrmimi bukmak Abrayamang djamagining mala.

³³ Girri djani wali djina djin birrungili. Bil ngunukining djin galwupini wali birbimirri nyanggar, ngunukima djamagining Abrayamang, nyani djina bindjinban, "Wirrban irr dirradjigi wali yarimipm ngirrang djanguny ildjanydjirr bultjigi." "Ma!" inga djin bindjinban.

³⁴ Nyani ngurr-yirrpini djina wangini, "Ngarri Abrayamang djamagining.

³⁵ Mirrp galbi manymak mala nyani Yawaydji inga gupirr-gungili Abrayamgi ngirrang bunggawagi, marrga nyani rruipyi galbingakinng yul: ga nyanggali Godjji gungili maypal mala - miri galbi bimbi, buluki, kamul, dungki, ga ḫapmiynyirbi djamaginpili mala miri miyilkpili ga yulpili.

³⁶ Ga ngirrang bunggawangirang nyanimngim Sara nyani inga minali yidjipili yul Abrayamgi, rirringir nyani wulgamandjini, ga ngungirkir yidjipiligi nyani Abrayamdi inga gungili warppamban galinirbi mala Abrayamang.

³⁷ Girri ngirrang bunggawadji irriny yan-kungili miri ngarri ingarr murr-rangirri bilapilang gam': Ingki djingirapibi bapurrrurbi djili ngu'ngurri nyuni inga marrgi nyanimngim Yisakgi, ingki djingirapibi miyilkpilibi, djiniwili Kayanayit malang miyilkpili wirapilar lim nyini girimban.

³⁸ Bil nyuni wiñidjiban ngunyili ngirrali gurrutiginingirang gurbili, ga djinanydji garrkarrpigi ngirrang gunydjirrgirang malagi, girri djanngapibi nyuni inga marrgiban nyanimngimi Yisakgi ngirrang walkiringirgim.'

³⁹ Girri ngarri ingarr wangini bunggawagi, ingarr bindjin, 'Nyaliki irr marrgi miyilk inga ngunubilang ngunung miyilk irra ingkidjigi ga nyani ngirrinyi ingki irriny gurrpigi bapili?

⁴⁰ Nyani irra bumir-wubirdjili, 'Nguni Yawaydji nyin gunggatjigi; nyanggamirrp gadjigarrmirrp ngarri ingarr rum-gurrpin giriny, marrga nyani bi yani nyanggang djamagining wugili ga ngunukima wugili inma ngurrgilidjijiban marrga inma djamatjigi manymakdjigi, marrga ngirrangir gurrutiginingir nyuni bi inga gangi nyanimngimi nyanki ngirrangirgi walkiringirgim, miri ngunukima nyuni marrgi djanngapibi ngirrang gunydjirrgirangpibi malabi.'

⁴¹ Bil ngunubilang djani nyin djin bir-yirrpigi, marriban bilang, nyuni yarangdjidjiban nyungungir murr-randinirbingir.'

⁴² "Ga djuli irr yulgungili djiatjamirri, ngunukiningban ingarr bindjin wangin Yawaygi, 'Yaway, Miligidji Abrayamang ngirrang bunggawangirang, ngunubilang nyuni birral irrin yunggatjigibar, djining ngirrang ginginyirbi:

⁴³ Djinimirri irr marnggidjidi nyim miyilk yirryirrpini nyungupibi. Djili djiatjamirri munganmirri irr djirridji bilakining midipilipili bi djin giri gapigi. Ga djiny irr butjalmidji, 'Way, bi irrin yu gapi ninini nyungur dandangadi.'

⁴⁴ Ga wili ngunupilang wurpilim miyilkdu irra bumir-wubirdjigi miri bilapilang gam': 'Ngiy, dirradjiw, ga ingki nyuni ngidawa bil nyungung kamulpilingir girrigima, djankibar ngarri djinarr marrgi gapi, ngunitjini miyilkdu ngarri irr djiringilgibar miri ngunukima nyuni yirryirrpini inga walkiringirgim ngirrang bunggawangirang.'

⁴⁵ "Rirringir irr mukdiji wanginyirngir gungimirri, gidagidapmban Ribika yulgungiliban, dandanga miniginy kiriny bapimirri. Nyani butirrdjini dandanga ga wininiban, girri ngarri ingarr bindjin, 'Way, bina nyuni bi irrin yu gapi?'

⁴⁶ Ganydirrdji nyani djirrdjirrdjili dandangany, girri irra bindjin, 'Ngiy, dirradjiw, ga ngarri gapi djinarr marrgi kamulg malagi nyungungirgi.' Ngarri irr dirradjiliban, ga nyani girri djina gungili gapi kamulpili.

⁴⁷ Ngarri irr butjalminiban, 'Wirang walkiringim nyuni?' Ga nyani irrin yu bumir-wubirdjili, 'Ngarri Bituwilang walkiringim, ga ngunukima Bituwil nyani djining Nayurang walkiringimi, ga Nayurang nyanimngimi djining Milka.' Girri ngarri marrngili ngunukima gold ring, girri irr ngurr-rangirriban, ga irr yirrpini ngunupili nganybakmirrpili gundjarrmirri nyanganngar miniginy.

⁴⁸ Girri ingarr gupildjini Yawaygi ingarr marrkapgindjiniban, ga irr bumir-kirrbili Yawaynyi, ngunukima Miligidji Abrayamang ngirrang bunggawangirang, gima nupidipidir nyani irrin yundjirr-katjidjidi bapilipm, marrga djinim miyilk irr marrgibar, ngirrang bunggawangirang gurrutiginingirang yidjipili, ga ngunyili djinim irr gangi inga Abrayamang walkiringirgim.

⁴⁹ Manymak, ngunubilang ngildji birral ingildji marr-bulanggitdjirri ngirrang bunggawagi Abrayamgi, ga ingildji mil-yilgidjirriban marrga ildji yitjidjidi, djinipan irrin yu ildji butjirigindjiwi, bil ngunubilang ingki ildji yitjidjidi, djinipan irrin yu ildji butjirigindjiwi, marrga irr marnggidjidi nyalimirri irr giriban."

⁵⁰ Girri nyani Laban inga bumir-wubirdjili Abrayamang djamaginingirgi, "Yawaydi nyani nibpm ngurrum yirryirrpini Ribikany, ingki nibi ingkidjigi, ga ingki nibi yitjidjidi; nyanganngarki ngurrum rindilalai marga nibi wirr-pultjigibar."

⁵¹ Nyungur gumbirimirri nyani Ribika nyini girimban, balpiri nyuni gangban, marrga nyani ga nyungung bunggawangirang walkiringimi inydi bil marrgi, miri nyani Yaway imnila bultjidjiniban."

⁵² Ngunukining Abrayamang djamagining yul djina marrngini djanngang gungi, nyani bumir-galmini munatjali birbimirri Yawayar.

⁵³ Girri nyani inga djarrjinginiban galbi mundjarr mala, miri gold, silba (silver), ga wurpi wuropi mirikal mala, girri inga gungiliban Ribikali. Ga nyani biliny gungili mundjarrpili Ribikang wuwnngimi ga ngambirripm bilingga girri.

⁵⁴ Girri djina djin dirradjiliban wali ga maypal, ngunukima djamagining yul Abrayamang ga nyanganng gunggatjnyakinpili; ga nguli bala'mirri djin yakirr-nyurrinyiniban.

Manymak, maliri-gunyirri inydi waykungili, girri Abrayamang djamagining djiny butjalmini, djina bindjin, "Bina ildji yitjidjidi miri nibi wiqidjiban nyanganngal ngirrang bunggawali?"

⁵⁵ Ga Ribikang ngambirri ga wuwi biling inga bil bumir-wubirdjili, "Bidak, marri giliwiling nyani nyinidji djilikima nginbilar, marri 10 yakirripili u bilapilang, rirringir ngunungir-kirri minydi ildji giriban."

⁵⁶ Bil nyani djina bindjin, "Ingki irrin yu watjarrdjigi, ngarri miri irr giri gima Yawaydi irra djamadjili manymakdjili. Bina ildji yitjidjidi miri nibi wiqidjiban nyanganngal ngirrang bunggawali?"

⁵⁷ Girri djina bumir-wubirdjili, "Inga lim witjigibar ngungirkii midipiligi bapili, girri nyanganngal lim butjalmidji nyim gungimirri ngurrriban nyanganng."

⁵⁸ Marrga inga djin witjilinan Ribikagi, girri inga djin bindjin, "Bina nyuni djiny yati-nyanganng marrga djini'djining ngildji minydi ildji giri?" "Ngiy," nyani djina bindjin.

⁵⁹ Marrga djani djina djin bubudjili Ribikagi ga nyanganng djakadjnyakinngirgi miyilkigi, ga Abrayamang djamaginpili.

⁶⁰ Girri djanguny mayaligining manyamkgining inga djin wanginban Ribikagi, inga djin bindjin, "Nyuni mala-pungban yidjipilpili galbi mirrpmban. Ga nyungung malapunyirbi djin djamigi gurrbipili djina nguy-marginpilngirang malang."

⁶¹ Rirringir ngunungir-kirri, Ribika ga nyanngang djamaginiŋ miyilkpili djani djin baltjili ngunyili kamulpili burrili, girri minydjin giralibar, Abrayamang djamaginiŋ ngurrwakng, ga djani yilimirri gurrrpini kiriny. Miri bilapilang ngunukima djamaginiŋ yul marrngili Ribikany, girri wininiban.

⁶² Manymak, bilakinjing bildjirri djanı bilaypm djin gupidjny kiriny, nyani Yisak yilitjini wurpili gurrbili. Nyani winini ngunungir gurrrbingir Biya-Laray-Ruyngir, ga inydiyi yirryirrpini gurrbimirri Nigip, girri ngulibar djina marrkany kiriny.

⁶³ Ga wurpm balnggili, miri yabulu bildjirri, nyani Yisak gukirrnyi murrurrtmirrppmi. Nyani milingili, girri djiny bumiri-nyangini ngunuwiltji kamulpili bi girim nyini.

⁶⁴ Ga ngunukining nyani Ribika mildji bipini Yisaknyi, nyani inydiyi nguli burringir kamulngir;

⁶⁵ girri butjalmini nyaniny Abrayamang djamaginiŋ, "Bilang ngunumi, wari ngunung yul bi inmila girim nyini yurryarrmirrppmi?" "Ngunukima yul ngunung ngirrang ngurrdawalangu," inga bindjin Abrayamang djamaginiŋ. Marrga nyani Ribika ngagirrjdjini ngurri ga rarri nyanngar mirikaldji, gima ngunung miri rum mayaligining miyilkigi bilapilaking bildjirri.

⁶⁶ Manymak, Yisak ga Abrayamang djamaginiŋ biling inydiyi bil birmirrpilidjili, girri ngunukima yul inga bultjdjini djanguny miri nyalikidjini nyani birraldjnyirdjili Ribikany, ga nyim birraldjini, ga bilapilang.

⁶⁷ Rirringir ngunungir-kirri nyani Yisakdji gangilibar Ribikany nyanngali wininli. Ga biling bil djabir-kurrkungilibar, ga ngunungir yipi nyani Yisak mirrppmi inga marr-bulanggitdjini Ribikagi. Ga ngungirapibi marr-bulanggitjnyirrbibi nyani Yisak laydjiliban wargugungir, gima ngurrwakng nyanngang ngambirringim Sara nyani wirrdjini.

25

Kiturang gapirriwilingim

¹ Biliŋi, rirringir Yisak bungtjili, nyani Abrayam marrngili wurpi miyilk, bitma nyanimgimi bil miri djamaginiŋ inga, ga nyanngang yagirri Kitura.

² Ga djiniwili Abrayamang yidjipilpili miri yulpili mala nyangapibi Kiturabi budjirri, gam': Djimran, Djuktjan, Midan, Midiani, Yitjbak, ga Djuwa.

³ Ga ngunukima Djuktjan nyani walkiri-marrngili Djiba ga Didan. Ga Didan mala-bipini warrngguwili bapurrrpili gam': Atjurim mala, Litutjim mala, ga Liyumim mala.

⁴ Ga djiniwili Midianang walkiriwilingim yul mala, gam': Yipa, Yipir, Yanuk, Abida, ga Yilda. Bukmak djiniwili yulpili djani ngunung Kiturang mala-punyirbi.

⁵ Ga nyani Abrayam djiny djakadjili bukmaknyi nyanngang yidjipilpili. Nyani yanirrpini marrga rirringir nyani wirrdjidi nyantang yidjipili Yisak nyani marrgibar warrpam girrpili gunydjirrgirang.

⁶ Bil djanki, ngunuwiliny wurpipiliny yidjipilpiliny djiny djin minali djamaginiplingir miyilkpilingir, nyani Abrayam dji dina gungili mundjarr mala gandi-girrpili nyanngang, bilakinjing nyani wanngipm nyininy kiriny, girri nyani minydjny yanali wurpili gurrbili djimurruli, marrga nguli minydjin nyinidji girban rarrmalipm bilayngiri Yisakngir.

Abrayam wirrdjini

⁷⁻⁸ Manymak, nyani Abrayam gatjidjini 175 gunmal ga rarranydjarr, girri nyani wirrdjimaban. Ngunukining nyani wirrdjini, nyani ngunung mirrppm bir-gayping yul, ga marrkapgining, ga gunmal galbingakining.

⁹ Ga nyanngang walikiriwilingim Yisak ga Yitjmayil biling bil djalirngili Abrayamnyi mulumirri miringmirri, ngunung miring nyani Abrayam dji bayimdjili biligi ngunungir Yiprunngir, ngunung yul djanngang Yitayit malang.

¹⁰ yarim Abrayam dji bayimdjili ngunukima gurri djanngangir Yitayit bapurrrrngrir. Ga nguli miringmirri nyaninyi bil djalirngili ngurrrinyi mungangmirri Sara nyanngang nyanimgim, yarim biribirri Abrayam ga Sara bil ngurrinyi wurpilipm.

¹¹ Ga rirringir Abrayam wirrdjini, nyani Goddji djakadjili Yisaknyi nyanngang walkiringimi. Ga nyani Yisak inydiyi yirryirrpini ngidjirrkng gurrbimirri Biya-Laray-Ruy.

Yitjmayilang gurrutigining gadjigarr

¹² Djining ngunung gurrutigining gadjigarr Yitjmayilang, nyani miri Abrayamang walkiringim, ga ngambirringim inga Yagar, ngunukima Sarang dapmiynyirbi djamagining miyilk wirinyi Abrayamdji marrngili djawalmirri Yidjipt.

¹³ Ga djiningi ngunung Yitjmayilang walkiriwilingim yagirrpili mundandji, gam': Nibayut nyanngang milimiti, girri Kidar, Adbil, Mibsam, Mitjma, Duma, Masa,

¹⁴ Yarad, Tima, Djitur, Napitj, girri Kidma nyanngang djirrakay.

¹⁶ Ga djiniwili 12 walkiriwilingim Yitjmayilang djani djin ngurrdawalangudjini bundurrgi 12-gi, ga djiniwili yagirrpili djani miri yagirrpili bundurrgi, ga yagirripili gurrbigi nyibirri ngunuwilikima ngurrdawalangupili inydjin yirryirrpini wurpirri wurpirri gurrbiwi.

¹⁷ Ga nyani Yitjmayil wurrungdjini, ga nyani gatjidjini 137 gunmal ga rarranydjarr, girri wirrdjiniban.

¹⁸ Bil nyanngang walkiriwilingim djani djin barrkirrdjini wurpili wurpili gurrbili, miri ngunungur gurrbingir Yabilangir ngunung gurrbiwi ngidjirrkng Yidjipt djawal, ga ngunyili Atjiriya (Assyria) gurrbili, ga banim galbi gurrbipili. Bil ngunuwili walkiriwilingim inydjin nguy-margindjini djanibinydjin, marrga gamununggupilingir djiny djin bumir-balpiny giriny wurpipili djanngangpibi gurrutigining djuwinapili, djiny djin bininy giriny ngurrgima.

Yisakang yidjipilimirrpili biling bungtjili

¹⁹ Djinipan Yisakang djanguny, walkiringim Abrayamgi. A djiniwili nyanngang gurrutiginpili: miri Abrayam nyani gunydjirrungim inga Yisakgi,

²⁰ a ngunukining nyani Yisak gatjidjini 40 gunmal a rarranydjarr, nyani munganmiyilkindjiniban. A nyanngang nyanimngim yagirri Ribika, galitjirringi ngungirkki yulgi Bituwil ngungirapibi Aramiyan bapurrrurbi, a Yisakdji marrngili ngunukima miyilk ngunungur gurrbingir Padan-aram. A Ribikang wuungim yagirri Laban ngunung Aramiyanbi bapurrrurbi yul.

²¹ Manymak. Nyani Ribika giliwiling nyininy giriny yidjipilinyirring, gima budjirr-djumilidjini. Girri Yisakdji nyani inga butjalminiban Garraayni nyanimngirgim, yarim yidjipilngiriny nyani marrgi. A nyani Garraay inga marrngini, a yitjidjiniban. Marrga ngunungiri nyanimngim inga gapalmirrpilidjiniban.

²² Bil nyanngan yarrmirri ngunupili yidjipilimirrpili biling galng inydi bil ngurrginy kiriny, miri inydi bil birrirrpirrirrdjny kiriny budjirrmirri nyanngar. Girri bilngirang ngambirrungim bindjin wanginban, “Ngunubilang miri bindjirr ngurrgima irr djalgidjirri kirrim, nyimkiban bilang irr wanagi nyinidjipman?” Marrga ngunyili nyani girali djuyuli gurrbili, girri ngulgi Ribikadji butjalminiban Garraayni nyimki djining gunyambi nyanngar budjirrmirri.

²³ Girri nyani Garraay inga bultjidjini djinikima djanguny, “Nyungur yarrmirri bingili yidjipilimirrpili bil ngurri kirrim. A biling inydi bil bum kirimban, yarim bilapilang miri bingili bapurrrurmrrpili inydi bil ngurrrparim kirrim nyungur budjirrmirri. A bilingapibi yidjipilibi bingili bapurrrur inydi bil ngurri. Bil wurpilim bapurrrurdji nyani bangirrigi ngunukima wurpi, miri nyungung milimitang mala djani djina djin djamagindjidi nyungung djirrakaygi malagi, bilapilang.”

²⁴ Guyumi nyanngang walirr yulgungili yidjipiligi, a bingili yidjipilimirrpili yulmirrpili biling bil bungtjiliban.

²⁵ Ngunung ngurrwagiping yidjipili bungtjili, a galngi inga marri budibudigili, a gilingkal inga guyilibini galkngu miri nanikut, marrga gunydjirrungirim yagirr-yirrpini ngunukima Yisuw (Esau), gima ngunung yagirri mayali miri ‘mapalbini’.

²⁶ Rirringir ngunungir-kirri ngunung yilaping yidjipili bungtjili, a nyani gumbirrdji gatjini kiriny wuungim nu-punyan. Marrga ngungiriny nyani Yisakdji yagirr-yirrpini nyaniny Djakup, gima djining yagirri a ngunung yan ‘nu-punyan’ bimbi bilingga wurpilipmili. A bilngang gunydjirrungirim Yisakdji ngurrum gatjidjini 60 gunmal ngunukining biling yidjipilimirrpili bil djawal-gingini.

Yisuwdjii ngaminyi-bultjidjini ngunung manymak rum milimitang

²⁷ Manymak, biling yidjipilimirrpili bil djurrali, a bil yuldjini. Ban Yisuw nyani djambat yul maypilgi, bininy giriny ngurrgima maypilgi galnggalngdjny girinyi, a gar-gurryili murrrurrtmirri gukirriny giriny, bilapilang nyanngang rum. Ban Djakup, nyani buginingi a mundurripi yul, yarim bininy giriny ngurrgima bi nyininy giriny gurrbiwi nambidi wininmirri.

²⁸ Ban Yisak nyani mirrpm marr-bulanggitjdjini Yisuwgi, gima nyani galng-bulanggitjdjini nyadjingunupilang maypilpilngiriny dirradjim kirrim ngunuwili Yisuwdjii bipini; bil nyani Ribika inga marr-bulanggitjdjini Djakupki.

²⁹ Wurpilim walirrdji, bilakining Djakupdji minitjigining gidjirri batjini kiriny, nyani Yisuw wininibar gumbala maypilngiri, ngal-butdjiliban mirrppmi. Nyani ragiliban wininili nyibirri gulmingim nyininyi,

³⁰ girri inga bindjin, "Irr bali kirim waligi, bi irriny kuw nyibi djinimkima budibudigili gidjirri nyuni batjin kirimban." (Bilapilangdji wurpi yagirri Idum (Edom) djin yirrpini nyanyi, gima ngungirang bimbi miri 'budibudigili' djanngamirrppmi yanmirrppmi.)

³¹ Nyani butjalmini waligi, bil nyani Djakupdji bumir-wubirdjili, "Bidak, milimiti nyini gunydjirrgirang, a ngunukining nyani balidji ngili il rarri-gaypigiban nyim ngunupilang mala nyani gatjigi djilikima. Miri nyuni marrgi galbi gima milimiti inga, bil ngarri yarim marri warrnguwili irr marrgi nyanganngir, bilapilang nginmilang rum inmila bultjinmi. Marrga ngurrwakng ngarri nyirr gungi djinimkima wali, nyuni miri yitjidjidji miri ngirrarki irr galiki bukmak girripili mala nyuni guyum ngunupilang marrgi gunydjirrgirang rirringir nyani wirrdjidji. Bilapilang il bumir-tjamigi."

³² Girri Yisuw inga bindjin, "Ngiy manymak, ngarri djini-kuyimban irr balidji, bil djining milimitang rum ingkiban irriny gunggatjigiban djini-djiningkima! Irr yitjidjini miri nyuni galiki bukmak ngunukima girri mala."

³³ Girri Djakup inga bindjin wanginban, "Bidak, ngurrwakng nyuni irriny murrinanban, miri matit murr-randinirbi irriny kuw marrga bukmak ngunukima mala irr galiki yirrimban." Girri nyani Yisuw murr-rangirriban, a bilapilangdji nyani djilimdjili Djakupali warrpam nyanganng butal mala guyumpiligi.

³⁴ Rirringir ngunungir Djakupdji nyanyin gungiliban nyibi wali a nyibi gidjirri. Girri Yisuw djirradjiliban, inydji waykungili, girri gubinibar wininngiri. Bilapilang Yisuw djisi ngaminyi-bultjidjinaban ngunukima manymak rum milimitang.

26

Yisak yalkuy gurribidjili wurpirri djawalmirri bilakining walinyirring bilidjirri

¹ Djinipan wurpi djanguny Yisakbi, ngunukining djawalmirri Kananmirri bukmak yulpili djin nguy-walinyirringdjini gima mayurrknyirringi giliwilingi djin nyininyi. A djining wurpi djiningkima walinyirring bilidjirri, ingki ngunung ngurrgima walinyirring bilidjirri miri bilihi bilapilakinng Abrayamar bilidjirri, biling rarrmalipm. A djining djanguny birraldjin rirringir Abrayam ngurrum balini, a ngunukining Yisak ngurrum mungan-miyilkngindjini, bil nyanimngim inga nyani bidak gapalmirrplidjnyiri.

Yisak a nyanganng mala ngalbirki djin nyininy giriny, marrga nyanganngali minydjin girali Abimilikili ngunung ngurrdawalangu yul Pilitjayingi bapururrugi nguli Girar gurrbimirri nyininyi gurrrpulumirri ngidjirrkng gapi djalkng.

² Miri Goddji Yawaydji ngurrum inganydji mil-lirrpini Yisakgi a bindjin inga wanginban, "Ingki ngunyili nyuni giri Yidjiptili djawalili; bil ngidjirrkng nyuni gurribidjigi nyibirri ngunupilangmirri ngarri gurri inmarr bultjigi.

³ Yarim nyuni bar-kalikibar ngulikima ngunung ngurrgima gurrbimirri, a ngarri inmarr djamadjigi a nyirr gunggatjigiban. A djiniwili gurribipili nyuni djiny nyami ngarri djinikiwiliny nyirr gungi, miri nyunguli a nyungung mala-punyirbili. Bilapilang ngirrang djanguny ngarri inmarr birraldnyirdjigi, ngunung yan ingarr murr-rangirri ngurrwakng nyungung gunydjirrgirki Abrayamgi.

⁴ A nyungung mala-punyirbige ngarri djinyirr galbidjnyirdjigi miri gulukng wana bilabilang miri ngunuwili gatapili ginimbirrimirri dji'tjarri mala, a nyungung mala-punyirbige djin marrgi bukmak djinikiwiliny djawal mala ngirrangir gumbirrung. A bilapilangibili nyungung mala-punyirbibi, bukmak bapururr mala djili munatjamirri djani djin marrkapdjidji.

⁵ A warrpam djiniwiltji manymak mala ngarri inmarr bultjidjini, djani yirrimkima djin birraldjidji, gima nyani Abrayam butjirgindjini ngunukining irr witjili nyanyini, a ngirrang yan nyani gatjidjinaban, miri ngirrang yan-kunyirbi mala, ngirrang rum mala, a ngirrang raypirri mala." Bilapilang God inga bindjinban Yisakgi.

⁶ Marrga nyani Yisakdjii yalkuy gurribidjili nguli Girar gurribiwi.

⁷ Bilapilakinngi ngunitjini Girarmimigi yulpilingir maladji djin nyangini nyanimngim inga, girri nyanyi djin butjalminiban miyilkibi, inga djin bindjin, "Djinim wari?" A nyani djina bindjin wangin, "Nyani gadingimi irra," gima nyani yawngini djina bintji wangidji, "Djinim ngirrang nyanimngimi." Miri nyani gingini, "Mayalimirrppm ngarri djinarr wangidji, bintji yulpili mala djingirapibi gurribibi djani irriny djin bungban, marrga Ribikany djin djamigi, gima djal-malimaling mirrppmi nyani."

⁸ Manymak, rirringir Yisak ngurrum nyi'nyinininy nguli marri giliwilingi, nyani Abimilik nyininy kiriny nambidi nyanngar bala'mirri, a milakngir nyani minimimirngili, girri Yisaknyi nyanginibar dutjny kiriny nyanngang miyilk Ribikany.

⁹ Marrga rirringir ngunungir-kirri nyani Abimilik inga witjili Yisakgi, a ngunukining nyani inga yulgungili, girri Abimilik inga bindjin, "Ngunung miyilk yirrimkima nyungung nyanimngim marri! Nyimki bindjini nyuni irra wangini, 'Nyani djining ngirrang gadingim?'" Girri Yisakdji nyanyin bumir-wubirdjili, "Ngarri bindjin inmarr wanginban gima irr gingini miri inydjirr marrbigi wanngingir marri, bilang wari ngunupilang inga budjirr-djalngdjidi."

¹⁰ Girri nyani Abimilik inga wanginban, "Bina nyuni djiringini nyabinakiqing mari nyuni bapili gangi nginbilangi? Bilang wurpilim yuldu djingirapibi nyani waymirri ngurrinyir nyungur miyilkdji, wana mariban inbiliny barinyirban, miri nyungungpibi murkunyirbibi!"

¹¹ Marrga Abimilik djiny yan-kungiliban bukmaknyi yulpilngiriny nyanngangi, nyani djina bindjin, "Bilngiriny lim gubidji djingiriny yul a nyanngang nyanimngim. Marrga wili ngunupilang gumbirrdji bilngiriny mal-djatdjigi, yirrimban nyanyini minydi lim raniban, a nyani balidjiban." Girri Abimilkdji mil-pultjdjini Yisaknyi, girri nyani Yisak gurrbilinan wininiban.

¹² Rirringir ngunungir-kirri nguli Yisakdji minitji lamudjili munatjamirri wurpirri-wurpirri ngidjirrkng nyanngar gurrbimirri, a djampam rirringir ngunung wali djurrali nyani djarnigili a gurtjili mirrpme galbi wali ngunung ngurrigma gunmal, gima Yawaydji manymakdji djamadjili inga.

¹³ Miri Yisakdji ma'marriny kiriny girri mala a maypal mala bininy kiriny ngurrigma, yarimipm nyani rrupiya-galbingakindjiniban.

¹⁴ Miri mirrpme galbi mala nyani gatjidjini galkngu maypal bimbipli, bulukipili, a djamaginpili mala. A bilapilangirgi ngunitjini Pilitjayin mala djani ngurr-yirrpinaban nyanyinyi djin mil-dinytjilinan.

¹⁵ Marrga gunyambinan djin ngamangamadjili Yisakgi.

Miri ngurrwakng bilakinng Abrayam bilidjirri, Abrayamang djamaginpilingir djani djin gamirrdjini gapigi wurpirri-wurpirri gurbipilimirri nambidi ngunung ngurrigma djawalmirri, a girkiling djin manyangini nguyimirri munatjamirri, girri ngunungir walirrngr ngunuwili ngambul mala minydjin dji'tjarrinyipm, miri mani-girrirrkgnipili djani.

Manymak, Yisakgi djani mari djin djamadjili djinimirri; yarim bubalikining mani-girrirrkgnining ralal nyanngang gunydjirrgirang djamaginpilingir djin gamirrdjini mala, ngunukuwiliny djani ngunitjini Pilitjayin yulpilingir djiny djin ngurri-barngilinan djaltdjiri, bilapilangdjii djin minibili ngunuwili ngambul ralal mala, a djiny djin mirgidjnyi jirdiliban Yisakgi.

¹⁶ Girri nyani Abimilkdji bulu-ngulibar Yisaknyi, nyani inga bindjin, "Nyuni miri minydi yilitjirrdji nginbilangir, gima nyunung mala ngurrum djin galbidjini miri gedidjirringi, ildji bir-matitdjinaban nginbilangi."

¹⁷ Marrga nyani Yisak wurpili gurrbili yilijitinaban marri bilay Abimilkngir, girri gurrbijdili budjirrmny gapinyirring manimirri, yarim wirr gapi wirrwirrdjnyir kirinyir gima wirrpili gurrbi ngunung, a mayurrk wirrban. A marri galbi rarranydjarr nyani nyininyipm nguli mani bandanymirri ngidjirrkng Girar gurrbiwi.

¹⁸ A bilakinng ngulipm, nyanngang djamaginpili nyani djiny yaniliban gapigi, marrga madjirri djin lapmiygi ngunukima gayping ngambulpili Abrayamang djamaginpilingir djin gamirrdjini baman pirr, ngunung ngurrigma ralalpili ngunitjini Pilitjayin maladji djiny djin ngurri-barngili rirringir Abrayam wirrdjini. A nyani djiny yagirri-yirrpini ngunuwili mani-girrirrkgnipili bilapilang ngurrigma miri Abrayamdji djiny yagirri-yirrpini ngunukuwiliny biligi.

¹⁹ Wurpilim walirrdjii, Yisakang djamaginpilingir djin gamini kiriny gapigi nguyimirri ngunung mani bandanymirri, a ngunung ralal wurtjilinan, girri gapi girrikiling buwalbuwaldjilinan.

²⁰ Bil ngunukining ngunitjini maypal-djakadjnyakininpilingir ngungirapibi Girarbi gurrbibi djin marrngini ngunung, djiny djin yimirrdjninaban Yisakang maypal-djakadjnyakinng malany, a djina djin wanginban, "Djinim gapi nginbilangipm!" Marrga Yisakdji yagirri-yirrpinaban ngunung dajatja Itjik (Esek), gima djanngamirrpme yanmirrpm nguni mayali gatjinmi miri 'Wintjnyirbi'.

²¹ Rirringir ngunungir-kirri djin gamirrdjini wurpi ralal gapigi, bil madjirri ngunitjini Girarbi maypal-djakadnjyakinpilingir djiny djin yimirrdjinibar, marrga Yisakdji yagirr-yirrpini ngunung ngambul Djitna (Sitnah), a ngunung mayali bilapilang miri 'Ngandar-rkmiynyirbi'.

²² Girri nyani yilitjini ngunungir gurrbingir, a wurpi gurribi marrngili. A nyanngang djamaginpilingir madjirri djin gamirrdjini ralal gapigi, a dajatja djin bipini. Ban djini'djining ngunitjini wurlpini maladji ingkiban djin yiminirban. Marrga ngunukima Yisakdji yagirr-yirrpini ban Riyubut (Rehoboth), gima ngunung gatjidjini mayali bilapilang miri djining djanguny djin wangini, "Djinidjining walirr Yawaydjii gadjigarr inmiliny gungiliban lim ngalwartjingilgii djili, a lim galbidjidi djawalmirri djilikima."

²³ Guyumi ngunungir gurrbingir nyani yilitjini, a walmini ngunyili bukilili, a yulgungili Biya-Djiba gurrbiwi.

²⁴ A rirringir nyani yulgungili, ngunung ngurrgima maliri nyani Yaway inga birrald-jinibar, a bindjin inga, "Ngarri djining Miligidji nyungung gunydjirrgirki Abrayamgi. Ingkiban yawngiyi gima ngarri nyirr djakadjim girim. Ngarri nyirr gunggatjigi, a nyungung mala-punyirbi djiny irr galbidjnyirdjigi. Bilapilang irr djamadjidi nyungungi, gima ingarr marr-bulanggitdjini Abrayamgi ngirrag djamaginingirgi."

²⁵ Girri nguli ngurrgima gurrbimirri nyani Yisakdji yip mutjpiningiliban irrkiyan-pili, marrga bumir-kirrbigi Garraayni, a ngulikima nyani inga bumirgindjini Godki nyanngamirrpm yagirrmirrpm Yawaymirrpm. A nguli nyani winin yirrpini, bilakining nyannang djamaginpilingir djin ngurr-yirrpini djin gamirrdjini gapigi.

²⁶ Ngunukining bilidjirri, Girarngir gurrbingir nyani Abimilik bi giriny nyininy Yisakili, a nyangan nyani gangili Ayudjat (Ahuzzath) nyanngang balpirgining a gunggatjnyakinjing, a ngunukirri yul Pikul ngunung ngurrdawalangu yulpilngirgi gamununggupilngirgi Abimilikang.

²⁷ Inga djin yulgungili, girri nyani Yisak djiny butjalminibar, "Nyimkiban ngildji irrin ildji balparngili? Yarim ngurrum irrin ildji bir-yirrpini, girri irrin ildji badji-nyanginibar ngildjangir."

²⁸ A djin bumir-wubirdjiliban nyaninyi, "Nginibi yirrimban nibi djiringini nyani Yawaydjii bindjirr kirim ngurrgima nyin gunggatjim girim, marrga nginbilang ginginyirbi bilapilang gam'. Miri nyungung galii, a nginbilang galii, inydi lim murr-ranibar, lim djamadjigi matit nu-yirrpini miri ingki inydi lim mari-djamadjigi inydi limi. Nyuni murr-rani a ngarri, rum magaya il yirrpigaban ngimilang, miri il matitdjigibar."

²⁹ Miri nyunitja ingki inbila nguy-murmurdji giri yarim bilapilang miri nginibitja ingki inma nibi mari-djamadjnyir girinyir. Nibi bininy giriny ngurrgima inma nibi mil-bilbaldjny giriny nyungungkima, a nibi mil-pultjidjini nyuniny magayadjipm. Ngiy, djini'djining a ngunyilatjuy inma nibi bir-bulanggitdjidi gima nyuni yul marr-bulanggitjnyirbi Yawaybi."

³⁰ Girri nyani Yisakdji maypal a wali galngarrarradjili djanngang, girri djani warppam djin nyininibar wurpilpm, djin dirradjiliban Yisakang mala a Abimilikang.

³¹ A malipmalir gunyirri inydi waykungili, girri biling Abimilik a Yisak biri-biri bil nyininibar, girri inydi bil murr-rangirriban inydi bili. Girri Yisakdji djiny bubudjili, girri Abimilik a nyanngang yulmirrpili djin gubinibar miri miy-batpirrginingban djani Yisakang.

³² A ngunung ngurrgima mañngibirri Yisakang djamaginpili bi girali nyanngali, djanguny inga djin birrungili gapibi gima djin malimdjili gaminirngir, inga djin bindjin wanginbar, "Way! Gapi nibi birlaldjnyirdjiliban!"

³³ A nyani yagirr-yirrpini ngunukima ngambul Djiba (Shibah), a ngunung mayali bilapilang miri namba 7, a bilapilangdji ngunung gurribi nyanngang mala-punyirbili mutjpiningili ngulikima ngunung djin bultjidjini Biya-Djiba, a ngunung ngurrgima yagirri dji'tjarri kirimipm djini'djining ngungirkki gurribigi.

³⁴ Manymak. Ban Yisuw, Yisakang milimiti, ngunukining nyani gatjidjini 40 gunmal a rarranydjarr, nyani mungan-miyilkngindjinibar. Bingili miyilkmirrpili nyani biliny marrngili, yagirri bilingga Djudit (Judith) walkirngim Biyriyang (Beeri) ngunung Yitayit yul, a ngunung wurpitji miyilk yagirri Batjimat (Basemath), walkirngim Yilunang (Elon) - wurpi Yitayit yul.

³⁵ Bil ngunupili miyilkmirrpili mirikunu bili, a bilingapibi miyilkmirrpilibi biling Yisak a Ribika bil nguy-ginirgindjini wana.

27

¹ Ngunukining nyani Yisak ngurrum wurrungdjini, nyani mil-djumilidjiniban. Wurpilim walirrdji nyani inga witjili nyanngang milimitigi Yisuwgi, girri inga wangin, "Walkira!" "Ngiy gunydjirra?" Yisudjji bumir-wubirdjili.

² A Yisak bindjin wangin inga, "Nyuni nyamban ngarri mirrppmi wurrungi, a nyadji ngunupilang ngidjirrkngban irr balidji.

³ Nyuni marrgibin nyungung bow a arrows mala, girri ngunyili giri murruрtili, a bungban maypal ngirrki.

⁴ A ngunukining nyuni birrugi ngunung bapili, batjirriban, a djamadjivi ngunung latju gidjirri ngarri djal, girri bi gangi bapilipm ngirrki. Rirringir dirradjnyirngir, ngarri nyirr gungban djanguny ngirrapibi guyumpiligi, marrga nyani God irra butjirmarnggidjidjiban, girri nyani inma birraldjnyirdjigi ngunung djanguny. Miri ngarri bindjin inmarr bultjigi ngunukima djanguny ngurrwakng irr wirrdjidji."

⁵ Bilakinjing Yisak inga wanginy kiriny Yisuwgi, nyani Ribika butjir inydji gunykirinbyan. Marrga bilakinjing Yisaw bilay.

⁶ nyani inga wanginban Djakupgi, inga bindjin, "Yarimban irr marrngini nyungung gunydjirripm inga bultjidjini Yisuwgi miri bindjin,

⁷ 'Maypal buwi, batjirri, girri irriny gangban. A rirringir dirradjnyirngir, ngarri nyuninyi nyirr gungban ngirrang djanguny guyumpiligi, marrga nyani God butjirmarnggidjidji, girri inma birraldjnyirdjigi ngunung djanguny. Ngarri bintji marrga God inma yitjidjidi ngurrwakng irr balidji.' Bilapilang nyani inga wanginban Yisuwgi.

⁸ Bil irriny marrngirriy gapirra. Djini'djining nyuni miri bintji djamadjigi miri djining ngurrgima ngarri inmarr bultjigiban.

⁹ Gar-gurryllili nyuni giriban nginmilali maypal malali, girri bingili nanikutmirrpili nyuni bilnyiirr rindili, yarim yuwirdjingmirrpili gultjiginingmirrpili, a bapilipm bilngiriny gangban. Ngarri bilngiriny irr batjigi, irr djamadjigban ngunung latju gidjirri, ngunukima nyungung gunydjirrningim djalingdjirri wana.

¹⁰ Girri ngunung wali nyuni inga gangi dirradjnyirgi, a nyani gingidji nyuni ngunung Yisuw, girri nyunguliban nyani gungi ngunung djanguny milimitang, ngurrwakng nyani wirrdjidji." Bilapilang Ribika inga bindjin.

¹¹ Bil nyani Djakup inga wanginban mumngimngirgim, "Nyuni marnggi miri Yisuw nyani mapalbini a guyiliginjing, bil ngarri wirr, ngirrang gilingkal guyilinyirring.

¹² Ngunubilang gunydjirrar irriny mal-djatdjigi gumbirrdji, nyani marnggidjidjiban ngarri mayalidji irr ngaginmi nyanyini miri bindjirri, girri ingkaban nyani irra bultjigi djanguny butal bil djanguny mirkngi marrga nyani irra barranggadjigi gunyambili."

¹³ Bil ngambirrnigirim bumir-wubirdjili, "Marriban gapirra, ngunubilang nyani barranggadjigi nyuniny, nguni maridji bargiban ngirrali, ingki nyunguli, gima djiningkima ngirrangipm mayali. Yarim nyuni irra butjirgindjidjiban, guwu a nanikutmirrpili bilngiriny bagiligiban ngirrangi."

¹⁴ Marrga nyani Djakup giralibin, bilngiriny marrngili nanikutmirrpili, bilngiriny bipini, a munydjai gangilinan ngambirrnigirali. Girri ngambirrnigirim batjidjini latju gidjirri butal ganirbi, miri ngunung ngurrgima gidjirri Yisak djalingdjini dirradjnyirgi.

¹⁵ A Yisuwang manymak mirikal mala ngurriny kiriny ngulikima nambidi wininmirri, marrga Ribikadji inga marrngili nyibi mirikalpili, girri djiny yirrpiniban Djakupili nyannangang djirrakayili.

¹⁶ Girri Ribikadji gumbirrmirrpili inga nyani garrpiniban gilingkaldji nanikutdjii marga Djakupang gumbirrmirrpili bil guyilindjidji miri ngunung ngurrgima Yisuwang, a guraki inga nyani ngagirrdjini gilingkaldji nanikutdjii gurrkunyi.

¹⁷ Girri ngunukima latju gidjirri nyani galwupini nyannagar gumbirrimirri, a dampa nyani batjidjini girrgima.

¹⁸ Girri nyani Djakup minyndji ragilinan nyannagli gunydjirrnigirali, nyani inga bindjin, "Gunydjirra!" "Ngiy walkira, wari nyini?"

¹⁹ "Ngarri Yisuw gunydjirra, nyungung milimiti. Ngurrumban maypal irr bipini miri bindjin ngurrgima nyuni irra bultjidjini. Inydji waykungban a nyinidjiban, nyuni dirradjigi djining maypal inmarr bipini, girri rirringir ngunungir-kirri nyuni irriny gungban nyungung djanguny milbimirri Garrayar." Miri bilapilang Djakup ingandyji yulili gunydjirrnigirgim.

²⁰ Girri gunydjirrnigirim yanyanginban, "Bil nyalikidjini nyuni manyangini maypal bilapilangdji ganydjirrdjipm, walkira?" Djakup bumir-wubirdjili, "Garraydji nyungur Miligidjir nyannangarki irriny gunggatjili djingiriny irr manyangini."

²¹ Girri Yisak inga wangin Djakupgi, "Guwa, ngidjirrkng bi irra giriw marrga ngarri gumbirrdji nyirr mal-djatdjigi. Bina birral nyuni Yisuw?"

²² Djapup ngidjirrgili inga giralibam gunydjirngirali, girri Yisakdji nyaniny mal-djatdjilinan gumbirrdji, inga bindjin wanginban, "Nyungung bimbi miri galkngu Djakupang, bil nyungung gumbirimirrpili galkngu miri Yisuwang."

²³ Bilapilangdji nyani malubipińi Djakupnyi, gima gumbirimirrpili biling guyilibini miri Yisuw. Girri djini-kuyimban nyani Yisakdji inga gunyiri nyanngang djanguny walkiringirgim, bil bidak,

²⁴ madjirrtji nyani butjalminiban, "Bina birral galkngu nyuni Yisuw?" "Ngiy birralgima!" nyani bumir-wubirdjili gundjirrgiriny.

²⁵ A Yisak inga bultjidjiniban, "Bi irra guw nyili ngunung munydgajlining gidjirri. Rirringir irr dirradjigi, nyungkiban inmarr gungi djanguny ngirrapibi marrga Goddji inma manymakdji djamadjigi guyumpiligi." Girri nyani Djakupdji marrngilinan ngunung gidjirri, girri inga gungili, a nyani birrungili minim nganitji nyanngang gurrkuni, girri nyani dirradjilinan gunydgirrar.

²⁶ Rirringir dirradjnyirngir, gunydgirrgim inga bindjinban, "Guwa bapili walkira, nyuni irrinry wundigaban djal."

²⁷ Marrga nyani ngidjirrgili inga girali, girri nyaniny wundiniban. A Yisakdji nyu-mirrđiniban bungan inga mirikalbi Yisuwangpibi, girri nyani marr-pirralkindjiniban ngunung nyannang walkiringim Yisuw. Rirringir ngunungirr-kirri Yisakdji inga gungiliban ngunukima djanguny bitma milimitigi. Nyani inga bindjin wangin, "Djining ngirrang walkiringirang bungan latju mirrpni, bilapilang miri bungan mururrtbi miri ngungirapibi gurbibi nyani Goddji djamadjili manymak nginmilang miri maypalgining a waligining.

²⁸ Walkira, nyani Goddji mayurrk inma yani, a munatja nyani inma manymakdji. Marrga ngunukining nyuni djal-rani, galbi inma djurri kiribani wali. A nyuni bintji kiri ngurrgima marrgi galbi wali a gambilkii miri nganitji.

²⁹ Yulpilingir galbibi malabi djani inma djin djamadjigi, a mulkurupilngirang bapurrrdji maladji inma djin gungi-baltjigi. A nyuni djina bunggawadjidi djanngangi miri bukmakgi nyungung gurrutiginpilngirgi, a warppam nyungung ngambirrgirang mala-punyirbi mala djani inma djin gunaki-gupildjidi. A nyani God inma djamadjigi djinimirri, ngunubilang wirapili ngunupilang djin manyangi inma djin rarri-wangidji, girri nyanijtja djina rarri-wangidji. Bil ngunubilang wirapilingir ngunupilang nyin djin birdjigi, girri nyanijtja djiny birdjigi a djiny gunggatjigi." Bilapilang Yisak inga bultjidjinin djanguny marrga nyani God butjir-marnggidjidi, girri inga birraldjnyirdjigi ngunung djanguny nyanngang walkiringirgim.

Yisuwđji birraldjnyirdjili Djakupdji gar-yulili nyaniny

³⁰ Ngunukining Djakup djini-kuyim girali gar-gurryilili, djayurkjurdjurk nyani Yisaw yulgungilinan maypalngir.

³¹ Nyani girri gidjirri batjidjini latju gunydgirrgirki, girri inga gangili. Nyani inga bindjin gunydgirrgirki, "Inydi waykungban gunydgirra, nyuni nyinidji a dirradjigibin djining maypalgining gidjirri ngarri inmarr birrungili. Girri nyuni irra gunghan ngunukima djanguny marrga Goddji irrinry djakadjigi."

³² "Wari nyini?" Yisakdji butjalminiban. "Nyungung milimiti Yisuw" nyani bumir-wubirdjili.

³³ Girri nyani Yisak ngurr-yirrpini ban galngi-wurrwurrtjininan, a nyani butjalminiban, "Wili bilang ngurrum bipini maypal, a ngirrali irra birrungili? Irr malimdjilinan djini-kuyim ngurrwakng nyuni irra yulgungili. Ngungirkii yulgi ngarri ingarr bultjidjini nyungung djanguny, a ngunung djanguny miri inga dji'djirridjipban ngunyili yipi!"

³⁴ Ngunukining nyani Yisuw djining marrngini, wargugungir wanangir nyani witjiliban mirrpni nami, girri gunydgirrgirki inga wanginban, "Ngirrkaban girrigima djanguny irra gunghan, gunydgirra!"

³⁵ "Bil walkira, nyungung gulmingirim ngurrum mil-gangiliban ngunukima djanguny inmarr manyangini nyungki! Nyani bi irra girali, girri irra mani-wanginban."

³⁶ Girri Yisuw inga bindjinban, "Bumiri bingilipban nyani irrinry gar-yulili mayalidji. Ngarri marnggiban nyimki nyuni yagirri-yirrpini nyaninyi Djakup, gima mayali miri bilapilang 'waparr' ngunukima yagirri. Ngurrwakng nyani djamirrdjini bukmak ngunung girri mala ngarri bilang irr marrgi rirringir nyuni wirrdjidji, a djini'djining nyani djamirrdjini ngirrang djanguny guyumpiligi! Gunydgirra, marri wurpmipm nyuni irra galdirrdjini ngirrikii djanguny dampingi, ngangi?"

³⁷ Bil Yisakdji bumir-wubirdjili Yisuwnyi, "Wirr walkira, ngarri ngurrum nyaniny bunggawadjnyirdjili nyungung, a ngarri djining ingarr yirrpini miri bukmak nyanngang gurrutiginpili djani inga djin djamagiñdjidi, a ngarri ingarr bultjidjini nyani Goddji inga

gungi galbi wali a nganitji, marrga nyungung wuwngim bintji kiri ngurrgima matitdjidji a dulpidjidji. Ngarri irr mirrbilali wirr nyangangir, walkira, marrga nyalikidjidjiban djanguny wurpi inmarr manyangban djini'djining nyungung?"

³⁸ Girri Yisuwdjii bumir-duwaṭ bu'putjalmini gunydjirrgiriny, "Ingki gunydjirra, bil yarim dampingipm djanguny nyuni irra manyangban, girri irra bultjigi marrga Goddji marrngirrdji. Nyabini yarim dampingi nyuni bintji irra bultjigi djanguny ngirrki girrgima, gunydjirra? Marrga ngirrki wurpi Goddji irra manymakdjigi djamadjigi!" Yisuw ngadjny kirinyban.

³⁹ Girri nyani Yisak manyangini djanguny, girri walkiringirgin inga bultjidjini marrga nyani God butjir-marnggidjidji girri inga birraldjnyirdjiji ngunukima djanguny. Nyani inga bindjin, "Ngunung gurrbi nyibirri nyuni nyinidji ngunukima wirrpildjidi nyunungi, wirr inma rikidji giri, a munatja inma mirgidjidji, ingki inma djurri giri galbi wali.

⁴⁰ Miri wapirrmirri rummirri nyuni nyinidji, a wali nyuni marrgi nyungur mandjawakdji; nyungung gulmingim nyani yagirr-wanadjidji, bil nyuni yagirr-ninindjidji marrga nyuni inga djamadjigi miri bintji ngurrgima nyani nyin yan-kungi. Bil guyum ngunupilang nyaniny nyuni burrdji gungi, girri nyanngangir gumbirrngir nyuni butdjigibin."

⁴¹ Rirringir ngunungir-kirri nyani Yisuw nguy inga margindjiniban Djakupgi, gima Djakupdji marrngili nyannangipm djanguny gunydjirribi. Marrga nyani gungi inydi ngamangamadjili nyani bungi gulmigipm. Nyani bi inydi wangini, "Ngunung walirr nyadij inga lim ngadjidji gunydjirrgirki ngidjirrkngban bi inmila girim nyinibana, rirringir nyani wirrdjidji ngunukiingban irr bungban Djakupnyi."

⁴² Bil wari ngunupilang butjir-marnggidjini yan inga milimitang, girri Ribikany butjirgindjili. Ngunukiing nyani Ribika marnggidjini Yisuwang ginginyirbi, nyani inga yan-kungiliban djjirrakaygi Djakupgi miri nyani bi inga giri. Nyani yulgungili, girri ngambirrngim inga wanginban, "Marrngirri, nyungur wuwar nyin ging kirimban djampen nyin rani.

⁴³ Miri bintji nyuni djamadjigibin gapirra. Djini'djining nyuni minydi nyunydjirriban, a ngirrali wuwngirali inga giri, ngunukima yul Laban nguli gurbimirri Yaran nyini kirim.

⁴⁴ Girri nyanngar nyuni bar-kalikiban, yarimipm Yisaw nguy-djunggingir nyanibi inydi djanadjanadjigi, girri inma nguy-mingindjidji,

⁴⁵ a nyani marrbigaban nyaliki nyuni gar-yulili nyaniny. Girri nyunguli ngarri irr yanibana wirinyi marrga nyin nyin bagiligan ngunungir gurrbingir. Nyuni giriban bintji nyimilinyirr marrbigi ngirrang gapirimirrpili wurpmmirri walirrmirri. Miri bilang Yisuwdjii nyin bungi, wili ngunupilang nyaninyi bungban gima nyani muningdjini, bilapilangdjii walirrmirri wurpmmirri irr yidjipilinyirringdjidjiban."

Djakupdji minydi yanili Djakupnyi marrga miyilknyi marrgi

⁴⁶ Girri Ribika inga girali Yisakgi, girri inga bindjin wangin, "Wanni irr mirgidjiniban bilingapibi ngunupili mulkurumirrpili miyilkmirrpili Yisuwdjii biliny marrngili, ngarriban bilinggarr gudjirrdjirri mirppmi. Ngunubilang djingirapibi Yitayithi bapurrrurri nyani Djakupdji marrgi nyanimngim, manymaktja irr balidji djini'djining bintji wabanan irr nyinidji kiri wargugugining ngungirapibi miyilkibi Djakupang."

28

Djakupdji birmirrpilidjili Garrynyi gurbimirri Bitil

¹ Girri nyani Yisak inga witjili Djakupgi nyannang walkiringirgin. A nyani Djakup inga giralibin, girri nyani gunydjirrgim inga bir-bulanggitdjini, girri nyaninny yan-kungiliban miri bindjin gam': "Ingkaban djingirapibi mulkurupilngirapibi nyuni inma marrgi miyilknyi, miri ingki djingirapibi Kananayithi bapurrrurri rindiligiw!

² Yarim ngunyiliban djayurrdjurrk nyuni giriban Padan-Aramili gurbibili, nyuni balpargiban gaykiyiriny ngulì gurrbiwi Bituwilang nyungung ngatjitingim. Girri ngulikima miyilk inma nyuni rindiligi, bilapilang nyuni marrgi nyanimngim inma nyungupibi gurrutiginpilngirapibi, miri wurpmgima Labanang walkiringim nyungung gaykiyirang midipili.

³ A ngarri inmarr butjalmidji Godnyi ngunung Ganydjirrgining Miligidji miri bilapilang gam'. Nyani Goddji nyin gungatjigi, marrga nyuni walkir-marrgi galbi, marrga nyungupibi wurpi-wurpi bapurrrurra mala inydjin ngurriban.

⁴ Ngiy, nyaniny irr butjalmidji miri nyani nyin gungi ngunung ngurrgima murrandinirbi nyani gungili Abrayamnyi biligi, marrga nyani inma mil-wurdjigi a nyin

gunggatjigi, a djagadjigi nyungung mala-punyirbi gurrkunyi. Nyani bintji djina djamadjigi marrga djining djawal djani minydjin galikibar inydi mungbinigi, djinikima gurrbi nyibirri lim nyini girimban, djingiriny Goddji gungili Abrayamagi.” Bilapilang Yisak inga wangin Djakupgi.

⁵ Rirringir ngunungir-kirri Yisakdji minydi yani liban Djakupnyi nyanggang djirrakay. A nyani giralibar ngunyili Labanang gurrbili, gima Laban nyani miri Aramiyanbi bapururrbi yul, walkiringim Bituwilang, a Ribikang wuwnge, a gaykiy bilingga miri Yisugiwa Djakupgi, bilapilang.

Yisuwddji marrngili wurpi miyilk ngungirapibi malabi Yitjmayilangpibi

⁶ Ban Yisuwgi, nyani marnggidjini ngunukima djanguny, miri nyaliki gunydjirrning inga bir-bulanggitdjini Djakupgi, a nyaliki nyani butjalmini Godnyi miri nyani djagadjigi gulmigipm bilakinjing girim nyini ngunyili Padan-Aramili gurrbili, marrga nyani marrgi miyilk ngungirapibi. A Yisuwddji marrngini ngunukima djanguny miri nyalikidjini gunydjirrar butjir-karrdjini Djakupnyi miri bindjin gam', “Ingki nyuni marrgi miyilk djingirapibi bapururrbi Kananayiti.”

⁷ A Yisuwddji nyangini nyalikidjini Djakup bilingga butjirgindjiniban gunydjirrgirkia a ngambirrgirkia, gima Djakup ngurrum giralibar ngunyili Padan-Aramili gurrbili.

⁸ A ngunukining Yisuwddji djiny nyangini ngunukirri mala, nyani djiringinaban nyani murkungili ngurrwakng ngunukining nyani biliny marrngili ngunpili miyilkmirrpili ngungirapibi Kananayit bapururrbi, gima nyani nyangini ngunupilingir miyilkmirrpilim bilngiriny bil nguyulkdjny kiriny gundjirrgiriny a ngambirrgiriny.

⁹ Marrga Yisuwddji balparngili nyanggang gunydjirrgiriny Yitjmayil, a wurpi nyani mngim rindilalibar. A ngunukima miyilk nyani gadingimi Nibayutgi a walkiringim Yitjmayilgi Abrayamang wuwnge, a yagirri inga Mayalat. A nyani marrngili djingiriny miyilknyi gurrkunyi rirringir nyani ngurrum biliny gatjidjini ngunupili bingili wurpiwili miyilkmirrpili.

Djakupdji birmirrpilidjili Godnyi nguli gurribi Bitil

¹⁰ Manymak, nyani Djakup gubini Biya-Djiba gurribi, a larrban ngunyilipm Yaranili gurribili nyaling nyani Laban nyi'nyinimi.

¹¹ Malngiri, walirr ngurrum mungan inydi yirrpini, nyani guldjili nyibirri ngunupi langmirri murrurrtmirri, gima ngurrum gar-malirdjiniban. Rirrkian nyani marrngili, galwupini munatjamirri, girri gungili bukurrgili a ngurrinyinaban yakirrigi.

¹² Bil nyani bulkinibar. Nyani mabugi nyangini bilapilang gam'; baltjnyirbi mala nyani nyangini, miri djili munatjamirri mungan-yirrpini, a nguli ginimbirimirri gurakigalwupini namnammirri, bilapilang. A nyani djiny nyangini Godang wugili djamagining mala djanji ngunyili djin baltjnyi kiriny a bapili djin djundini kiriny, bilapilang djiningir ngunungir.

¹³ Girri nyani nyangini Yawaynyi djarri kirim ngidjirrkng nyangan. A nyani Yaway inga wanginban, “Ngarri Yaway, Miligidji Abrayamang nyungung mar'mingngirang, a Miligidji Yisakang. Djining gurribi nyaling nyuni ngurri kirimban ngarri nyirr gupirrgungi miri nyunki a nyungung mala-punyirbigi.

¹⁴ Nyungung mala-punyirbi djani djin galbidjidji bilapilang miri midjirri munatjamirri ngurri kirim, a ngildji ngunyili-ngunyili inydi ildji garrwurdjigi - miri djimur-ruli, barrali, lunggarrmali, a djalatjangili. A nyungumirrpni a nyungung mala-punyirbimirrpni ngarri djiny irr gunggatjigi warrpam bapurrrr malany marrga rummirri manymakmirri djin nyinidjibar.

¹⁵ Ingki marrbirri djining, ngarri immarr djamadjigi a nyirr gunggatjigi; miri bilang ngunyili ngunupilang nyuni giri, ngarri bintji kiri ngurrigma nyirr djagadjigipm. A mari-djamaginpilngirgi ngarri ngandarrk djinarr djirridjiban nyungungi, marrga magayagining nyuni giri nyinidji, a bapili nyirr winidjingilgi nyunguli gurribili djampam. Ngiy birralgima ngarri ingki nyirr marrbigi, bil yarim immarr djamadjigi yarimipm irr malimdjigi bubalikiñg nyirr murr-rangirri.”

¹⁶ Girri bulkinyirbingir nyani Djakup binygadjiniban, a nyani wangin, “Birral, Yaway djiligmia gurribi! Nyani gukirri kirim djilikima, a ngarri wawu ngurrinyini!”

¹⁷ A yawnginyirbingir nyani wurrwurrdjny kirinyban, girri bindjin wangin, “Djining mirrpni butjir-kanirbi gurribi! Djinikima Godang gurribi marri; a djilikima Godang milak dji'tjarri marrga ngunumirri lim ragi namili!”

¹⁸ Djadaw nyani inydi waykungiliban, marrngili ngunung bukurryirbi rirrkian, girri mungun-yirrpiniñban munatjamirri marrga ngunukima rirrkian dji'djirridji kiri miri gunji-bilmiyanyañkiningi. Girri gapi gidjirri djal-walibi nyani djululupmiyngili namili rirrkianili, bilapilangdji ngunung rirrkian djuyugindjiniban Godang.

¹⁹ Girri nyani bultjidjini ngunung gurrbi Bitil, gima ngunung yagirri mayali miri 'Godang gurrbi'. (Guyumi yulpili djin mutjpiningili bala'pili nguli, a yagirri djin yirrpini gurrbiwi Lutj; bilrirringir ngunungir-kirri Djakupang mala-punyirbi madjirri djin bultjdjini ngunukima gurrbiwi Bitil.)

²⁰ Girri Djakupdji murru-rangirri Garraynyi djining budjirr-randinirbi maṭit, "Ngunubilang nyuni irriny gunggatjigi, a ngunubilang nyuni dji'djirridji kiri ngirrar miri namkatdjinginakinngirrang bilakinngir irr gukirri kirim, a ngunubilang nyuni irriny gungi wali a mirikal mala,

²¹ a ngunubilang nyuni irriny wiñidjingilgi ngirrali gunydjirrgirali marrga ingarr yulgungi magayaginjing, Miligidjiban nyuni ngirrangibintji kiri ngurrigma, yarim nyuni ngidawapm.

²² A djili djani yulpili inma djin bumir-baltjigi, yarim djilikima nyaling irr yirrpini djinim gungi-bilmiyanya kinngirringirriyan. A ngunukining girripili mala irr marrgi, ngarri bintji inmarr djamadjigi gam': irr butbutnyirdjigi ngunitjini mala marrga 10-bi gandibi irr galbungi, girri wurpmi gandibi nyirr gungiban, bil wurpiwiltji irr galiki miri ngirrangipm, bilapilang."

29

Djakup yulgungili Yaran gurrbiwi

¹ Rirringir ngunungir-kirri nyani Djakupdji gubini ngunung gurrbiwi, girri minyndji giralibam djimurruli. Rirringir yakirri galbi djin bangiringili, nyani ngidjirrkng bi giriny nyinininy Yaran gurrbiwi nyibirri yulpili djimurrubi djin nyininy mala.

² Nyani giriny nyininy, mani-girrrkginginngal ralalban nyani mildji bipini gurru pulumirri, a maypal bimbi mala - warrrngguwili gulukng, liw dap djin ngurriny kiriny rarrmalipm, rarrmalipm, miri nyani gulukng ngurriny rarrmalipm, a nyani wurpi gulukng ngurriny rarrmalipm, a bilapilang. Djani warppam djin marrkany kiriny marrga gapi djin dirradjigi. Miri maypal-djagagining mala ngungirapibi gurrbibi djani djin djaltjibiny giriny gapi djanngang maypalpilingirgi ngunungir ralalngir. A ngunung ralal djabiri djin minibiny giriny rirrkiyandji murrbin, bintji maypal galmidji a gapi mirgididjiban.

³ Djanngang rum bilapilang gam': ngunukining bukmak ngunuwiltji maypal-djagaginpili djin gurrkunyir nguli, giliwilim djin djaltjibinyir ngunung gididjirringirriyan, girri ngunung djin yilbirtjnyir ralalngir, girri djin burrunyir gapi maypalgi malagi. Rirringir ngunungir-kirri ngunung ralal djin minibinyir rirrkiyandji madjirri.

⁴ Manymak, nyani Djakup djina yulgungili maypal-djagaginpilingirgi, girri djiny butjalmini, "Way miyginpila, nyalingirapibi ngildji?" "Yaranngir gurrbingir," djin bumir-wubirdjili.

⁵ Girri nyani djiny butjalmini, "Bina Laban walkiringim Nayurang ildji marnggi?" "Ngiy nibi marnggi ngungirkii," inga djin bindjin.

⁶ "Bina nyani manymak?" nyani djina bindjin. "Ngiy, nyani manymak," djin bumir-wubirdjili, girri inga djin wangin, "Nyawi, nyannang midipili bi inmila girim nyinibam walkiringim inga Ratjil (Rachel), nyani djiny djudu-gam kirim Labanang maypal bimbi malany bapili."

⁷ A Djakup djina bindjin, "Bil djini'djining yarim balnggilipmban, ingkaban ngurrum ildja yulgunyir ngunung bilidjirri ngunukining ildji gurtjigi maypalpili malirigi. Nyimkibam ingki ildji gapirigi djinikiwiliny maypalpilingiriny djini'djining, marrga djiny ildji wiñidjingilgi yurryarrilli marrga djin dirradjigi bilakinngir walirr gurrpin kirimipm?"

⁸ Bil djin bumir-wubirdjili, "Ingi nibi bintji, bidak. Djili nibi marrkang yarimipm djani maypal-djagaginpilingir djin birruji bapili bukmakgima nginbilang maypal bimbi mala. Rirringir ngunungir-kirri nginibi warppam nibi yilbirtjigi ngunung rirrkiyandji murrbin, girri gapi nibi marrgiban maypal malagi."

⁹ A bilakinngir nyani Djakup djina wanginy kiriny, nyani Ratjil djina yulgungiliban gam kirimbam Labanang maypal bimbi mala - nyani maypal-djagagining miyilk nyannang gunydjirrgirki.

¹⁰ A ngunukining Djakupdji nyangini Ratjilnyi a nyannang gaykiyigirang maypal malany, nyani Djakup giralibam mani-girrrkgingili, ngunung rirrkiyan yilyilmiyngili djabiringir ralalngir, girri ma'marriny kiriny gapi maypalpilingirgi gaykiyigirang Labanang yarimipm djin dulpidjini.

¹¹ Girri nyani wundirrdjini Ratjilnyi, a ngurr-yirrpini ngadjinibam gima mirrppmi galng-wakalbin.

¹² Girri nyani inga bultjidjini, "Ngarri djining nyungung gunydjirrgirang gurutigining, Ribikang gapirringim irri." Girri nyani Ratjil ɳunydjirralibam marrga gunydjirrgirki bultjigi.

¹³ A ngunukining nyani Laban marrngini ngunung djanguny miri gapirringim inga yulgungili, nyani ɳunydjirralibam inga bir-kiri, gurkiralni nyaninyi, a wundirrdjini, girri nyani birrungiliban Djakupnyi nyanganngi bala'li. Girri nyani Djakup inga bultjidjini bukmak nyim ngunupilang inga birraldjinin ngurrwakning mala.

¹⁴ Rirringir nyani Laban marrngini djanguny nyanganngapibi, nyani bindjin inga wanginban, "Ngiy, birral galkngu nyuni ngirrang gurrutigining, ngirrangpibi bapururrbi!" A nyani Djakup nyininiban nyanganng wurpm rangu, miri inga djamadjny kiriny Labangi yarimban.

Djakupdji inga djamadjili Labangi marrga miyilkmirrpili marrgi

¹⁵ Rirringir wurpm rangu bangirngili, nyani Laban inga bindjin wangin Djakupgi, "Marriban nyuni ngirrang gurrutigining, ingki nyuni bilang irra djamadjigi yarimban. Ngarri nyuniny nyirr bayimdjigaban djamagi, yarim nyuni irra bultjigaban nyabinwili nyuni djalngdjidi."

¹⁶ Ban Laban nyani biliny gatjidjini midipilimirrpili - nyanganng walkirwilingim, a yagirri bilingang Liya (Leah) nyanganng galitjirringi, a Ratjil nyanganng mirrdjingu.

¹⁷ A ngungirkni miyilkiki Liyagi, mil inga bilbaldjini; ban Ratjilgi, galngi inga latju, a nyani mirrpimi djal-malimaling miyilk.

¹⁸ A nyani Djakup inga marr-bulanggitjdjini Ratjilgi a budjirr-djalngdjini inga, bil Liyagi wirr. Marrga nyani bumir-wubirdjili Labannyi miri bindjin gam', "Nyungki inmarr djamadjigi 7 gunmal a rarranydjarr, bilang nyuni irriny murr-ranibam miri djampam Ratjilnyi nyuni ranytili irra gungi miri nyanimngim irra."

¹⁹ Girri nyani Labandji bumir-wubirdjili, "Ngiy, butaltja nyanyiny irr gungi nyunguli, ingki wurpili yulngirali, gima nyuni ngirrang gurrutikining. Irr yitjidjirri, nyuni djlilikima nyinidjiban ngirrarban."

²⁰ Manymak, 7 gunmal a rarranydjarr nyani Djakupdji inga djamadjili Labangi marrga Ratjilnyi marrgi. A ngunung bilidjirri nyani gingini yarim dambingipm galkngu warrngguwilipm yakirri, gima nyani mirrpim inga marr-bulanggitjdjini Ratjilgi.

²¹ A ngunukining ngunung bilidjirri inydi malimdjili, nyani Djakup inga wanginban Labangi, "Girrban walirr ngirrangni, nyuni irriny gungban ngirrang nyanimngim marrga liny ngurridjiban wurphilipm."

²² Marrga nyani Labandji galngarrarradjili bunggul wana, a nyani djina walidjirrdjini bukmakgi yulpilngirgi ngungirapibi gurrbibi. Girri bunggulban djin buni kiriny.

²³ A djinimirri djanngang rum djarrinyini. Maliri nyani yul inga marrkang nyanganng murrandinirbigi miyilkiki, nambidi wiñinmirri nyinidjiri kiri inga marrkam kirim. Girri gunydjirrgirim nyani marrgibam nyanganng walkiringim, girri ngunung miyilk bi inga birrugibam ngunyili, miri nginipipingirang wiñinili. Bil ngurrwakng ngunung miyilk inga yulgungi, nyani ngurrum inydi garrpigi mirikaldji, bilapilang. Manymak, nyani Djakup inga marrkany kiriny Ratjilgi wiñinmirri, ngurrum maliridjini, bil ingki Ratjilnyi nyani Labandji inga birrunyir, yarim Liyang inga birrungili Djakupgi, a girrban. A nyani Djakup ngurrinyiniban nyanganng gima nyani wawupm ngunukima ingki Ratjil.

²⁴ (A nyani Labandji gungili Liyani wurpm miyilk miri djamaginiñ inga, gima ngunung wurpi rum djanngang ngurrwagipi. A ngunung djamaginiñ miyilk Labandji gungili nyanganng, yagirri nyani Djilpa (Zilpah).)

²⁵ Manymak, milwartjili nyani Djakup binygadjini a mil-nyanginiban. "Way, djinimkima ingki Ratjil!" Nyani inga warrwarrajdjili Labangi, girri inga bindjin, "Nyimki nyuni irriny gar-yulgimi miri bindjirri? Ngarri inmarr djamadjny kiriny marrga Ratjilgima irr marrgi. Nyimki rarri wurpm nyuni irriny gungili?"

²⁶ Girri nyani Labandji bumir-wubirdjili, "Nginbilang rum djingirapibi gurrbibi ingki miri ngunukima. Yarim ngurrwakng nibi gungi galitjirringkima, a rirringir ngunungir-kirri manymak nibi gungban mirrjingi, bilapilang ngirbilang rum."

²⁷ Nyuni bar-kaliki, yarim nyuni inga malimdjigi djingiriny wurpm week galitjirringirgi, girri ngunung wurpi nyinibi gungban ngirrang mirrdjingu. Bilapilang gam', ngili il bumir-tjamigi, miri ngarri nyirr gungi Ratjilnyi, a nyuni madjirrtji irra djamadjji kiri nyibingirgi 7 gunmalpilngirgi."

²⁸ Nyani Djakup yitjidjinaban. Nyani marrkangili yarimipm Liyang week inydi djingiringili, girri ngunukiñgban nyani Labandji ranytili inga gungilinan Ratjilnyi girrgima.

²⁹ A nyangngali girri nyani Labandji gungili wurpm djamaginiñ miyilk Ratjilali, a nyani yagirri Bilya (Bilhah).

³⁰ Manymak, Djakup a Ratjil biling bil ngurrinyiniban w提醒您。 A nyani Djakup inga marr-bulanggitdjini Ratjilgi, miri mirrpgima nyani inga marr-bulanggitdjini, bil Liyagi yarim marri djayal. Manymak, nyani nyi'nyininyi ngulikima nyibiwili 7 gunmalpili marrga bayimdjigi gaykiygiriny Ratjilgi.

³¹ Manymak, ngunukining nyani Yawaydji nyangini Djakup ingki inga marr-bulanggitnyir Liyagi, nyangngali nyani gungili yidjipilngiriny Liyali, bil Ratjilgi wirr - nyani budjirr-djumilidjini.

³² Marrga nyani Liya gapalmirrpilidjini, a djampam milimiti inga bungtjili, a nyani yagirr-yirrpini nyaninyi Riwbin (Reuben); gima nyani wangin bindjin, "Djining yagirri mayali miri, 'Goddji nyangini ngirrang wargugu', a wurpi mayali miri, 'Djinin'djining ngirrang nginipingim irra marr-bulanggitdjidiiban', bilapilang."

³³ Girri madjirri nyani yidjipilakindjini, girri djirrakay inga bungtjili, a yagirri nyani yirrpini nyanininy Djimiuyin (Simeon). Miri djini'djining bilidjirri nyani bindjin wangin, "Djining yagirri mayali miri, 'Yaway marrngini irr nyini kirimpim marrbulanggitnyirring', marrga djingirinyi wurpi nyani irra gungili yidjipilngiriny."

³⁴ Girri madjirrtji nyani gapalmirrpilidjini, wurpi yidjipili yul marrngili, a djiningkima nyani yagirri bultjidjini Liybey (Levi), gima nyani bindjin, "Djining ngirrang nginipingim irra djalngldjidiiban, gima ingarr marrngili yidjipilngirinyi warrnguwiliban."

³⁵ Girri wurpm bilidjirri madjirri nyani yidjipilakindjini, a djampam yidjipili yul bungtjili. A nyani bindjin wangin, "Djinidjining bilidjirri Yawaygi ingarr gungi-baltjigi"; bilapilangdji yagirri nyani yirrpini nyaninyi Djuda (Judah). Rirringir ngunungir-kirri nyani dadawdjili marrniryirngir yidjipilngirinyi.

30

Djakupang walgurwalgur djani bungtjili

¹ Ban ngunukining nyani Ratjil djiringini nyani badatj djiny marrngili yidjipilngiriny Djakupgi, nyani inga mil-dinytjnyirakindjiniban gadingirgin Liyagi. Nyani bindjin inga wanginiban nginipingirgin, "Ngirrinyban irriny kuw walgurwalgur, bintji irr balidji wargugungir!"

² Bil nyani Djakup inga madakarritdjini, a yan birintilipm inga nguli, "Ingki irr ganydjarrgining miri God! Nyanngarki nyin budjirr-djumilidjnyirdjili, ingki ngarrigima!"

³ Girri Ribika inga wanginban, "Djinimgima ngirrang djamaginiñ miyilk Bilya (Bilhah), nyum nyim ngurridji w提醒您。 Marrga nyani yidjipilngiriny ngirrangipman."

⁴ Marrga nyani Djakupdj i marrngili ngunukima miyilk Bilya miri wurpi nyanimngim inga, a nyangngal waymirri ngurrriny girinyban gurrkunyi.

⁵ Manymak, guyumi nyani Bilya gapalmirrpilidjini, a walkir-marrngili yidjipili yul Djakupgi. A nyani Ratjeldji djagadjiliban ngunung nganarr bitma nyanggangipm.

⁶ A nyani bindjin wangini, "Goddji bukmaknyi yulpilngiriny djiny mil-lirrpinibar ingki djuburr-mirkng ngarri. Yarim w提醒您。 Marrngiбан ngarri murkunyirbinyirring, gima Goddji irriny gungiliban djingiriny yidjipilngirinyi rirringir ngarri nyanyin irr butjalmini yidjipilngi ngirrangipm." Bilapilang nyani bindjin, marrga yagirri nyani yirrpini ngungiriny nganarr Dan.

⁷ A rirringir ngunungir-kirri ngunukima djamaginiñ miyilk Bilya gapalmirrpilidjini madjirrtji, a wurpi yidjipili yul djawal-gingini.

⁸ A nyani Ratjil wangini, "Ngili ngirrang gadingimi Liya inydji il birrirrpirrirrdjim kirrimban, bil marriban, ngarri nyanyin irr burrdji ngulibin!" Bilapilang nyani wangin, marrga nyanyinyi yagirri nyani yirrpiniiban Naptali (Naphthali), gima ngunung yagirri gatjinmi mayali miri 'Birrirrpirrirrdjnyirbi'.

⁹ Ngunukining nyani Liya nyangini ingki madjirri nyani marrnyir kirinyir yidjipili malany, nyani marrngiliban nyangang djamaginiñ miyilk Djilpa (Zilphah), girri ngunukima inga gungili Djakupili miri wurpi nyanimngim inga.

¹⁰ Manymak, Djilpangir wurpi yidjipili yul bungtjili Djakupgi, a nyani Liyadji marrngili ngunukima nganarr a djagadjiliban miri nyangangipm.

¹¹ Nyani bindjin, "Ngarri djambatjpan!" Marrga nyani yagirri-yirrpini nyaninyi Gat (Gad), gima ngunung yagirri mayali gatjinmi miri 'Djambati'.

¹² Girri madjirri Liyang djamaginiñ miyilk gapalmirrpilidjini, a wurpi yidjipili yul bungtjili Djakupang.

¹³ A nyani Liya bindjin wanginban, “Ngarri marrkapginingban! Ngunuwiltji wurpiwili miylkpilingir djani irriny djin gingidji ngarri marrkapgining miyilk.” Marrga ngunukima yidjipili nyani yagirri-yirrpini Atjir (Asher), gima ngunung yagirri mayali gatjinmi miri ‘Marrkapgining’.

¹⁴ Wurpilim walirrdji, ngunukining bilidjirri nyadjii djin yirryirrdjny kiriny wali marrga djin gurtjigi mirring minitji mala dampagi, Riwbina ngunung milimiti Liyang nyani gukirrinyi murruertmirrpni. Girri nyani birraldjnyirdjili djal-waligining gurbi, a ngunukima djal-wali butbutnyirdjili, a gurrbilii minalibin nyanggali ngambirrgirali. Bil nyani Ratjil nyangini ngunung djal-wali, marrga nyani butjalminiban gaditipm, “Way, bi irriny kuw nyibi ngunukima djal-wali nyungur gapirringirrim gurtjili.”

¹⁵ Bil nyani Liyadji bumir-wubirdjili, “Ngurrumban nyuni mil-gami ngirrang ngnipingim, bina djini’djining nyuni djalngdjirri ngirrang gapirringirang djal-wali nyuni djamigi gurrkunyi?” Girri Ratjil inga bindjin, “Il bumir-tjamigi; nyuni irriny gungban ngunukima djal-wali, a ngiltjang ngnipingim nyani ngurridjiban nyunguri djini’djining maliri, bilapilangdji ngarri nyunin nyirr bumir-winidjingilgi.”

¹⁶ Marrga djampang ngunukining Djakup wininy kiriny murrurrtngir rirringir djamanigir, nyani Liya wininjngi yulgungliban, girri inga bir-kiralibin. Nyani inga bindjin, “Nyuni ngurridji ngirrarban, gima irr bayimdjili ngirrang gaditipm marrga nyirr marrgi. Ngarri gupirrgungili nyanggali ngirrang djal-wali ngunukima ngirrar gapirringirrim butbutnyirdjili djuli.” Marrga ngunuban maliri nyani Djakup ngurrinyinaban nyangnari.

¹⁷ A nyani God inga mil-wurdjili Liyagi a marrngini nyanggang butjalminyirbi, marrga nyani gapalmirrpilidjini madjirriban. A guyumi wurpi yidjipili yul bungtjili, marrga Liya gatjidjinaban 5 yidjipilipi.

¹⁸ A nyani Liyadji yagirri-yirrpini nyaninyi Yitjikar (Issachar), a ngunung yagirri mayali gatjinmi galkngu ‘Bayarra’, gima nyani wangini, “Goddji irriny bayarradjili gima ngirrang djamagini miyilknyi irr gungili ngirrali ngnipingirali.”

¹⁹ A madjirrtji nyani Liya yidjipilakindjini, a yidjipili yul bungtjili - namba 6 nyanggangi.

²⁰ A nyani yagirri-yirrpini ngungiriny Djibulun (Zebulon), a ngunung yagirri gatjinmi mayali miri ‘Mundjarr’, gima nyani bindjin wangin, “Goddji irriny gungliban mundjarr butalgimi. Marri rirringir djiningir ngirrar ngnipingirrim bi irriny gang kiri mundjarr mala, gima ngarri ingarr gungili 6-ban yidjipilipin.”

²¹ A djuuditjban nyani Liyadji marrngili yidjipili miyilk, a yagirri-yirrpini nyaninyi Dina (Dinah).

²² Bil nyani Goddji ingki marrbinir Ratjilnyi, nyani butjir inyddji kungili nyanggang butjalminyirbi, girri nyanggang yarr nyani matitdjili yidjipilipi.

²³ A ngunukining Djakup ngurrinyini nyanggar waymirri, nyani Ratjil wurpi gapalmirrpilidjinaban. A djampang nyanggang milimiti bungtjili. Girri Ratjil bindjin wangin, “Guningima ngirrangi nyani Goddji yilbirtjiliban ngirrangir.”

²⁴ A yagirri nyani yirrpini nyaninyi Djusip (Joseph), a ngunung yagirri mayali gatjinmi galkngu miri ‘Wurpi Irr Marrgi’, gima nyani bindjinban, “Ngarri djalngdjirri nyani Goddji irriny gungban wurpigma yidjipili ngirrangipml.”

Nguni mil-gultjigining yul Labandji nyani gar-yulili Djakupnyi

²⁵ Manymak, rirringir Ratjilang milimiti Djosip djawal-gingini, nyani Djakup inga wanginban Labangi, inga bindjin, “Bina manymak ngarri irr gubidji djining gurrbiwi, irr winidjiban ngirrali gurrbilinan?”

²⁶ A ngarri djiny irr gangban ngirrang nyanimwilingim a walgurwalgur, a minydi nibi giriban. Bamanban inmarr djamatdjny kiriny nyungki, a ngurrumban nyirr bumir-winidjingini ngirrang miyilkpilngirgi. Miri yirrimban nyuni marnggi nyaliki ngirrar djamatjji nyin gunggatjili.”

²⁷ Bil nyani Laban inga wanginban, “Ingkaban ildji giriban. Butjir inyddji kungban; ngarri djining djanguny irr marnggidjini miri warngarringir djangunyginjingir, miri bilapilangir irr birraldjnyirdjili gam’: nyani Goddji irra manymakdjim djamatdjim gima nyunikma nyini kiribinan ngirrari.”

²⁸ Ngarri irr djalngdjirri nyuni bar-kalikiban djiligmia. Yarim nyimki nyuni djalngdjidji ngirrapibi, nyuni irra bultjigiban, a ngarri inmarr gungi ngunukima ngunubilang nyuni madjirri irra djamatjji kiri, bilapilang ngarri nyirr bayimdjiji nyunung djamagi - nyimki ngunupilang nyuni djalngdjidjiban.”

²⁹ Girri nyani Djakup bindjin, "Nyuni marnggi miri ngarri nyuniny nyirr rrupiya-galbidjnyirdjili ngirrar djamadji, a nyali nyungung bimbi a nanikut mala djin galbidjini ngirrapibi djamabi, gima djiny irr djagadjny kiriny manymak.

³⁰ Miri ngurrwakng inmarr yulgungili biligi nyuni ingki gatjinir galbi maypal mala, bil yarim warrngguwilipmban. Ban djini gulukng wanagima nyungung, gima nyani Yawaydji irriny gunggatjny kiriny, marrga galbi maypalpili nyani nyin gungili ngirrapibi djamabi. Bil rirringir djiningir-kirri manymaktja ngingibi inydi nibi djagadjji giriban, gima wirr maypalpili nibi gatjirriban nginbilangpibi. Marrga ngirrangipm miyilkpili a walgurwalgar djiny irr djagadjigibban, a maypal malany djinyi nibi marrgibban nginbilangipm.

³¹ Bil Laban butjalminiban madjirri, "Nyili ngarri nyirr bayimdjigi?" A nyani Djakupdjii bumir-wubirdjili, "Nyuni irriny gungi wirrpom djini'djining. Ngarri djiny irr djagadjji kiri nyungung maypal mala yarim miri ngurrwakngi, ngunubilang djining ngirrang mayali nyuni ytjidjdjiban.

³² Bilapilang nyungung maypal mala: miri nanikutpili djani mulngi mala, a bimbi djani bardjining mala, bil yarim warrngguwili lurrkin-djulatdjulatjmiynyakinjing mala nyuni gatjinmi bimbi a nanikut, a warrngguwili djultjdjultjnyakinpili girrgima. Marrga djiniwi lurrkin-rindinyirbi a djultjdjultjnyakinjing maypalpili nyuni djiny gungi ngirrali, miri yarim djinikiwiliny a warppam minytjigining yuwirdjingpili djani djin bungtjigi djamparnanikut a bimbi, yarim djinikiwilinygima djiny irr marrgi minytjiginpili nyungungpibi maypal malabi. Bilapilangdjii nyuni irriny bayimdjigibban, ban nyunibipm djiny galiki warppam bardjining bimbi, a warppam mulngi nanikut. Manymak, cjamangi irr gukirrdji kiri nyungumirrpom maypalpilimirrpom, djiny irr butbutnyirdjigibban warppam minytjigining maypalpili nanikut a bimbi, girri djani ngirrangipmban.

³³ Girri bubalikinim bilidjirri nyuni djiny nyangi ngirrang maypal malany, nyuni miliki a manyangban. A ngunubilang wurpmipm nyuni birraldjnyirdjiji maypal nyunungpibili, galkngu bardjining bimbi u mulngi nanikut, nyuni marnggibban ngarri waparrbi ngunukima irr djaminmi nyungungir maypalpilingir!"

³⁴ Girri nyani Laban inga wangini, "Ma', miri bintjigima ngurrgima il djamadjigibban miri nyuni irra bultjdjini."

³⁵ Bil nyani Laban djayurrkdjurk wiñiniban nyanggali maypal malali, girri nyani djiny butbutnyirdjiliban bukmaknyi ngunuwili lurrkin-djulatdjulatjmiynyakinjing a djultjdjultjnyakinjing maypal mala, miri nanikutpili a bimbipili, girri djiny gungili nyanggali walgurwalgurli marrga djiny djin djagadjji kiri rarrmalipm Djakupngir.

³⁶ Girri Laban a nyanggang walgurwalgar djin yilitjiniban Djakupngir, marri bilay miri 3 yakirrpili djin girali, girri inydi nyininiban nguli, marrga ngunuwili minytjigining maypal mala Labandji djiny djagadjny kiriny, a ngunuwili bardjining bimbi a mulngi nanikut mala Djakupdjii djin djagadjny kiriny Labangi. Ingkaban djani mayalpili djin milkurrkunyir girinyir, bil yarim rarrmali-rarrmalipm bil dijirridji kiripmban mala. Miri bilapilang nyani Labandji gar-yulili Djakupnyi.

³⁷ Bil nyani Djakup girali murruurtilli, girri djarnngili wurpi-wurpi mala djadjiri yuwirdjing, miri ditij a nyim-kunirri yuwirdjing bumalng ngunuwili djin gatjinmi bardjining galngi nguyimirri gilingkalmirri mala. Girri nyani marrngili yiki, girri yalwupiniban gilingkal marrga ngunuwili djadjiri malany nyani djiny djulatjmiyngiliban, miri bindjin nyani gar-gurryilidjnyirdjili bardjining galngi nguyimirri.

³⁸ Girri nyani ngurr-yirrpini ngunukuwiliny lurrkin-djulatdjulatjmiynyakinjing bu-malngpili ngunyili munatjali - ngidjirrkng djapidipilimirri nyaling gapi djidjapn nambidi maypal malagi djin dirradjigi. Nyani miri bindjin djamadjili marrga ngunitjini nanikut maladjii djiny djin nyangan ngunukuwiliny djunggipili birbimirri djanngar, marrga ngunukining yuwirdjingpili nanikutpili djin bungtjigi, gilingkal djina djulatdjulatjmiyngakinjdjiban girrgima. Gima nguligima ngidjirrkng ngunuwili djapidipili, bininy kiriny ngurrgima nyani gurrkinjingir nanikutdji burrili inga baltjny giriny miyilkali, girri gudidjilaban, ngunukining bukmak ngunuwili nanikutpili djin gurrkungili nguli dirradjnyirgi.

³⁹ Marrga ngidjirrkng ngunuwili lurrkin-rindinyirbi bumalngpili djani nanikut mala inydi'gudidjiliban. A bilapilangdjii ngunukining yuwirdjingpili djin buntjili, djani warppam minytjiginingban, miri nyibi lurrkin-djulatdjulatjmiyngakinpili, a nyibi djultjdjultjnyakinpili.

⁴⁰ Ban bimbipilngirgi, nyani Djakupdjii djinimirri djamadjili gam': nyani djiny butbutnyirdjili bukmak bimbi miyilkpili marrga djin djarriny kirinyban rar-rarrmalipmban. Girri ngunukining djani minytjigining nanikutpilingir djin dirradjny

tjarriny gapi djapidimirri djinngirpmi, ngunuwiltji miyilk bimbipili nyani Djakupdji djiny djudju-gangilaban wurpili galiyili, marrga ngunngirpm biri-biri djiny djin nyang djirridjiban ngunukuwiliny minytjigining nanikutpili. Bilapilangdjı ngunukining yuwardjing bimbi mala djin bungtjili, djani wurpi minytjigining bilapilang miri nanikut mala. Miri bilapilang nyani Djakupdji djiny marrngili mirrpm galbi nanikut a bimbi mala minytjigining; girri nyani djiny butbutnyirdjili Labanngir maypal malangir, girri djiny yagirrdjinibar nyanganngalipm maypal malali. Miri Labanang maypalpili nyani Djakupdji djiny djagadjny kiriny rarrmalipm, a nyanganngalipm rarrmalipm, ingkiban inydjin mil-kurrkunyir girinyyir.

⁴¹ A nyani bindjin djamadjili djinimirri wurpi: ngunukining matitpili gurrkining maypalpili burrili djina baltjili ngidjirrkng djapidimirri, nyani marrngili ngunukuwiliny lurrkin-rindinyirbi djunggipili, girri munatjaliban nyani djiny ngurr-yirrpinanban nguli milbirnirri maypalpilingirar.

⁴² Bil ingki nyani bininyyir djamadjnyir ngunukining bilbalinipili maypalpili inydjin gudidjili. Marrga Djakupdji djiny marrngili warrpam matit maypal malany, bil Labandji djiny marrngili bukmak bilbalin malany.

⁴³ Bilapilang nyani Djakup yagirr-wanadjinibar, a rrupiya-galbingakindjinibar, a nyani gatjidjinibar marrngili galbi maypalpili, kamulpili, dungkipili, a djamaginpili - miyilkpili a yulpili.

31

Djakup nunyedjirrali Labanngir

¹ Manymak, nyani Djakupdji birraldjnyirdjili Labanang walkiriwilingim djin wanginy kiriny nyanganngapili miri djin bininy kiriny, "Warrpam nginmilang gunydjirrgirang girri malany nyani Djakupdji mil-gamban, bupalikining nyani gunydjirrar gatjinmi mala. Miri bukmak ngunuwili maypalpili a djamaginpili nyani Djakupdji djiny gatjinmibar, nyani djiny gurrkumi ngunukuwiliny gunydjirrgirangpibi malabi, yarim djani bilang guydjirrgirang, ingki Djakupang."

² A wurpi, Djakupdji nyangini miri nyani Labandji inga rum-ngulibar, ingkiban nyani inga bir-bulanggitjnyir nyinnyir miri ngurrwakngi, bilapilang.

³ Girri nyani Yaway inga bindjin wanginban Djakupgi, "Winiyban nyunguli mutjingili nyibirri nyuni bungtjili, a ngarri inmarr maltjigibar marrga nyirr djagadjigi."

⁴ Marrga nyani Djakupdji yangilinan marrga biling nyaniwilingim inga bil bir-kiri nguli murruurtmuiri nyibirri nyanganngalipm djin djarri kirim.

⁵ A ngunukining inga djin yulgungili, nyani bilingga wangin bilingga bindjin, "Ngarri irr nyangini miri nyumilang gunydjirrgirang djuburr nyani irra wurpidjinibar, miri ngurrwakngi ngunukima yul irra marr-bulanggitdjini, ban djini'djining bumirli irriny ngurrgimban. Bil marriban, ngunukima ngirrang gunydjirrgirang Miligidjir nyani irriny gunggatjim.

⁶ Nyum nyim marnaggi ngarri inga djamadjny giriny marrngili wana gunydjirrgirki nyumilang,

⁷ bil nyani irriny gar-yulgimi bumir-galbi bilidjirri, miri nyanganngalipm murr-randimirri nyani djambidjambidjimi madjirri a madjirri. Bil nyani God ngandarrk inga djarri Labangi marrga ngunung mari Labanbi irranjdji yulgimi.

⁸ Miri bilapilang gam': ngunubilang nyani irra bindjin wangin, "Bukmak mil-kurrkunyirbi minytjigining maypalpili nyuni djiny galikiban, bilapilangdjı ngarri nyirr bumir-winidjingilgili djamagi nyungung," girri djani maypalpilingir warrpamdjı djiny djin bundigibar yarim mil-kurrkunyirbi minytjigining yuwidjingpili. Bil ngunubilang nyani irra wangini irra bindjin, "Ingkiban mil-kurrkunyirbi minytjiginpili, bil lurrkin-djulatdjulatjmiyanya kinpili nyuni djiny galikiban yarim ngunukuwiliny," girri warrpam maypalpili djani djiny djin bunđigibar yarim lurrkin-djulatdjulatjmiyanya kinpili yuwardjingpili.

⁹ Bilapilang djiniwili maypalpili nyani Goddji nyanyiny gaypili gunydjirrgiriny nyumilang, a djiny gunglibar ngirralibar.

¹⁰ Miri ngurrwakng, ngunukining nyani gurrkining nanikutdjı burrili inga baltjny, girri gudidjny, ngarri mabugi irr nyanganngalipm. Miri mabugimirri irr nyangini galbi gurrkining nanikutpili, djani burrili djina baltjny kiriny miyilkpilingiriny, a ngunuwili gurrkining mala yarim djani warrpam minytjigining - miri lurrkin-djutatdjulatjmiyanya kinpili, djultdjultjnyakinning, a mil-kurrkunyirbi minytjigining mala, bilapilang.

¹¹ Girri wari ngunupilang irra witjiliban Godang djanguny-ganyakinjing marri, irr bulkinyipm, a nyani irra wangin, "Way, Djakup!" "Ngarri djili," ingarr bindjin.

Luke

2

Christmas Story

⁶ A bilakinjil bilinj ɳuli bil nyininyipm, walirr inga yulgunjiliban Merigi miri gurrulk inga buntjigi.

⁷ Girri nyannjaŋ milimiti djawal-ginjinibar, a Meridji marrnjili ɳunukima, girri gar-pinpibar mirikaldji giliwilinir, girri yakirr-galwupini ɳunyili djapidili yurryarrkinjili nyaliniri buluki mala djin dirradjigi yurryarr ɳuli bulukinjirar bala'mirri. Bilapilanjirgi nyani yakirr-galwupini djapidili bulukinjiran, gima wirr gadjigarr biliŋki ɳambidi bala'mirri yulpilŋiraj, gima ɳunuŋ bala'ŋurrum rarri inydji barŋiliban.

⁸ Manymak, ɳidjirrkŋ Bitiliyim gurbiwi, gar-gurryili murruṛtmirri nyibi maypal-djamaginpili djani djin nyininy kiriny, maypal bimbi mala djiny djin djagadjny kirinban, a ɳunupan ɳurrum gar-maliridjinibar.

⁹ Girri ɳunukinjibar wurpmi Garrajan djamaginin wugili nyani djina birraldjini, a Garrajan warrdjinirnir djiny liwlwmiŋyili, a munutjaban warrpađadžini ɳidjirrkŋ djanjar bitma mannjibirri. Wanaban inga djin ɳuy-yawnjinibar.

¹⁰ Bil ɳunukima wugili djina wanjini, djina binjin, Iŋkiban ildji yawnjidji. Butjur inydji ildji kuwi, ɳarri ildjarr birruŋiliban djanjuny butal, marrga bukmak yulpili wanaban djin nitjanydjidji ɳunukinjil djiniŋ djanjuny djin marrnjirrdji.

¹¹ Gima djini'djinin maliri, nyani Wannjirnyakinjil ildja buntjiliban ɳildjanji, djili gurbiwi Dabidan nyani Garrajan wal-nyanjinibar ɳunukima Godan Yirryirrpinirbi yul.

¹² A bilapilan djiniŋ warŋarri djanjunyginjil djarri kirimban ɳildjiki, marrga ildji birraldjnyirdjigi ɳunuŋ yidjipili: ildji manyanji nyaninyi mirikaldji garrpini, a ɳurri kirim djapidimirri bulukinjirar.' Bilapilan ɳunuŋ wugil djina bindjini maypal-djagadjnyakinpilŋirgi.

1 John

¹ Djiniq djaŋuny ɳarri irr wukirridjim kirimbān marrga lidjarr bultjigi yulbi, ɳunuŋi, nibi bultjin girim nyaninyi yagirri "Yan Wannjiginj". A ɳunuŋi baman ɳurrwakn, nyani nyi'nyininy ɳurrnunjal bilidjirri; a nyanjaŋ yan nibi marrjini, a nyaniny galŋi nibi nyanini ɳinibilar mildji. Niy, yirrimban nibi nyanini nyaniny, a nyaniny galŋi nibi gatjidjini ɳinibilar gumbirrdji; a djiniban lidja nibi bultjinni nyanapibi.

² ɳuni yuldji gatjinni birral wanŋi, ɳunuŋ wanŋi-giliwiliŋakinji, a nyani nyi'nyininyi Gunydjirrgirar; a ɳunuŋ wanŋiginj birraldjinibān miri yuldjinibān, bilapilan miri ɳilimban, girri nibi nyaninibān nyaniny. A bilapilanban, miri milmarŋiginpili nibi, a lidja nibi bultjinibān nyanapibibān. Nyani miri wanŋi-giliwiliŋakinji, a wirrban balidji, yarim nyi'nyinidjipm bintjibān ɳurrigma. A ɳunuŋi baman pīr nyani nyi'nyininy giliwiliŋ Gunydjirrgirar ɳunukirri ɳurrnunjal bilidjirri, ban djini'djini ɳanibī inydi mil-lirrpīnibān nyanjarki djili ɳilimilar munatjamirribān.

³ Bubalikinj nibi nyanini a nibi marrjini, ɳunitjini mala lidja nibi bultjigi, marrga ɳilidji nibila lidji maltjigibān a wurpmbān mala yulpili limi, miri wurpirrimban rum-miri lim nyinidjibān. A ɳinibalanj, nibi nyini kirimbān giliwiliŋ Gunydjirrgirarban, a nyanjaŋ Walkirgirar Djesur Christarban, miri wurpmbān mala.

⁴ Nurrumban nibi galŋ-nitjanydjirri, a nibi wukirridjim ɳilidjalibān marrga ɳilidji bintj ɳurrigma lidji galŋ-nitjanydjidji.

⁵ A djinibān ɳunuŋ djaŋuny nibi marrjini nyannapibi, miri Djesubi, a ɳunuŋ ɳurrigma djaŋuny lida nibi bultjigi, bilapilan gam': Gunydjirrnimi ɳunuŋ War-padadadjyari a wirrpaŋ nyanjar gar-maliri, miri mirikunu rum mala, a bilapilan.

⁶ A marrga ɳunubilan lim bintj ɳinidji, "Narri ɳurrum Godkiŋinjban", bil bidakipm lim giri gar-malirmirrp, miri rummimirrp mīrgimirrp, girri inydi lim yulgimban, a lim burr-birrindjinjın girimbān Godnjir birralnjir rumnjir.

⁷ Bil ɳunubilan lim giri warpadadamirrp, bindjirr ɳurrigma miri nyani bipm Gunydjirrnimi girim nyini manŋibirrimirrp, girri wurpilipmbān lim nyinidji giri mala; a Djesus, ɳunuŋ Gunydjirrgirar Walkirkipm, nyānjar budiri limiliny rurrtjirrmigibān, miri limiliny ɳalwirrgidjigi ɳilimilanj mīrginjir. Ban ɳunubilan bintj ɳurrigma lim ɳinidji gam', "Wirrban mirgi irr gatjirri ɳarribibi", girri miri bilapilanban mayali inydi lim ɳagirrgi, a nyanjaŋ birral rum iŋkibān ɳurrii ɳilimilar.

⁸⁻⁹ Bil ɳunubilan bintj ɳurrigma inganydji lim bultjigi Gunydjirrgirki gam', "Gunydjirra, yirrimban mirikunu yul ɳarri, mīrgibān irr djamadjili", girri nyani Gunydjirrar limila djuy-bultjigibān, a limiliny ɳalwirrgidjigibān bukmakpīr ɳilimilanj mīrginjir, gima Miligidj nyani wili nyannapibi yan gatjigi, yarim wirrban limila gar-yulibān, yarim bulangjiti limila djamadjigibān. A bilapilan, miri warrpam ɳilimiliny mīrgi mala nyani dījy iŋyilmiygi ɳilimilanj, a girri lim ɳalwirrgidjibān, gima bukmak ɳilimilanj mīrgipili inganydji lim bultjidjinibān nyankibān.

¹⁰ Bil ɳunubilan bintj ɳurrigma lim waŋidji gam': "Iŋkirr mirgi-djamadjiw giriwi", girri bilapilanj djaŋuny dji ɳanin y lim bultjinibān Gunydjirrgiriny yagirri 'Inydi Yulginyakinj', bilapilan, a nyanjaŋ yan iŋkibān lim gatjirribān ɳilimilarban.

Ibraam dem and reewu Misra

2

¹ Marrkapnyakinj yutjuwili ɳirrani, djiniq djaŋuny ɳarri wukirridjimi ɳilidjali marrga ɳilidji iŋkibān lidji djamadjigi mirikunu mala. Bil ɳunubilan mirgi lim djamadjigi, girri lim gatjinmi warnarrinyi, miri ɳamkatdjinakinjini, a ɳunuŋ djarri kirimbān ɳilimilar galymirri marrga nyani limiliny gunjatjigi, miri Djesu Christ, ɳunuŋ djuburrarray yul, wari nyanjaŋ nyi'nyinibān Gunydjirrgirar, a nyani limilanydji ɳurribān, a limiliny gunjatjigibān.

² Miri, nyadjidj ɳunupilan lim mirgi-djamadjigi, nyani Gunydjirrnimi limila madakarritdjidjibān, bil nyani Djesu limilanydji ɳurribān, girri inga waŋidji a nyaniny djanadjanadjigibān, marrga Gunydjirrnimi nyani ɳuy-mindjidjibān, a limila djuy-bultjigibān, iŋkipmbān nyani limila madakarritdjidjibān munjuŋ. Niy, miri bintj ɳurrigma Djesudjī limila djamadjigi, a iŋki yarim ɳilimiliki ɳidawirrkā, bil bukmakgi ɳunuwili yulpili dījy nyini girim djili munatjamirri mala.

³ A nyalikidjidji ɳilimi birral lim djirinlg̊i lim marŋgi Djesugi? N̄unubilaŋ lim butjirgindjirr girim nyanŋan yan-gunyirbigi malagi, bilapilanđji lim djirinlg̊ibān inga lim marnŋgi.

⁴ Nyibi yulpili djani bintji djin wanjdji gam': "Narri marŋgi Djesugi," bil djin gurripinpm̊i djin butjir-djumilinjp̊imbān nyanŋan yan-gunyirbigi malagi. N̄unubilaŋ djin bintji ɳurrgrima djin wanjdji, girri ɳunitjini yulpili inydiŋ yulgimban, a bađatj djin marnŋgi birralgi.

⁵ Ban ɳunubilaŋ wari ɳunupilan mil-yirrp̊in girim Garrayili djaŋunyili, a butjirgindjirr girim ɳunugirki yangi, girri yirrimban ɳunun yul inga marr-bulanđitdjirrban Godki butalban. A djiniŋ narri lidjarr bultjigi nyaliki lim djirinlg̊i lim nyini kirim Godar nyanŋar marr-bulanđitjimirri.

⁶ N̄unubilaŋ lim bintji wanjdji, "Narri wurpilipm irr nyini kirim Djesur" girri ɳilimi bilaj lim yati-nyanŋan Djesuny, miri, nyalikidjny Djesudji djamadjny giriny džili mutatjamirri, ɳilimi wurpi bintji ɳurrgrima bilan lim djamadjigibān miri nyanibī.

⁷ Marrkapnyakinpila, iŋkiban narri lidjarr yirrp̊inmi wurpi rum yuwendjijŋ, bil yarim yiligmia lidjnyirr gumban ɳunun wanam yan-gunyirbi, ɳununi lidji marrnjini ɳunukinjŋ yuwendjakinim lidji marr-birralŋakinidjini: miri, ɳilimibi bilaj inydiŋ lim marr-bulanđitdjidjibān, bilapilan ɳunun yan. ɳurrumban lidji marnŋgi ɳunugirki djaŋunygi, gima biligi lidji marrnjini ɳununuŋ.

⁸ Bil narri lidjnyiři gungi-bilm̊iymban bapili yan-gunyirbili, miri, djina lidji marr-bulanđitdjidjidi wurpiwiliči yulpilŋirgi, gima Djesu nyannjarki nyininy giriny ɳunumirri, a ɳunun rum lidja manyakdjjirrban lidjiliči girri. ɳilimi wirapili djiniŋ Godan yulpili lim gubiniban ɳunun rum gar-maliriginj, a ɳunun gar-maliri limila manydjirr kirimban, a Godaŋ birral warrpadadadjnyiri ɳurrumban limila ɳalapdjim kirimban ɳilimilali.

⁹ Bil ɳunubilaŋ nyuni bintji wanjdji, "Narri nyini kirimban Godar warrpadadamirri", bil biđak nyuni ɳuy-margjinidjirrip̊imbān wirki ɳunupilan, girri nyuni nyi'nyinipm̊ban gar-malirimirribān, a biđak wirrban nyuni ranyir ɳunyili Godili warrpadadali.

¹⁰ Ban ɳunubilaŋ nyuni djina marr-bulanđitdjirr kirim wurpiwiliči yulpilŋirgi, birralban nyuni nyini kirimban warrpadadamirri. Marrga iŋkiban nyuni djalndjidi nyuni djiny ɳurri-djigitgi wurpiwili yulpili ɳunyili mirgili rumili, gima nyunibi gi'kirim nyinibān warrpadadamirrp̊i, a nyuni gubidjibān mari.

¹¹ Niy, ɳunubilaŋ wari ɳunupilan ɳuy-marginidjirri gurrutiginiŋirgi, gar-malirimirribān nyani nyi'nyinipm̊i, a mil-bambay gu'gukirribān gar-malirimirri, a nyani djuŋa nyanydžili girim nyinibān, gima nyuni gar-malirdji mil-djumilidjilibān nyainy, a ɳunun yul mil-djalminibān gadjigarrnjri Godnjiri.

¹² A ɳilidjan yutjuwiliki, nyani Godđi djiny midjirrdjili mirgipili ɳilidjanj, gima marr lidji yirrp̊ini Djesuli, a bilapilanŋirgi narri lidjarr wukirridjimban djining djaŋuny.

¹³ A ɳilidjan wanapilimirri marr-birralŋakinpilŋirgi, narri djiniŋ lidjarr wukirridjimban djaŋuny, gima lidji marnŋgi Djesugi, ɳunun gaypinqibān waru nyi'nyininyi ɳurrnaŋgalŋirji. A ɳilidjanj marri wana yulpilŋirgi, narri lidjarr wukirridjim girri, gima ɳunun mirikunu wugili lidji dimbitjnyirdjilibān. Niy, narri lidjarr wukirridjimi yutjuwiliki, gima Gunydjirrgirki lidji marnŋgi.

¹⁴ A narri lidjarr wukirridjimi gunydjirripilŋirgi, gima lidji djirinjnmi nyainy, ɳunun bir-gaypinqibān waru bininy kiriny ɳurrgrima nyi'nyininy kiriny ɳurrnaŋgalŋirji. A narri lidjarr wukirridjim yawirrinygi a midipilŋirgi, gima maŋbiŋban lidji ojarri kirimban, lidji marŋidjini Godan yangi, a lidji ɳuy-yirrp̊ini ɳunun yan ɳambidili ɳilidjali ɳunyili yipi, a lidji dimbitjnyirdjilibān ɳunun mirikunu wugilinyi.

¹⁵ Iŋkiban djiniŋ munatjabī rum nyuni marr-bulanđitdjidi, iŋki djalndjidi malagi djingirapibī, miri munatjabī mala. N̄unubilaŋ nyuni djalndjidi djingirkī munatjabī rumgi, iŋkiban nyuni inga marr-bulanđitdjidjī Godki Gunydjirrgirkī, a nyunuj djalnī īgānā mānādīdīdījībān.

¹⁶ Gima djiniwili munatjabī mala djani rarrmalipm̊, a ɳunuwili ɳampi mala, miri Gunydjirrgirkī mala, djani rarrmalipm̊, bilapilan, rarrmal-i-rarrmalipm̊ bilinjī munatjabī mala a ɳampi mala, iŋki wurpilipmili bili. A ɳunuwili mirgipili rumpili mala djani miri bilapilan gam': nyuni djalndjini yul marri, miri galkn̄u, nyuni djalndjirri latjugi djakiyi, a bilapilanŋirgi. A wurpi mirgi rum nyani bilapilan gam': nyuni bindjirr kirim ɳurrgrima djalndjirri ɳunuwiliki malagi nyani nyunjur mildji, miri rrupiyagi galkn̄u, a girripilŋirgi, a bilapilanŋirgi. A wurpi mirikunu rum nyani bilapilan gam': nyuni inydiŋ wanadjigi, gima nyuni ginj nyunujun munatjabī rum nyani manymak. Bilapilan mirikunu djuburr iŋki milarrdjiw giriw Gunydjirrinjir bil yarim djingirapibī, miri munatjabī, nyani inydiŋ ɳurrgrimi.

¹⁷ A djiniñ munatja gurrbi nyani manydjidi ñidjirrkñban, gima nyani Godđi malimdjigi, a babalikinij djalbñini yulñiriny nyani dñinirigibñ ñunukinijban girri. Marrga ñunubilan nyuni bilapilan yul, nyuninyi girri Godđi nyin malimdjigibñ, bilan rummirri munatjamirri nyuni nyi'nyinibñ. Ban ñunubilan nyuni djamadjigi nyimki ñunupilan nyani God djalhdjirri, girri nyuni wannji nyi'nyinidjipmban bintji kiri ñurrgima.

¹⁸ Niy, ñirrañ yutjuwili, ñunuj walirr ñunukinij Godđi malimdjigi djingiriny munatja gurrbi ñunugima walirr ñurrumban ñidjirrgidjini ñilimilaj bukmakgi. A ñunuj mirikunu yul wiriny lim bultjigi nyanyiny yagirri 'Bir-yirrpinakinij Christgi', nyani bi giri bapili nyadji ñunupilan, a nyani djamadjigi marrga bir-yirrpigibñ Christnyi a Garrajan yulpilñirinyi. Njilidji yirrimi lidji marrñini ñunuj djanjuny ñurrwakñi. A ñurrumban galbi yulpili bilapilan miri ñunuj yul inydiñ ñuliban, a limila djin yulgunjiliban. Marrga yirrimi lim ryamban ñunuj djawardjirriñbi walirr ñidjirrkñi bi girimban.

¹⁹ Bilimi ñunuwiliti yulpili limila djin maltjny girin, bitma djani girri Garrajan yulpili, miri ñilimi. Bil djuditjpan limiliny djin gubini, gima iñki birral djani w提醒 pilm ñilimilar. Ñunubilan birral ñunuwiliti yulpili djani giñdibi ñilimilapibi malabi, girri djin gurrpinir girinirgir limila djin maltjigi. Bil djin gar-gurryilidjini ñilimilanjir malañir, a bilapilanđji ñilimi bukmakdji lim djirjinibñ inkaban ñilimilapibi malabi djini.

²⁰ Inkaban marñginyirriñ yulpili lidji, gima nyani Djuyu Wugili lidja yulgunjiliban, a yirrpini nyanganj ganjdjarr njilidjali, marrga lidji marñgibñ warppamgi Garrajan djanjunygi.

²¹ Niy, yirrimban lidji marngibñ birralgi. Narri inkirr giñiyi lidji djanadjirripm birralgi, bil lidjarr wukirridjimban djiniñ djurra marrga lidjnyirr gungi-bilmiygï ñurrum lidji marngibñ ñunugirki birralgi gadjigarggi Garrajan. A dñiningirki djanjunygi lidji marngibñ girri, miri, ñunubilan wari ñunupilan inydi yulgim kirim, a marñgidjim kirim wiltjnyirriñ djanjuny, girri ñunuj wiltjnyirriñ djanjuny iñki bi girinyir birralñiri djanjunyjiri.

²² Waribam ñunuj wana inydi yulginyakinij yul? Babalikinjiri yuldji wili bir-yirrpini Djesu Christnyi, a bindjirr wañban gam', "Ñunuj Djesu nyani yarim yul, iñki ñunuj Wanñirnyirakinij yanginyirbi Godbi namnjiri nyani." Bilapilan yul nyani ñunuj 'bir-yirrpinakinij Christgi', a nyanganj gulinydjirr yul, gima nyani bilinga inkidjim girim Godki Gunydjjirrgirki a nyanganj Walkirinjirim, bindjirr kirim ñurrgima biliny bir-yirrpin girimban bilapilanđji yulđi.

²³ A ñunubilan wili ñunupilan bir-yirrpigi Godan Walkiripm a nyanki inkidjigi, girri yirrimban ñuni yulđi bir-yirrpigibñ God Gunydjjirrgirin gyrrgima. Inki wili marr-yirrpigi Gunydjjirrgiral, a ñunukinij bilidjirri bir-yirrpigibñ nyanganj Walkiripm. Bil ñunubilan wari ñunupilan milma wanjdji bilapilan gam': "Niy, yirrimi Djesu nyani Godan Walkirinjim, a marr-birralñakinij inga ñarri," giri bilapilanđji yulđi nyani gumbirr-gatjigi Djesunyban, a Gunydjjirrgirinyban gyrrgima.

²⁴ Marrga iñki marr-birralñakinidjiji djanunygi wurpigi, bil yarim lidji ga'gatjirri ñunuj djanjuny lidji marrpini ñurrnangalñiri. Ñunubilan ñunuj nininyju djanjuny ñu'ñurri durkðurkmirri njilidjar, a lidji marr-birralñakinidjirr girimban, girri nyanganjari lidji nyinidjii giribañ ñunujili yipibañ Walkirinjirar, a Gunydjjirrgirar girri.

²⁵ A dñinibñ ñunuj djanjuny Djesudji nyani limila yirrpini: ñilimi miri wannji-giliwiliñakinij lim gatjigi bintji kiri ñurrgima.

²⁶ Ñarri lidjarr wukirridjimban djinin djanjuny marrga lidjnyirr butjir-garriban iñki butjinydji-guw ñunuwiliti inydi yulginyakinij malany. Djani djin manyam kirim lidja djin gar-yuliban marrga njilidji wurpili djanjunyili lidji djaypirgibñ.

²⁷ Bilapilan miri ñarri lidjarr bultjiddjini ñurrwakñi, Djuyu Wugiliri nyani yirrpini nyanganj ganjdjarr njilidjali, a njilidji galiki ñunuj ganjdjarr inydi muñbinigibñ. Marrga yarim Djuyuny Wugiliny bilan lidji butjinydji gunban, a nyanyibi lidjny marñgi-gupirrgunjban. Marrga inkaban inga lidji miliki wurpigi yulg marrga ñuni lidjny marñgidjigi, bintji nyani lidjanydji yuli, a mayalidji lidjny ñagirrgi. Bil ñunuj ganjdjarr Djuyu Wugilinjiran birral ñu'ñurriban njilidjar, a ñuni lidjny marñgidjigibñ bukmakibi malabi, yarim nyani lidjny mil-lirrpigibñ birralnyi, a inkaban lidjny mayali-ñagirrgi. Marrga bilapilan miri Djuyu Wugiliri nyani lidjny marñgidjili biligi, njilidji bilan bi'bintji ñurrgima lidji nyinidjibñ, miri, ñidjirrkñ Garrajar bilan lidji nyinidjii giribañ muñjuyan.

²⁸ A djiniñdjiniñ ñirrañ yutjuwili, w提醒 pilm nyanganj nyi'nyinu giriwan, marrga ñunukinij nyani milarrdjigi a malñdjigi yili djili ñilimilar munatjamirri, njilidjiban bir-bimirri nyanganj lidji djirridjibñ rumrum'nyirrinjban, inkaban inydi lidji mirrbiliban nyanganj, miri, guniginjibñ ñunukinij nyani lidja yulguni.

²⁹ Nunubilanq ḥunrum lidji marngibān Djesu Christ džiniñi rum-garryginin yul, girri džiniñi lidji marngibān garrisma gam': Godan birral yulpili džani džiniñi djuburmanymakginin yulpili, bilapilanq miri Djesu. Marrga ḥunubilanq wurdilim yuldji djamadjim kirim mirrpm manymak, girri ḥunun yul buñtjili nyanhapibi ganydjirrbi Garayibi, miri, nyani yuwirdjidjini, a bilapilanq yuldji īnkibān mayalidji lidjny ḥagirrgiban.

3

¹ Nyani God limila marr-bulañgitjdjirrbān mirrpm wana. Nihilji lidji nyamban ḥunun djanjuny nyani birral, gima Gunydjirrar limiliny bultjidjini yagirri "yutuwili Godan", a ḥununi birral, nyanjan yutjuwili yirrimban limi. Bil ḥunuwilinjir munatjabi yulpilinjir džani īnkibān limiliny džin džirjinjiri, miri, nyanjan yidjipilili limi, gima īnki džin marngi Godki djanpārki.

² Marrkapnyakinpila, yirrimban Godan yutjuwili limi, bil biđak nyani īnki limiliny mil-lirrpiniñ nyim gunyirri yuwirdjijin yulpili limi guyumpiligi, ḥunukinij nyanjar lim nyinidji djamajni. Bil lim marngi džingirkī wurpmgi gam': ḥunukinij nyani Djesu yili malndjigij džili munatjamirri, ńilimi wirapili Godan yulpili lim wurdijidjibān, a ńilimi girri bilapilanq ḥurrigma miri Djesu nyanibi lim džirridjibān. A ḥunun limila birraldjidji gima Djesunyban lim nyanban miri bilapilanq ḥurrigma nyanibi birral dji'djarribān.

³ Nunubilanq nyani yul marr inga baltjinmi Djesugi, miri nyani Djesudjut inga birraldjinjirdjigij ḥunun djanjuny, girri nyanjar marr-birraljakinjirri na'halwirrgidjigibān nyaninjy bukmakirj nyanganjir mirginjir, marrga nyani midjirrnyirrindjidjibān, yarim bilapilanq miri Djesu nyanibi.

⁴ Nunubilanq wili ḥunupilañ mirgi-djamadjimi, ḥunun yul, miri, rum-dapilidnjirakinjibān nyani, gima dapilidjim kirimbān Godan rumbān. Miri, rum mirikunu ḥunun bilapilanq gam': yuldji nyani bir-yirrpigi Godan djanjuny, a nyani dji'djalndjidji djamadjigij nyanganjapibi mirgipili rum mala.

⁵ Bil ńilidji marngi nyani Djesu malndjilij džili munatjamirri marrga limiliny gaypigibān mirgi mala ńilimilanjiri. A nyani yirrim ńalwirrgi, a wirrban mirgi nyanjari.

⁶ Marrga ḥunukinij nyani yul nyi'nyini wurdilim Djesur, īnkibān nyani dji'djamadjiw mirgi mala. Bil ḥunubilanq nyani yul nyi'nyini rummirri mirikunumirri, bilapilanq yuldji īnkibān džirjinjiri giriw Garaynyi, a īnkipmbān marngi Godki.

⁷ Njirrañ yutjuwila, īnki džina maltjiwi ḥunuwiliki yulpiljirgi wirapili džin nyinipmbān bilapilanqmirri mirikunumirri rummirri, bintji lidja džin gar-yulibān. ḥunukinij wili ḥunupilanq dji'djamadjim bulangitj, ḥunun yul djarribān rum-djūnupaginjibān milbirimirri Godar, bilapilanq miri Djesu nyanibi.

⁸ Bil ḥunukinij wili ḥunupilanq dji'djamadjim mirikunu, miri bindjirr ḥurrigma ḥunun yuldji mil-lirrpinnibān nyani nyi'nyinibān rummirri mirriñirar, miri, nyanjan djubur bi girimi ḥunujir mirriñir Satannjir, gima ḥuni mirrir dji'djamadjim girim mirikunu bindjirr kirim ḥurrigma, ḥurrnañgalnjir bi'bininyi nyanibi, a džinikirribān gunyambi dji'djamadjimban. Bil nyani Godar Walkirinjirim midjirridjigij bukmaknyi ḥunun mirrañ džama malany. Bilapilanqirgi djamagi nyani Djesu malndjilij džili a yuldjini, marrga gulmyigi Satanan džama.

⁹ Nunubilanq nyani yul yuwirdjidjini, girri ḥunun yul buñtjili nyanhapibi Godbi, marrga īnkibān nyani mirikunu dji'djamadjipmbān, gima Godan Wugili nyini girim nyanjari. Miri, ḥuni Wugiliri watjarrdjigibān nyaniny džamanjir mirginjir, gima Godjji Gunydjirrar yuwirdnjyirdjili nyaninyi ḥurrwagi, miri, nyani buñtjili nyanhapibi ganydjirrbi Godbi.

¹⁰ Bilapilanq džinyi lim džirjinilgi ḥunuwili yulpili wirapili Godan birral yutjuwili džini, a ḥunuwili wurdilim wirapili džani ḥunun Mirrañ yutjuwili, miri bilapilanq gam': wili īnki djamadjigij bulangitj, girri ḥunun īnki Godan yul; a ḥunubilanq īnki wari inga marr-bulañgitjdjidi wurpigi yulgī, girri ḥunun yul īnkibān Godan yidjipili nyani, bilapilanq.

¹¹ ḥurrnañgalnjir ńilidji marrnjinyi džiniñi djanjuny gam': ńilimibi bilaj inydi lim marr-bulañgitjdjidi, bilapilanq djanjuny lidji marrnini bumir-galbi bilidjirri.

¹² īnkibān lidji bintji ḥurrigma lidji nyinidjibān miri Kayin; nyanigima wurpm yul Satanan - nyani bipini gulmigipm. A nyimki Kayindjji bipini nyaniny? Gima nyanjan džama mirikunu, bil gulmigraj džama manymak, bilapilanq nyani bipinibān gulmigipm.

¹³ Marrga īnkibān ḥuy inydi lidji yaryardjigi, gulmaw, ḥunukinij munatjabi yulpili džani lidja džin ḥuy-marginidjidi. Miri, djuburr-mirikunu yulpili bintji ḥurrum džina džin ḥuy-marginidjidi djuburr-manymakgi yulpiljirgi.

¹⁴ Bil wurpiwiliki yulpilnjirgi ḥilimi djina lim marr-bulanqitjdjirri, miri, warpamgi wirapili Godaj yulpili a ḥilimilaŋ wuwwilinimi ḥunuwili djina lim marr-bulanqitjdjirriban, a bilapilanmirrppmi marr-bulanqitnjyrbimirrppmi lim djirinjmibar ḥurrum lim gubini ḥunuj balinyirin gadjigarr, a lim barinjiliban gadjigarr wannji. Bil wari ḥunupilan iŋki djina marr-bulanqitjdjiyi wurpiwiliki yulpilnjirgi, ḥunuj yul nyani ḥulikirripmban, nyi'nyinipmban rummirri balinyirimiri.

¹⁵ A ḥunubilan nyuni inga ḥuy-marginidjirri wurpigi yulgi, galkru nyuŋuŋ gurutiginjirgi, girri milbimirri Godar nyuni bilapilan nurrigma miri muŋiŋ. A nyuni marŋgi djingirkı gam': wirr munij yul gatirri Godaj birral wannji nyanganar, a bilapilan yul iŋki nyinidjiri giri ḥuli nyanganar Godar gurbimirri.

¹⁶ Bil ḥili marŋgiban birralgi marr-bulanqitnjyrbig, gima il nyanganiban nyaliki Djesudji nyanihi litjandyji gunjili, a ḥilitjar bilamirri nyanihi baliniban. Marrga ḥilibi wurpi bilan djinanydjl gunban Godaj yulpilnjirgi, a djanŋar bilamirri il balidji.

¹⁷ A marri nyuni gatinmi galbi girri mala a wali, a nyuni nyami nyuŋuŋ gurutigininjyini kiŋi kirim gumbala, a iŋkiban nyuni inga gunban nyim ḥunupilan, bil nyuni raymanbididjibana. ḅunubilan bilapilan nyuni bintjigima, girri iŋkiban nyuni gatirriban Godaj birral marr-bulanqitnjyrbig nyuŋuri.

¹⁸ A wurpi, ḥirraŋ yutjuwila, iŋki lidji wanidji miri bilapilan gam', "Narri djinarr marr-bulanqitjdjirriban wurpiwiliki yulpilnjirgi", bilakinjy iŋkiban djinyi lidji gungratjwi a djina lidji djamadjiw bulanqitj. Bil ḥilidjamirrppm djamamirrppm djinyi lidji mil-lirrpigi djina lidji marr-bulanqitjdjirriban yirrimi.

¹⁹ Nirraŋ yutjuwila, ḅunubilan yirrimi ḥili djiny il djagadjigi Godaj yulpilnjirinyi, girri bilapilanjdji il djirinjlgibana il nyini girimbana birralmirri. Marrga ḅunubilan ḥilitjar ginjinyirbili maladji litjny djin mirgi-bultjigi, iŋkiban butjinydjl gunban ḥilitjan ginjinyirbili malany, girri il ḥuy-laydjigibana ḅunukinjy ḥidjirrgili il giri Godili a il ḥilidjibana ḥilitjnyi djuburnyi.

²⁰ Niy, nyadji ḅunupilan guni il marrnjirrdji, a ḥilitjar ḥuydji litja bultjigibana, "Nyuni mirrppm mirikunu yul", bil birralgima wurpiwiliki yulpilnjirgi djinal marr-bulanqitjdjirriban. Marriban, nyani God djiniŋ wana mirrppm, a bukmakgi marŋgi, niy, nyani marŋgi ḅunugirki djanŋunygi ḅunuj ḥilitjapibi rumbi. ḅunuj iŋkiban Godaj bimbi litja waniji, iŋkiban nyani litja bultjirri, miri, mirikunu ḥili, ḅunuj yarim ḥilitjapibi rumrum'djnyirbili mala litja djin waŋban, marrga yarim il marrbigibana, a il ḥuy-laydjigi birbimirri Godar, gima yirrim djiny il djagadjim girimban nyanganar yulpilnjirinyi.

²¹ Marrkapnyakinpila, ḅunubilan ḥilitjar ḥuydji iŋkiban litja mirgi-bultjirri, girri mil-burrdjini il djirridjibana birbimirri Godar, a ḥidjirrgili bi ingal giribana rumrum'nyirrinban.

²² Girri bupalikinjirgi il butjalmidji nyanyinyi, a nyani litja gunban ḅununji, gima il bu'butjirgindjirri nyanganar yan-gunyirbigi malagi, a il dji'djamadjim ḅunuwili djin galnjibulanqitnjyrdjigi nyanyinyi mala.

²³ A djinaban nyanganar yan-gunyirbi ḅununuŋ nyani Gunydjirrar litja yirrpini. ḥili bilan marr il yirrpigi nyannjali Walkirnjiralim, Djesu Christili, a bilan inydjil marr-bulanqitjdjidji ḥilibinydjl, bilapilan miri nyani litjny yan-gunjili ḅunrwaknji.

²⁴ Bupalikinjy yul, bilan nyanganar Godar yan-gunyirbimirri nyani girim nyini, girri nyani nyi'nyinidjipmban Godar, a God nyanihi nyi'nyinidjiri nyanganar ḥuymirri. A bilapilanmirrppmi il djirinjlgibana nyani God nyi'nyinipm ḥilitjar; nyanganar Djuyudji Wugiliri il djirinjlgili ḅunuj, gima ḅunuj Wugilinyi nyani litjny gunjiliban Gunydjirrari.

4

¹ Marrkapnyakinpila, ḅunubilan wari ḅunupilan lidja bultjigi miri bilapilan gam': "Nirramirrppmi Godaj Wugili nyani waŋi", iŋkiban djayurrkjurrk lidji marrbirraljakinidjidi ḅunugirkı yangi, bidaŋ, manyawi ḅunuj wugilinyi ḅunrwaknji, marrga lidji djirinjlgibana bilan ḅunuj wugili nyani birral Godjiri waŋ kirimi, gima marri ḅunun waŋ kirimi Mirrijir. Niy, ḥilidji bilan lidji manyani nyim wugili ḅununuŋ, bintji nyani lidjny gar-yuli marri, gima galbi wiltjnyiwiltjnyirin djabarrkginpili inydjin yulgimban bupalikinmirri djiли munatjamirri.

² Djinimirri lidji djirinjlgili nyim wugili lidja waŋ kirimi yulmirrppmi: ḅunubilan ḅunun yul lidja wanidji bilapilan gam', "Djesu Christ bapili lidja milarrdjili ḥamnjiri miri yul birral nyani, a gatjedjini birral galnjı", girri ḅunugima yul lidja waŋ kirimi Godar Wugiliri.

³ Bil bupalikinijur yuldji wili inkidjimi ḥunun djanjuny Djesubi, nyani inkibān waŋi kiriw Godjiri, bil wurpiŋir wugilinir waŋ kirimban. Bilapilanir wugiliri nyani bir-yirrpigi Djesu Christnyi, a nyannan gulinydjjirr wugili nyani, a bupalikinijur yul war iwanjidji bilapilanmirrppmi wugilimirrppmi, yagirri nyaninyi lim bultjigi 'bir-yirrpakinijur Christgi'. Djiniŋ djanjuny njilidji ḥurrum lidji marrnjini, miri, ḥunun 'bir-yirrpakinijur Christgi' nyani djili malnjidjigi munatjamirri nyadji ḥunupilan. A djini'djiniŋ njilimi warrpamdiŋ lim nyamban bilapilan wugili nyani ḥurrum limila yulgurjilaban djili munatjamirri, gima galbidji yulpilnirri djin bir-yirrpinmiban Djesu Christnyi djini'djiniŋ djanjar yandji.

⁴ Bil njilidji, njirraŋ yutjuwila, djinyi lidji baŋiriniliban ḥunuwiliny inydjin yulginyakinpili yulpilnirinyi, gima Godan yulpili lidji, a Godan Wugili, ḥunun njilidjar nyi'nyinibān, nyani mirrppm ganydjarrginiŋ, bil ḥunun mirgi wugili war i nyi'nyini munatjabimirri yulpilimirri nyani gatjiniŋ yarim marri djayal ganydjarr, marrga njilidji manbiŋ lidji djirridjibān, bil ḥunitjini munatjabī mala djin djirridjibān bilbalini.

⁵ Djani yarim munatjabī yulpili, marrga djin wanjidji giri munatjabī djanjunypili, marrga wurpiwilirri munatjabī yulpilinir djanji butjinydjin gunjban djanki, a djina djin marr-birralnajakinidjibān.

⁶ Ban njilimibi Godan birral yulpili limi. ḥunubilan wurpi yul nyani birral marnji Godki, ḥunun yul butjinydji gunjban njilimiliki. Bil bupalikinijur yul marnginyirri Godki, ḥunugima inkibān limila butjinydji guni ḥunukinij inga lim bultjigi ḥunun djanjuny birral Godbi. Bilapilanđđi lim djirinjligi nyim wugili wurpiwilirri yulpilnirri djin gatjiniŋ nambidi djanjar; nyibili djin gatjiniŋ Godan Wugilinyi a djanjamirrppmi ḥuni Wugiliri limila bultjigi djanjuny birral, bil nyibiri djin gatjiniŋ wugiliny mari-djamadnjyirakinij djanjar, a djanjamirrppmi ḥunun wugili limila wanjidji djanjuny wiltjnyirri, a bilapilan yul inkī inga marr-birralnajakinidjidi njiliman djanjunygi.

⁷ Marrkapnyakinpila, njilimibi bilan inydi lim marr-bulanđđitdjidji, gima marr-bulanđđitnjyirbi djiniŋ Godbi gunyirbi nyannapibi, a ḥunubilan djina lidji marr-bulanđđidjidi wurpiwiliki yulpilnirgi, girri birralban nyannapibi Godbi lidji buŋtjili marrga lidji yuwendjidjini, a Godki lidji marngibān.

⁸ Bil ḥunubilan wari ḥunupilan inkī djina marr-bulanđđitdjidji nyinidji wurpiwiliki, giri ḥunun yul inkī birral marngibān Godki, gima God a marr-bulanđđitnjyirbi biliŋ wurpilipmili.

⁹ A nyani Godđji limiliny mil-lirrpini nyannan marr-bulanđđitnjyirbi njilimiliki djinimirri: nyani yanili nyannan Walkirinjimi bapili munatjali njilimiliki, marrga nyannamirrppmi lim gatjigibān wanji birral.

¹⁰ Wiraj marr-bulanđđitnjyirbi ḥarri inydjirr bultjinmiban? Njiliman? Inkī. Njurrwaknji, inkibān inga lim marr-bulanđđitnjyirri Godki, bil marribān nyānibī limila marr-bulanđđitdjidjipmbān. A birral marr-bulanđđitnjyirbi nyani miri bilapilan gam'. Godđji nyani nyannan Walkiripm bapili, marrga nyani balidji njilimilar bilamirri, marrga God dadawdjidjibān nyannanjan madakarritjirri njilimilar ḥunukinij lim mirgidi'đjamadnjyi; bilapilanđđi Gunydjjirrar limiliny mil-lirrpini limila marr-bulanđđitdjirri.

¹¹ Marrkapnyakinpila, ḥunubilan miri bindjirr ḥurrigma nyani God limila marr-bulanđđitdjirri, njilimibi girri bilan inydi lim marr-bulanđđitdjidjibān.

¹² Wir yuldji nyaw giriwi Godnyi nyannar mildji, inkī lim marngidjidi Godki ḥunumirri; bil ḥunubilan njilimibi inydi lim marr-bulanđđitdjidji, girri God nyānarki nyinidjibān njilimilar. Bilapilanđđi lim marngidjidiŋban nyannan marr-bulanđđitnjyirakinijirgi rumgi, a nyannan marr-bulanđđitnjyirbi manbjidjidi njilimilar durkdukmirri.

¹³ Miri bintji lim djirinjligi lim nyini girimban Godar, a nyani nyini girimban njilimilar, gam': nyani Gunydjjirrar yirrpini nyannan Wugilinyi njilimali durkdukmirri.

¹⁴ A njinibilar mildji nibi nyānini Garay Djesuny, a lidja nibi bultjinmiban djiniŋ djanjuny birral, miri, Gunydjjirrar munatjali yanili Walkirinjimi, marrga ḥuni limiliny wanjirgibān bukmaknyi njilimiliny munatjabī yulpilnirinyi; miri bilapilan Djesun djama djili munatjamirri njilimiliki.

¹⁵ A bupalikinijur yul wili inydi bultjigi Djesubi miri bintji gam': "Nyani djiniŋ Godan Walkirinjimi", girri ḥunun yul nyi'nyinibān Godar, a nyani God nyi'nyinibān nyannar girri.

¹⁶ Bilapilanđđi lim djirinjligibān ḥunun marr-bulanđđitnjyirbi Gunydjjirrgirai - ḥunun nyani gatjiniŋ njilimiliki, njilimi lim djirinjlimibān ḥunugirki marr-bulanđđitnjyirbigi, a lim marr-birralnajakinidjirri nyani birral limila marr-bulanđđitdjirri. God a marr-bulanđđitnjyirbi wurpilipmili bili, marrga ḥunubilan marr-bulanđđitnjyirbimirri rum-

mirri lim nyini girimban, girri nyanjari lim nyini girimi Godar nyanjarki, a nyani nyini girimi njilimlar.

¹⁷ Djinimirri njiliman marr-bulanqitnyirbi nyani wanadjidji a manbidjidji, marrga guyumpiligi, ḷunukinij ɻammirri lim djirridji birbimirri Godar, iñkiban inga lim rumrum'djigibar a inga lim yawnjidjibar; gima Djesu nyanibi iñki inga yawnjyi Gunyddjirrgirki, a bilakinij djinibar lim nyini kirim munatjamirri njilimi djinini yarim bilapilan miri Djesu, miri, lim gatjinmi birral marr-bulanqitnyirbi yulpilñirgi, a Gunyddjirrgirki.

¹⁸ ḷunubilañ Godki inga lim marr-bulanqitdjirri, iñkiban inga lim rumrum'djigibar, gima bilan mirrppmi lim marr-bulanqitdjidji, girri njiliman yawnjinyirbi nyani manydjidjibar. Bil ḷunubilañ inga lim yawnj, girri lim giñ kirimban marri Goddji limiliny yati-daplidjigi. A ḷunubilañ miri bindjirr ɻurrgima lim giñi, girri njiliman marr-bulanqitnyirbi inga iñkipmban wanadnyirban.

¹⁹ A njilimi inga lim marr-bulanqitdjirriban gima nyani ɻurrwakni limila marr-bulanqitdjini. Miri, nyani limila marr-bulanqitdjini ɻurrwagi, a ḷununjir girri lim marñgijidjini inga lim marr-bulanqitdjidji.

²⁰ Bil wari ḷunupilañ bindjirr wañi gam', "Ñarri ingarr marr-bulanqitdjirri Godki", a ḷununj nyani wañi bilakinij inga ḷuy-marginidjirrppm wurpigi yulgi, girri ḷununj yul inydi yulgimban. Gima, ḷunubilañ iñki nyani inga marr-bulanqitdjiyi wurpigi yulgi wiriny nyami nyantar mildji, nyalikiban nyani inga marr-bulanqitdjirriban Godki Gunyddjirrgirki, wiriny iñki nyaw giriri?

²¹ A gurkunyi, djinij yan-gunyirbi Djesudji limiliny gunjili miri bilapilan gam': buba-likinij yul wari Godki inga marr-bulanqitdjirri, nyani bilan djina marr-bulanqitdjidji wurpiwiliki yulpilñirgi girri; bilapilañ nyani Djesu limila bultjidjini.

5

¹ Bubalikinij yul wari marr-birralñakinidjirri miri bindjirr gam', nyani Djesu djininj Godan Yirryirrpakininj yul, miri, nyannjan Christ, girri ḷununj yul nyani birral Godar yidjipili. A njilimi bukmak lim marñgi bilan yulgi inga lim marr-bulanqitdjirri a ḷununj yul nyani gunyddjirrinimi yidjipiligi, girri inga lim marr-bulanqitdjidji nyannjan yidjipiligi gurkunyi. Marrga, ḷunubilañ njilimbi inga lim marr-bulanqitdjirriban Godki, girri djina lim marr-bulanqitdjidjibar warrpamgi ḷunuwiliki yulpilñirgi wirapili inga djin marr-bulanqitdjirri Godki, gima djani girri nyannjan yutjuwilinan.

² Bil nyalikidjidi lim djirinilgi yirrimi djina lim marr-bulanqitdjirriban yutjuwiliki Godan? Djinimirriban lim djirinilgi gam': Godki inga lim marr-bulanqitdjirri, a lim butjirgindjirri nyannjan yangi.

³ Niy, bilapilanđi inga lim marr-bulanqitdjidji Godki, miri, butjinydji lim gunj nyannjan yangi, ḷununj nyani limiliny gunjili, a ḷununj lim marrgi a lim butjirgindjidi. A nyannjan yan iñki bir-manbij limila,

⁴ gima ɻurrumban lim yuwirdjidjinaban ganydjirrdji Godar. Niy, bubalikinij yul wari buñtjili Godbi nyani manbidjidji, marrga ñimbitjnyirdjigi nyim mirgi mala djingirapibi munatjabti. A nyalikidjidi lim manbidjidji bilapilan miri ḷununji? ḷunukinij marr inydi lim yirrpigi nyannjal, Djesuli, bilapilanđi djinyi lim banjirigi munatjabti yulpilñiriny - ḷunuwiliniñ wirapilinir djin iñki-bultjinmi Godan gadjigirrgi.

⁵ Niy, ḷunubilañ nyuni marr-birralñakinidjidi nyani Djesu djinini birral Walkirijimi Godan, nyunibar bilapilan yul wili djiny ñimbitjnyirdjim kirim mirikunu yulpilñiriny a djanjanj mirikunu rumnyi.

⁶ Djesu Christ bi girali munatjali, a gapimirrppmi a budimirrppmi nyani limiliny mil-llrrpinban nyani Goddji Gunyddjirrar bapili yanili nyanniny. Miri, gapimirrppmi nyani Djesu bi limila girali, gima gungi-yigilinjili gapili; a budimirrppmi limiliny gunyatjili, gima nyani budi djilñdjili nyannjan galñjirr ḷunukinij gurrtjimirri nyani wirardjinjini a balini, bilapilan. Iñkiban nyani gungi-yigilinjili a gírrbar, bil ḷununjir girri nyani budiri limila djilñdjili, marrga lim marrgibar wanji birral. A Godan Wugili, ḷununj nyi'nyinibar njilimlar, nyani limila bultjinmi djinij, miri, djanjuny djinij birral, gima Djuyu Wugiliri yarim limila bultjigi birral, iñki limilanydji yuli giri.

⁷ Niy, ḷunuwiliniñ warrŋguwilidji maladji nyani Goddji limiliny mil-djunupadjili Djesuli,

⁸ miri, Djuyudji Wugiliri, a gapidji, a budiri; a djiniwili warrŋguwili mala djin yitjidjirri, yarim wurpm ɻurrgima djanjuny limila djin bultjinmi, miri, Djesu djininj Godan Walkirijimi.

⁹ ḷunubilañ butjinydji lim gunj a djina lim marr-birralñakinidjidi ḷunukinij yulpilñir limila djin bultjigi nyim ḷunupilañ birraldjini, girri bilan butjir ingandydi

lim gunban Godki girrgima a yirrimi lim marr-birraljakinidjidji ɻunugirki djaŋunygi nyaniŋa limila bultjigi; gima yulpili inyddin yuli bilanji, bil nyani God wirr. Niy, nyani God limila bultjidjini ɻunun birral djaŋuny nyanaŋapibi Walkiribi, a djinibar ɻunun djaŋuny nyani limila bultjidjini:

¹⁰⁻¹¹ "Narri, Goddji Gunydgirrjirim, ɻilidjarr gunban birral wanji, marrga inkibar lidji balidji, bil yarim lidji nyinidjipm bintji kiri ɻurrgima, a ɻunun wanji lidji marginibar ɻirramirrppmi Walkirimirrppmi," miri bindjin limila wanji nyani. A ɻunubilan nyuni inga marr-baltjigiban Djesugi, a nyuni marr-yirrimkinidjidji nyani djinin Godan Walkirinjimi, girri nyuni djirinjilgiban Goddji inma bultjidjini djaŋuny birral Djesubi. Bil ɻunubilan inkbi nyuni inga marr-birraljakinidjidji Godki, girri Godnyi nyuni bultjimibar yagirri miri "yulginyakinin", gima inkibar nyuni marr-birraljakinidjinyir ɻunugirki djaŋunygi ɻunun nyani Goddji Gunydgirrar inma bultjidjini nyanaŋapibi Walkiribi, bilaplaŋ.

¹² Niy, Djesudji Godan Walkirinjirim gatjinmi birral wanji ɻilimiliki, marrga ɻunubilan nyuni marrŋili Djesuny, girri ɻunun wanji nyuni ɻurrum marrŋiliban nyanaŋapibi. Bil ɻunubilan wili ɻunupilan inkbi marrnyir girinyir Godan Walkirinjim, girri ɻunun yul nyani badatj marrgi ɻunugiriny wanji.

¹³ Djiniwiliny djaŋunypili ɻarri lidjarr wukirridjili, miri, ɻilidjiki wirapili inga lidji marr-birraljakinidjini Djesugi a lidji marrŋili nyanyiny, irr wukirridjili marrga ɻilidji lidji marrŋigban ɻurrum lidji marrŋiliban wanji birralban, a lidji nyinidjji giriban bintji ɻurrgima.

¹⁴ A miri bilapilan ɻurrgima ɻilimi inga lim marr-baltjigi Godki gam': ɻunukinij nyanyiny lim butjalmidji nyimki ɻunupilanjirgi, a nyani djalndjirri lim gatjigi ɻunuŋi, girri nyani limiliny marrŋirrddi butjalminyibi.

¹⁵ A ɻunubilan lim djirinjilg nyani limiliny marrŋirriban ɻunukinij lim butjalmidji ɻunugirki, girri lim marrŋigban nyani yirrimban limiliny gunban nyim ɻunupilan lim butjalmimi nyanyiny.

¹⁶ Miri galkju, ɻunupilan nyuni nyani yulnyi, a nyani djamadjim kirim nyim ɻunupilan mirikunu, a ɻunun mirgi inkbi wana, bil yarim nininipm, a ɻunun yul nyani Garray Djesuginij, manymak, nyuni bilan inga bumirgindjidi ɻunugirki yulgi djuburr-mirikunugi. Girri nyani Goddji djuy-bultjigiban nyanyiny, a wanŋirgiban nyanyiny, gima ɻunun mirgi inkbi wanaban, a ɻunun yul inkbi burr-birrindjiniñir Godnjir rumnjir. Bil wurpiwili yulpili djani djin burr-birrindjiniñiñir Godnjiri, a mirrppm wana mirikunu mala djin djamadjim girimban, a ɻuni mirgili nyani buŋban Godan birral wanji djanŋari. ɻunubilan nyuni nyani bilapilan yulŋirinyi a nyani mirgi-djamadjim kirim miri bindjirri ɻurrgima, inkibar nyuni bumirgindjidi Garrayili ɻunugirki yulgi, gima inkbi nyani Garraydjii wanji-guŋi ɻunun yulŋiriny, bilan nyani burr-birrindjiniñir Godnjir djuŋupanir gadjigarrnjir.

¹⁷ Miri, bupalikinij mirgi lim djamadjigi, milbimirri Godar lim murgum kirim; nyibi mirgipili djani mirrppm mirikunu, bil wurpiwili mirgipili djani yarim marri mirikunu, a ɻunuŋilitji nininipili mirgipili inkbi djin malimdjigi ɻunun wanji lim marrŋili Godnjiri.

¹⁸ A ɻilimi lim bindjirri lim marrŋi gam': ɻunubilan Godan yutjuwili limi, girri inkibar lim mirgi-dji'djamadjigibar munyuy, a Djesudji, wari buŋtjili Godbi, nyani limiliny djagadjigiban, a ɻuni mirikunu wugilirli Satandji inkbi nyani limiliny djaŋtjigiban, gima Godan Walkirinjirim watjarrdjigiban nyanyiny.

¹⁹ A wurpigli lim marrŋigban miri bilapilan gam': ɻilimi birral Godan yutjuwili limi, a nyanyar gumbirrmirri lim nyini girimban; bil ɻunuŋilitji wurpiwili, miri bukmak ɻunuŋili munatjabi yulpili, ɻuni mirikunudji wugilirli nyani djin gatjinmibar nyanyar gumbirrmirri.

²⁰ A wurpigli lim marrŋigban miri bilapilan gam': Godan Walkirinjim nyani milardjili bapiili munatjali, a nyani limiliny marrŋi-gupirrgrunjili, marrga inga lim marrŋigban, a nyanyinyi lim djirinjilgiban, miri, nyanyima djinin wurppm birral Miligidji. A ɻilimi lim nyini girimban nyanyar, niy birral, Godar Walkirinrar, Djesu Christar, lim nyinibar. A djinim yul Djesu, nyani djinin birral Miligidji, a nyanyari lim nyinidjji giriban bintji ɻurrum a bintji ɻurrum.

²¹ Nirraŋ yutjuwili, inkbi djina lidji marr-baltjigi madayinpilŋirgi djingirapibi munatjabi, galkju miri ɻunuŋili madayin mala djanji munatjabi yulpiliñir djin djamadjigi djanŋar gumbirrdji, yarim djenyi lidji gubidjiban, a inyddji lidji mirrbiliban ɻunuŋilitjiñir madayinŋir malajir.